

FUDDOODE NDEN KA TAWREETA

Fii Tageefo ngon

1 ¹Ka fuddoode, Allaahu on tagi kammu ngun e leydi ndin. ²Tawi aduna on ko huunde meerenteere. Niwre no buumunoo di'e den. Ruuhu Allaahu on no wada yaha yiltoo e hoore den di'e.

³ Allaahu on daali: «Yo ndaygu wadu», ndaygu wadi. ⁴Allaahu on ndaari ngun ndaygu, tawi dun no moyyi. Ontuma Allaahu on sendindiri ndaygu ngun e niwre nden. ⁵Allaahu on inni ndaygu ngun «jalorma», o inni niwre nden «jemma». Dun ko ka jallal aranal wadi, onsay nibbi, weeti.

⁶ Allaahu on daali: «Yo heedaango wonu hakkunde di'e den, ko sendindira de.»

⁷ Allaahu on wadi heedaango ko sendindira di'e wonde ley den e wonde dow den. Dun wadiri non. ⁸Allaahu on inni ngon heedaango «weeyo». Dun ko ka jallal dimmal wadi, onsay nibbi, weeti.

⁹ Allaahu on daali: «Yo di'e wonde ka ley weeyo den moobondir e nokkuure wootere fii no njorndi yaltitira.» Dun wadiri non. ¹⁰Allaahu on inni ndin njorndi don «leydi», o inni di'e den «baharu». Allaahu on ndaari dun, tawi dun no moyyi.

¹¹Onsay Allaahu on daali: «Yo leydi ndin fudin tutateeriji, kudi rimooji awdi, e ledde dariide ka hoore leydi ko rima bibbe wondube e awdi, de bee e noone mun.» Dun wadiri non. ¹²Ontuma leydi ndin fudini tutateeriji, kudi rimooji awdi, di bee e noone mun, e ledde rimooje bibbe wondube e awdi, de bee e noone mun. Allaahu on ndaari dun, tawi dun no moyyi. ¹³Dun ko ka jallal tammal wadi, onsay nibbi, weeti.

¹⁴ Allaahu on daali: «Yo ndayguuji wonu ka kammu, ko sendindira jemma e jalorma, di wona maandeeji, ko andina saa'iiji din e jalaade den e duubi din, ¹⁵yo di jalbu ka kammu ko hentina aduna on.» Dun wadiri non. ¹⁶Allaahu on tagi ndayguuji didi, njanu e tosooku, njanu ngun ardoo jalle den, tosooku ngun ardoo

jemmaaji din, o watti don koode den.¹⁷ Allaahu on feji dun fow ka kammu, ko hentina aduna on,¹⁸ ko ardoor jemma e jalorma, sendindira ndaygu ngun e niwre nden. Allaahu on ndaari dun, tawi dun no moyyī.¹⁹ Dun ko ka jallal nayabal wadi, onsay nibbi, weeti.

²⁰ Allaahu on daali: «Yo maaje den duddinor ko wuuri, yo colli wiiro ka hoore leydi, tayita weeyo ngon.»²¹ Allaahu on tagi dee kulle njane ka nder ndiyan, e noonee kulle wuurude, awyayde duuda ka nder ndiyan, ko bee e noone mun. O tagi kadi colli, di bee e noone mun. Allaahu on ndaari dun, tawi dun no moyyī.
²² Allaahu on wadi barki e majji, o daali: «Rimee, duudon, hebbinon maaje ndiyan den, yo colli din kadi duudu ka hoore leydi.»²³ Dun ko ka jallal jowabal wadi, onsay nibbi, weeti.

²⁴ Allaahu on daali: «Yo leydi ndin funtin kulle wuurude, ko bee e noone mun: daabeeji e kulle daasotoode e kala kulle buruure, ko bee e noone mun.» Dun wadiri non.²⁵ Allaahu on tagi kulle buruure, de bee e noone mun, e daabeeji din, di bee e noone mun, e kala ko daasotoo ka leydi, ko bee e noone mun. Allaahu on ndaari dun, tawi dun no moyyī.

²⁶ Allaahu on daali: «Tagen non aaden, waden mo wa nando men e sugu men, on laamoo liyyī din ka baharu e colli din ka weeyo e daabeeji din, o laamoo aduna on fow, e kala ko daasotoo e ndii leydi.»

²⁷ Allaahu on tagi aaden wa nando makko,

ko wa nando Alla o tagi mo.

O wadi fe gorko e debbo.

²⁸ Allaahu on wadi barki e mabbe, o daalani fe: «Hebee bibbe, duudon, hebbinon aduna on, hubindodon mo. Laamee liyyī din ka baharu e colli din ka weeyo e kala kullun ladoohun ka leydi.»

²⁹ Allaahu on daali: «Mi okkii on kala ko tutetee wada awdi, kala leggal ngal bibbe mun wondi e awdi, dun wona neemaaji mon. ³⁰Kala kulle oo aduna, kala sondu ka weeyo, kala ko ladata e ndii leydi, kala ko wondi e wonkii, mi okkii dun kala ko heccidi ko wada neema.» Dun woniri non.

³¹ Allaahu on ndaari ko o tagi kon fow, o tawi dun no moyyí fota. Dun ko ka nallal jeegabal wadi, onsay nibbi, weeti.

2 ¹Ko non kammuuli din e leydi ndin, e duudannde tagoore e nder majji gaynitoraa. ²Nalaande jeedidabere nden taw Allaahu on gaynii golle de o wonnoo huuwude den, ka jalaande jeedidabere o fowtii kala golle de o wadi. ³Allaahu on wadi barki e nden jalaande jeedidabere, o wadi nde hormorteende, ko fii ko e mayre Allaahu on fowtii kala golle de o wadi fii tagugol.

Fii Aadama e Hawaa

⁴E hino doo taariika kammu ngun e leydi ndin fewndo dun taganoo. Fewndo Alla Joomiraado on tagaynoo leydi ndin e kammu ngun ⁵hari lekkun hay gootun alaa e leydi ndin, kudun hay gootun fudaa. Ko wadi dun ko tawde hari Alla Joomiraado on accitaali ndiyan saayoojan e aduna on, hari kadi aaden tagaaka ko rema leydi ndin. ⁶Kono hari ndiyan no tubba ka leydi, no babbina ndelo leydi ndin fow. ⁷Alla Joomiraado on tagiri aaden mballaari leydi, o foofi foofaango ngurndan ka kine makko, ontuma aaden on hebi ngurndan, o wuuri.

⁸Ontuma Alla Joomiraado on wadi tutateeri e nokkuure no wi'ee Adni, hikkorde funnaange, o honni don on aaden mo o tagi. ⁹Alla Joomiraado on fudini nooneeji ledde fow fotude mbaadi e moyyude fii neema. Tawi leggal ngurndan e leggal andinayngal ko moyyí e ko boni no darii ka hakkunde tutateeri.

¹⁰Tawi maayo no tubbi ka Adni don no yarna tutateeri ndin. Ngon maayo no senditii wadi candi nay. ¹¹Caangol aranol ngol ko Fiisuuniwol. Ko ngol tayiti leydi

Hawiila ndin fow, kanje no e ndin leydi,¹² kanje laabude poy, e endan ledde urnaydan e kaaye hittude no wi'ee aljaz'i.¹³ Caangol dimmol ngol ko Jiihuuniwol, ko ngol tayiti leydi Kuusu ndin.¹⁴ Caangol tammol ngol ko Hiddaaqiluwol wi'etee, ngol no hammiri ka funnaange leydi Asuura ndin. Caangol nayabol ngol ko Furaatiwol.

¹⁵ Alla Joomiraado on yetti aaden mo o tagi on, o honni mo ka tutateeri Adni don fii yo on remu don, ayna. ¹⁶ Alla Joomiraado on yamiri aaden on: «Hida newnanaa naamugol kala bibbe ledde wonde e ndii tutateeri,¹⁷ si hinaa bibbe leggal andinayngal ko moyyi e ko boni kon, ko fii jnande jaamudaa ngal woo, a maayay nden jnande.»

¹⁸ Alla Joomiraado on daali: «Haanaa ka oo aaden wona bajjo. Mi taganay mo ballo, hawrando mo.» ¹⁹ Alla Joomiraado on tagiri leydi kala kulle buruure e colli wiiraydi ka weeyo, o banniti dun fow takko on aaden fii ndaarugol no on innirta den fow. Kala ko o inni kullun wuurukun, ko dun woni innde makkun. ²⁰ On aaden inni kala daabeeji, kala colli wiirooji, e kala kulle buruure, kono hari aaden on hebaali ballo, hawrando mo.

²¹ Onsay Allaahu on libi jorre tiidunde e on aaden, on daanii. O yetti yi'al gootal ka cabbi birde on aaden, o lontiniri ka ngal wonnoo don bandu. ²² Alla Joomiraado on yetti ngal yi'al ngal o itti e on aaden, o watti ngal debbo, o addani mo Aadama.

²³ Ontuma non gorko on wi'i:

«E hino non yi'e yi'e an,
e bandu bandu an.
Oo ko debbo wi'etee,
ko fii ko e gorko o ittaa.»

²⁴ Ko dun wadi si gorko selay ben mun e yumma mun, bannita beyngu mun, kambe dido be wona gooto. ²⁵ Hari gorko on e debbo mun on bornaaki hay huunde, kono be hersiraano dun.

Fii no Aadama e Hawaa Yaltiniraa ka Tutateeri Adni

3 ¹Tawi ko mboddi ndin buri yoyre e hakkunde kulle buruure de Alla Joomiraado on tagi den fow. Ndi wi'i debbo on: «Hara dun ko haqiqaa, wonde Allaahu on

daalii wota on jaamu bibbe ledde wonde ka tutateeri gaa den fow?»

² Debbo on jaabii mboddi ndin: «Meden gasa jaamude bibbe ledde ndii tutateeri,

³ kono fii bibbe ngal leggal wongal ka hakkunde tutateeri, Allaahu on daaluno:

«Wota on jaamu ngal, hinaa fere meemon ngal. Si hinaa dun on maayay.» »

⁴ Onsay mboddi ndin wi'i debbo on: «Pellet! On maayataa! ⁵ Ko bay Allaahu on no andi jande jaamudon bibbe maggal woo, gite mon den udditoto, wa'on wa Alla, andon ko moyyi e ko boni.»

⁶ Debbo on ndaari tawi bibbe ngal leggal no moyyi fii jaamugol, no foti e ndarde, awa kadi no woodi fii okkugol hakkil. O tetti, o jaami, o okkori moodi makko mo o wondunoo e mun on, on kadi jaami. ⁷ Ontuma gite mo bee e mabbe udditii, be andi wonde be surraaki. Onsay be tokkindiri kaaki yibbe, be surritori.

⁸ Onsay be nani Alla Joomiraado on no jinda ka nder tutateeri fewndo ka buubol wifata, be suudii Alla Joomiraado on ka hakkunde ledde tutateeri. ⁹ Kono Alla Joomiraado on noddi gorko on, wi'i mo: «E ko honto wondaa?»

¹⁰ On jaabii: «Mi nanu tun hito maa ka nder tutateeri, mi huli ko fii hari mi surraaki, mi suudii.»

¹¹ Allaahu on daali: «E ko hombo yeeti-maa a surraaki, hara a jaamii bibbe leggal ngal mi tonjan-maa ngal?»

¹² Gorko on jaabii: «Ko oo debbo mo bannitandaa mi okkorimmi bibbe ngal leggal, mi jaami.»

¹³ Onsay Alla Joomiraado on daalani debbo on: «Ko hondun wadandaa dūn?»

Debbo on jaabii: «Ko mboddi ndin daynimmi haa mi jaami.»

¹⁴ Ontuma Alla Joomiraado on daalani mboddi ndin: «Bay a wadii dūn, a hudaama e hakkunde kala daabeeji e hakkunde kala kulle buruure. A luttay daasaade e leydi, jaamaa mballaari fannamaa hida wuuri. ¹⁵ Mi waddindirte e oo debbo, mi waddindira jurriya maa e jurriya makko. Jurriya makko on fuse hoore, an kadi soppaa mo e teddudi.»

¹⁶ O daalani debbo on: «Mi beyday muuseendi njata maa on tuma jibintaa. Ko e hoore muuseendi jibintaa bībē. Faale fii gorko maa on wonay e maa, awa kadi ko kanko laamoto-maa.»

¹⁷ O daalani Aadama: «Bay non a hedike debbo maa on, a jaamii bībē ngal leggal ngal mi tonjan-maa, mi hudii leydi ndin sabu maa. Ko e dow yangi yaltinirtaa e mayri ko jaamaa, fannamaa hida wuuri. ¹⁸ Leydi ndin fudinante bulle e kebbe. A jaamay ko fudi e buruure. ¹⁹ A bīiray lakkere ka tiinde maa si jaamaa haa ruttodaan e ndii leydi ndi yaltudaa e mun, ko fii ko a mballaari, a yiltoto wontaa mballaari.»

²⁰ Gorko on inni debbo mun on innde, o inni mo Hawaa, ko fii ko kanko woni neene yimbe ben fow. ²¹ Alla Joomiraado on wadani Aadama e Hawaa conci guri, o borni bē.

²² Alla Joomiraado on daali: «Awa e hino, aaden wa'ii wa goddo e men, andugol ko moyyī e ko boni. Jooni haden mo fawugol jungo e hoore ngal leggal ngurndan, sakko o jaama ngal, o wuura haa poomaa.» ²³ Joomiraado on yaltini on aaden ka tutateeri Adni, fii yo o golloy e leydi ndi o ittaa e mun ndin. ²⁴ Bay o radike on aaden, o joddini *serubiinaaji ka funnaange tutateeri, e kaafa yiltondirayka, wuttayka dende yiite, ko ayna laawol leggal ngurndan ngal, hara hay gooto hewtaali don.

Fii Qaayiina e Haabiila

4¹ Aadama yiidi e Hawaa beyngu mun, on yetti reedu, jibini *Qaayiina, o wi'i: «Mi jibinii booboo gorko e dow ballal Joomiraado on.»² Watti e dun, o jibini Haabiila mijan Qaayiina. Haabiila wonti aynoowo dammi, Qaayiina kajun nangi demal.

³ Bay neebii, Qaayiina itti sadaka e ko o to'i kon, o yedi Joomiraado on.⁴ Haabiila kajun yedi Joomiraado on tale burde fayude den ka dammi makko dikkuruuji. Joomiraado on [jabi] ngal dokkal Haabiila, o weltori,⁵ kono Joomiraado on jabidaano Qaayiina e [sadaka] mun on. Qaayiina monii fota fii dun, yeeso makko ngon niibbiti.

⁶ Joomiraado on landii Qaayiina: «E ko fii hondun monanidaa, yeeso maa ngon niibbitiri nii?⁷ Si tawii ko ko moyýi wadudaa, a bantay hoore. Kono si tawii hinaa ko moyýi, haray junuubu no yobii ka dambugal maa, no hebulani-maa. Kono an foolu on junuubu.»

⁸ Ontuma Qaayiina noddi mijan mun Haabiila, o wi'i mo: «Mahan yaaden ka buruure.» Bay be hewtoyii ka buruure ton, Qaayiina yani e mijan mun, o warimo.

⁹ Joomiraado on landii Qaayiina: «E ko honto mijan maa Haabiila woni?»

O jaabii: «Mi andaa, kaa hara ko min halfinaa aynugol mijan an?»

¹⁰ Ontuma Allaahu on daali: «Ko hondun wadandaa dun? Yiiyan mijan maa dan no wullude e an. Hawa majjan no iwtiranammi ka leydi.¹¹ Jooni mi hudii ma, mi radike ma e ndii leydi ontundi hunduko mun, yari dan yiiyan mijan maa e juude maa.¹² Si a remii, leydi ndin moyýintaa toore maa nden hande kadi, a wonay jindoowo wembiido ka aduna.»

¹³ Qaayiina wi'i Joomiraado on: «Ndii njoddi dee kuude an no teddanimmi.

¹⁴ Hande a radike lan e ndii leydi. Mi wonay suudotoodo ma, mi wona jindoowo wembiido e oo aduna. Kala hendiido lan waray lan.»

¹⁵ Joomiraado on daalani mo: «Hinaa non! Kala wardo Qaayiina yottorte dun laabi jeedidi.» Ontuma Joomiraado on wadi maande e Qaayiina fii kala yi'udo mo wota waru mo. ¹⁶ Ontuma Qaayiina pottitii takko Joomiraado on, o yahi, o hodoyi e ndii leydi wi'eteendi Nuudu, ka funnaange Adni.

Fii Jurriya Qaayiina on

¹⁷ Qaayiina yiidi e beyngu mun, be jiidii biddo gorko, be inni mo Hanuuka. Ko fewndo onsay o sinci saare, o innitiri nden saare on biddo makko wi'eteedo Hanuuka. ¹⁸ Hanuuka dajanaa Iraadu, Iraadu dajanaa Mahuuyaa'iila, Mahuuyaa'iila dajanaa Matuusaa'iila, Matuusaa'iila dajanaa Laamaka.

¹⁹ Laamaka yetti rewbe dido, arano on no wi'ee Aadatu, dimmo on no wi'ee Sillatu. ²⁰ Aadatu jibinani mo Yaabaala, ko on woni maamaajo ben daakotonooбе e cuuroy bagi no ayna gureele. ²¹ Mijan makko ko Yuubaala innetee, ko on woni maamaajo kala namakalaabe, hodoobe hoddu e wuttoobe ceri. ²² Sillatu kajun jibini Tuubaala-Qaayiina, on tafaynoodo kala aalaaji njandi maa sila. Bandiraawo Tuubaala-Qaayiina on no wi'ee Naamatu.

²³ Laamaka noddi rewbe mun ben, o wi'i be: «Ko an, yo Aadatu e Sillatu, jentee lan. Yo onon rewbe Laamaka, heditee kongudi an din. Mi warii sagataa barmindo lan, on suka gaajudo lan. ²⁴ Si warugol Qaayiina ko wonkiji jeedidi yobirtee, haray ko wonkiji cappande jeedidi e jeedidi wardo Laamaka yobata.»

²⁵ Aadama yiidi e beyngu mun kadi, on jibinani mo biddo gorko. O inni mo Siita, e wi'i Hawaa: «Allaahu on okkii lan biddo goo, lonto Haabiila, mo Qaayiina warunoo on.» ²⁶ Siita kajun kadi dajanaa biddo gorko, o inni on Anuusa. Ko e ngun jamaanu yimbe ben fuddii jantaade innde Joomiraado on.

Gila e Aadama haa e Nuuhu

5 ¹E hino taariika iwdi Aadama ndin:

Fewndo Allaahu on tagi aaden, o wadi mo wa sugu makko kanko Alla. ²O tagi ɓe gorko e debbo, o wadi barki e mabbe. Nande o tagi ɓe, o inni ɓe aaden.

³Ko ka Aadama hebi don duubi teemedere e cappande tati, o dajanaa boobo gorko sugu makko e nando makko, o inni on Siita. ⁴Bawto Siita jibineede, Aadama wuuri duubi teemedde jeetati, o dajanaa bibbe goo, worbe e rewbe.

⁵Ngurndan Aadama dan fow hawri duubi teemedde jeenay e cappande tati, onsay o faatii.

⁶Ko ka Siita hebi don duubi teemedere e jowi, o dajanaa biddo gorko, on no wi'ee Anuusa. ⁷Bawto Anuusa jibineede, Siita wuuri duubi teemedde jeetati e jeedidi, o dajanaa bibbe goo, worbe e rewbe. ⁸Ngurndan Siita dan fow hawri duubi teemedde jeenay e sappoo e didi, onsay o faatii.

⁹Ko ka Anuusa hebi don duubi cappande jeenay, o dajanaa biddo gorko, on no wi'ee Kiinaana. ¹⁰Bawto Kiinaana jibineede, Anuusa wuuri duubi teemedde jeetati e sappoo e jowi, o dajanaa bibbe goo, worbe e rewbe. ¹¹Ngurndan Anuusa dan fow hawri duubi teemedde jeenay e jowi, onsay o faatii.

¹²Ko ka Kiinaana hebi don duubi cappande jeedidi, o dajanaa biddo gorko, on no wi'ee Mahalaliila. ¹³Bawto Mahalaliila jibineede, Kiinaana wuuri duubi teemedde jeetati e cappande nay, o dajanaa bibbe goo, worbe e rewbe.

¹⁴Ngurndan Kiinaana dan fow hawri duubi teemedde jeenay e sappo, onsay o faatii.

¹⁵Ko ka Mahalaliila hebi don duubi cappande jeegoo e jowi, o dajanaa biddo gorko, on no wi'ee Yaarada. ¹⁶Bawto Yaarada jibineede, Mahalaliila wuuri duubi teemedde jeetati e cappande tati, o dajanaa bibbe goo, worbe e rewbe.

¹⁷Ngurndan Mahalaliila dan fow hawri duubi teemedde jeetati e cappande jeenay e jowi, onsay o faatii.

¹⁸ Ko ka Yaarada hebi don duubi teemedere e cappande jeegoo e didi, o dajanaa biddo gorko, on no wi'ee Hanuuka. ¹⁹ Bawto Hanuuka jibineede, Yaarada wuuri duubi teemedde jeetati, o dajanaa bibbe goo, worbe e rewbe. ²⁰ Ngurndan Yaarada dan fow hawri duubi teemedde jeenay e cappande jeegoo e didi, onsay o faatii.

²¹ Ko ka Hanuuka hebi don duubi cappande jeegoo e jowi, o dajanaa biddo gorko, on no wi'ee Matuusaalaha. ²² Bawto Matuusaalaha jibineede, Hanuuka wuuri duubi teemedde tati e hoore himo jokkinoo e Alla. ²³ Ngurndan Hanuuka dan fow hawri duubi teemedde tati e cappande jeegoo e jowi. ²⁴ Hanuuka jokkii e Alla, ontuma o muti, ko fii Allaahu on yentinno mo.

²⁵ Ko ka Matuusaalaha hebi don duubi teemedere e cappande jeetati e jeedidi, o dajanaa biddo gorko, on no wi'ee Laamaka. ²⁶ Bawto Laamaka jibineede, Matuusaalaha wuuri duubi teemedde jeedidi e cappande jeetati e didi, o dajanaa bibbe goo, worbe e rewbe. ²⁷ Ngurndan Matuusaalaha dan fow hawri duubi teemedde jeenay e cappande jeegoo e jeenay, onsay o faatii.

²⁸ Ko ka Laamaka hebi don duubi teemedere e cappande jeetati e didi, o dajanaa biddo gorko. ²⁹ O inni on Nuuhu, himo wi'a, «Oo doo addanay en newaare e nder dee golle men e kii yangi demal juude men ndii leydi ndi Joomiraado on hudi.» ³⁰ Bawto Nuuhu jibineede, Laamaka wuuri duubi teemedde jowi e cappande jeenay e jowi, o dajanaa bibbe goo, worbe e rewbe. ³¹ Ngurndan Laamaka dan fow hawri duubi teemedde jeedidi e cappande jeedidi e jeedidi, onsay o faatii.

³² Ka Nuuhu hebunoo duubi teemedde jowi don, o dajanaa Saama e Haama e Yaafasa.

Sabu Wadugol Waamere nden

6¹ Bay yimbe ñen fuddike duudude ka hoore leydi, tawi kadi hibe jibinaneede jiwbe.² Tagaaße Alla ñen^a ndaari tawi ñen jiwbe, ñe ñen yimbe dajji, no labaa. Be subii e hakkunde ñen jiwbe, rewbe yeru ko ñe faalaa kon.³ Ontuma Joomiraado on daali: «Ruuhu an on wondataa e neddanke haa poomaa, ko fii on neddanke ko 6andu maayooru. Hande kadi duubi makko din feyataa duubi teemedere e noogay.»

⁴ Fewndo on saa'i, tawi yimbe juutube no woodunoo ka hoore leydi, haa yeeso dun buy, dun ko fewndo bee tagaaße Alla resi ñen jiwbe, ñen jibinani ñe. Ko ñen wonnoo dolnube ñen baawo doo, nantunoobe innde fewndo on saa'i.

⁵ Joomiraado on ndaari tawi bone neddanke on tiidii ka hoore leydi, ñande woo ñande anniyeernde neddanke nden ko ko boni tun mijotoo.⁶ Joomiraado on ninsi ko tagannoo neddanke e hoore ndii leydi, dun metti mo ka bernde.⁷ O daali: «Mi mulay neddanke mo mi tagi on e hoore ndii leydi, gila e aaden haa e daabeeji din e kala ko daasotoo e colli din ka weeyo, ko fii mi ninsii ko mi tagannoo dun.»⁸ Kono Nuuhu kajun hebi sulfu yeoso Joomiraado on.

Taariika Nuuhu e fii Waamere nden

⁹ E hino taariika Nuuhu kan:

Nuuhu ko aaden feewunoodo mo felnaaki e fewndo jamaanu makko ngun. Tawi Nuuhu no jokkinoo e Alla.¹⁰ Himo danunoo biibbe tato, ñen ko Saama e Haama e Yaafasa.

¹¹ Hari aduna on ko boyliido yeoso Alla, himo heewunoo hunyeendi.¹² Allaahu on ndaari tawi aduna on boylike, aduna on fow ko boylaare jokki ka hoore leydi.

¹³ Ontuma Allaahu on daalani Nuuhu: «Mi hoddirii mulugol yimbe ñen fow, ko fii ñe hebbinii hunyeendi e aduna on. Jooni mi muliday ñe e leydi ndin.¹⁴ Moyýinan

^a6.2 «Tagaaße Alla ñen» doo no faamora kadi wa kammuyankeebé maa iwdi Siita.

hoore maa laana njanduka, moyyiniraa ka ngal leggal wi'eteengal gofer, wadanaa ka konkooji konkooji, meltiraa ka ndole nder e baawo.¹⁵ E hino no moyyinirtaa ka: junndi makka on wona sogone teemedde tati, yanji makka on sogone cappande jowi, tooweendi makka on sogone cappande tati.^{b16} A wadanay ka warjnakere, accaa yeru sogonal hakkunde niwre nden e gaabaade makka on. Wadiraan baafal ngal sengo. Wadaa ka fow dagge tati, gonngal ley, gonngal hakkunde, ngala dow.¹⁷ Min mi accitay waamere ndiyan e hoore oo aduna ko mula kala ko wondi e wonkii ka ley kammu doo. Onsay kala ko woni ka leydi doo maayay.¹⁸ Kono an, mi yettoday e maa ahadi. A naatay ka laana, an e bïbïe maa ben e beyngu maa, wondude e rewbe bïbïe maa ben.

¹⁹ «A naadoray ka laana ton kala noone mummunte wuuruudun, ka bee didoy, gorun e deyun, fii yo dun wuuriidu e maa.²⁰ Gila e colli din, di bee e noone mun, hebi e daabeeji din, di bee e noone mun, haa e ko daasotoo kon, ko bee e noone mun, aray e maa didoy didoy, fii no wuuriira.²¹ An a yettay kala ko jaametee, maritoraa fii yo dun wonanoy on jaametee, onon e majje.»

²² Nuuhu wadi dun, o wadiri wano Allaahu on yamiriri mo non.

Fii no Nuuhu Naatiri ka Laana

7¹ Joomiraado on daalani Nuuhu: «Naatu ka laana, an e beynguure maa nden fow, ko fii mi taw an ko a feewudo yeeso an e nder nguu jamaanu doo.² Yettu e mummunteeji dagiidi din, gori jeedidi e deyi jeedidi. Yettaa kadi didi e mummunteeji di dagaaki din, gorun e deyun.³ Yettaa kadi e colli din, gori jeedidi e deyi jeedidi, fii yo bïbïe majji on wuuru ka hoore leydi.⁴ Ko fii si balde jeedidi feyyii, mi saayinay ndiyan e nder balde cappande nay, jemma e jalorma, ko mula kala ko mi tagi ka hoore leydi doo.»

⁵ Nuuhu wadi kala ko Joomiraado on yamiri mo kon.

^b6.15 Sogone didi ko meeter gooto hawrata.

⁶Wa fewndo waamere nden wadi ka hoore leydi, hari Nuuhu ko mo duubi teemedde jeegoo. ⁷Nuuhu naati ka laana, wondude e bibbe makko ben, e beyngu makko, e rewbe bibbe makko ben, sabu ndiyan waamere nden. ⁸Kala mummunteeji dagiidi e di dagaaki, wondude e colli din, e kala ko daasotoo ka hoore leydi, ⁹din ari tawi Nuuhu ka nder laana, di naatiri didi didi ka bee gorun e deyun, wano Allaahu on yamirirnood Nuuhu non. ¹⁰Balde jeedidi bawto dun, waamere ndiyan nden wadi e hoore leydi ndin.

¹¹E hitaande ka Nuuhu hebaynood don duubi teemedde jeegoo, jande sappoo e jeedidi lewru dimmuru ndun, ko nden jande bulli maaje ndiyan ley-leyjan dan fow bullitii, dambude kammu ngun udditii. ¹²Ndiyan dan saayi ka hoore leydi balde cappande nay, jemma e nalorma.

¹³Ko e nden jalaande nde ndiyan dan fuddinoo saayude tigi, Nuuhu e bibbe mun ben, dun ko Saama e Haama e Yaafasa, wondude e beyngu makko e rewbe bibbe makko ben tato naati ka laana, ¹⁴wondude e mummunteeji din fow, ka bee e noone mun: daabeeji din fow, di bee e noone mun, e kala ko daasotoo ka leydi, ka bee e noone mun, e colli din fow, ka bee e noone mun, e kala ko wiirata, ko wondi e gabitti. ¹⁵E nder kala ko tagaa, ko wondi e wonkii, ari e Nuuhu ka laana, ka bee didoy didoy, ¹⁶koy ardi gorun e deyun, e nder kala ko tagaa naati ka laana wano Allaahu on yamirirnood Nuuhu non. Ontuma Joomiraado on ombi baafal laana kan e hoore makko.

¹⁷E nder balde cappande nay ndiyan dan no beydaade ka hoore leydi, dan duudi haa dan towni laana kan ka leydi, ka humbi. ¹⁸Dan beydii fota ka hoore leydi haa laana kan humbi ka hoore ndiyan. ¹⁹Ndiyan dan burti duudude haa pelle njane den fow ka ley kammu doo muti. ²⁰Ndiyan dan mutini pelle den haa dan feyitor de embere sogone sappoo e jowi.

²¹ Kala ko tagaa ko jindaynood ka hoore leydi maayi, gila e colli din, nabi e daabeeji din, haa e mummunteeji din, e kala kulloy layaykoy e hoore leydi ndin, wondude e yimbe 6en fow. ²² Kala ko mari foofaango ngurndan ka kine mun ka hoore leydi maayi. ²³ Allaahu on muli kala ko woni ka hoore leydi, gila e neddanke, haa e daabeeji din e ko daasotoo kon e colli din ka weeyo. O mulidi di fow ka hoore leydi doo. Ko heddinoo woo ko Nuuhu e ko o wondunoo e mun ka laana kon. ²⁴ Ndiyan dan mutini leydi ndin e nder balde teemedere e cappande jowi.

Fii Lannoode Waamere nden

8 ¹ Ko fewndo onsay, Allaahu on anditi Nuuhu e mummunteeji e daabeeji di o wondunoo din fow ka laana. O immini hendu e leydi ndin, ndiyan dan fuddii duytaade. ² Bulli maaje ndiyan ley-leyjan dan uddii, dan acci bullitaade. Dambude kammuuli din kadi uddii, ndiyan dan acci saayfude. ³ Ndiyan dan beebei seedsa seedsa ka hoore leydi. E nder balde teemedere e cappande jowi tawi ndiyan dan duytike. ⁴ Nande sappoo e jeedidi lewru jeedidaburu ndun, laana kan darii e dee pelle wi'eteede Araarata. ⁵ Di'e den duytori non seedsa seedsa haa ka lewru sappaburu. Nande go'o lewru sappaburu ndun, ko'e pelle den yi'ii.

⁶ Balde cappande nay bawto dun, Nuuhu udditi damun tosokun kun^c o wadannoo laana kan kun, ⁷ o acciti kaya-kayaaru. Ndu wadi don yaha yiltoo haa nde ndiyan dan beebeuno. ⁸ O acciti kadi gabooru, ndaarugol si ndiyan dan beebei ka hoore leydi. ⁹ Kono ndu hebaali ka ndu joodoo. Onsay ndu arti ka laana, ndu tawti mo, bay hari ndiyan dan no dewi e hoore leydi ndin fow. Onsay o fonti jungo, o nangi ndu, o naaditi ka nder laana.

¹⁰ O sabbii kadi balde jeedidi bawto dun, o acciti fahin gabooru ndun. ¹¹ Bay ndu yahii, ndu artoyde woo kiikiide, tawi hindu maddii kaakol zaytuuni keccol. Ko

^c8.6 «Damun tosokun» ko ko wi'ete «fineeter» kon fewndo doo.

dun andini Nuuhu wondema ndiyan dan ɓeebii ka hoore leydi.¹² O sabbitii fahin balde jeedidi kadi. Onsay o acciti ndun gabooru. Ndu yahi, ndu artitaali ndu tawti mo hande kadi.

¹³ Nande go'o lewru aranuru hitaande nden, ka Nuuhu hebaynoodon duubi teemedde jeegoo e go'o, hawrondiri e ɓeebugol ndiyan dan ka hoore leydi. Onsay Nuuhu itti niwre laana kan, o tawi leydi ndin yoorii. ¹⁴ Nande noogay e jeedidi lewru dimmuru ndun, tawi leydi ndin lannii yoorude.

¹⁵ Onsay Allaahu on daalani Nuuhu, wi'i: ¹⁶ «Yaltu ka laana, an e ɓeyngu maa e ɓibbe maa ben wondude e rewbe ɓibbe maa ben. ¹⁷ Yaltinoraa noone mummunteeji di wondudaa e mun din fow, gila e colli din haa e daabeeji din e kala ko daasotoo ka hoore leydi, fii no di layira, di rima, di duuda ka hoore leydi.»

¹⁸ Nuuhu yalti, yaltidi e ɓibbe mun ben e ɓeyngu mun e rewbe ɓibbe mun ben. ¹⁹ Wano non kadi, mummunteeji din fow e kala ko daasotoo, wondude e colli din fow e kala ko jindata ka hoore leydi, kun kala e kun jeydi, yaltidi ka laana.

²⁰ Nuuhu moyýinani Joomiraado on layyorde, o yetti goddi e mummunteeji dagiidi din fow e colli dagiidi din fow, o wadani don Joomiraado on sadakaaji sunneteedi. ²¹ Ngol urngol welngol uuri Joomiraado on. O wi'itii ka bernde makko: «Hande kadi mi huditataa leydi ndin sabu neddanke, bay anniyeer bernde neddanke ko ko boni gila e cukankaaku makko. Hande kadi mi halkataa kala ko wuuri, wano mi warrunoo nii. ²² Yeru aduna on lannaali, setto e dabbunde, jaangol e nguleendi, ndungu e ceedu, jemma e nalorma lannataa.»

Fii Ahadi ndi Allaahu on Yettannoo Nuuhu ndin

9 ¹ Allaahu on wadi barki e Nuuhu e ɓibbe mun ben, o daalani ɓe: «Hebee ɓibbe, duudon, hebbinon aduna on. ² Kala kulle ka hoore leydi doo e kala colli weeyo e kala ko daasotoo ka hoore leydi wondude e liyýi din fow ka ndiyan, hulay on kulol tiifungol. Din fow wattaama e juude mon. ³ On okkaama kala ko wuuri, ko

memminotoo, fii ko jaamon. Wano mi okkirnoo on non kala ko fudi, mi okkii on fow.⁴ Kono wota on jaamu teewu wondungu e ngurndan mun, dun ko yiyan mun dan.⁵ Pellet mi yantay yiyan mon dan fii ngurndan mon dan: mi yanta dan e juude kala ko wuuri ko itti wonkii, mi yanta dan e juude kala neddo ittudo wonkii. Ko e juude kala neddo ittudo wonkii dimmo mun, mi yantata dan.⁶ On mo hibbi yiyan neddanke, kanko kadi ko neddanke hibbata yiyan makko dan, ko fii Alla wadii neddanke wa nando makko.⁷ Onon non, hebee bibbe, duudon, layon e aduna on, duudon e nder makko.»

⁸ Allaahu daalidani Nuuhu e bibbe mun ben, wi'i: ⁹ «Min, mi yettoday e mon ahadi an ndin, onon e jurriya mon aroyoowo baawo mon on,¹⁰ wondude e kala ko mari wonkii, ko wondi e mon: colli din woo, daabeeji din woo, e kala mummunteeji aduna di wondudon e mun, dun ko gila e ko yaltidudon e mun ka laana kon fow haa e kala mummunte wondo ka aduna.¹¹ Mi yettanii on ahadi an ndin. Hande kadi, kala ko tagaa mulirtaake ndiyan waamere, awa kadi waamere waditataa hande kadi ko mula aduna on.»

¹² Allaahu on daali: «E hino maande ahadi ndi mi wadi ndin hakkunde an e mon e kala ko wondi e wonkii ko wondudon e mun haa e jamaanuuji aroyaydi din fow:¹³ Mi yowii yaroowol an ndiyan ngol ka duule fii ko wona maande ahadi hakkunde an e aduna on.¹⁴ Nde mi wadi duule den ka weeyo woo, yaroowol ndiyan ngol yalti ka duule,¹⁵ mi anditay ahadi an ndi mi wadi ndin hakkunde an e mon e kala ko tagaa ko wondi e wonkii, dun ndiyan dan wontataa hande kadi waamere sakko dan mula kala ko tagaa.¹⁶ Tuma yaroowol ndiyan ngol yaltiti ka duule woo, mi yi'i ngol, mi anditay ahadi an poomayankeeri ndi mi wadi hakkunde an e kala ko tagaa ko wondi e wonkii ka aduna.»

¹⁷ Allaahu on daalani Nuuhu: «Ko dundoo woni maande ahadi ndi mi wadi hakkunde an e kala ko tagaa ko woni ka hoore leydi.»

Fii Jurriya Nuuhu on

¹⁸ Bibbe Nuuhu, wonnoobe ka laana ben, ko Saama e Haama e Yaafasa. (Ko Haama woni ben Kanaana.) ¹⁹ Ko bee tato woni bibbe Nuuhu ben, ko jurriya mabbe on saakitii e aduna on fow.

²⁰ Nuuhu fuddii remude, o tuti wiiju. ²¹ O yari njaram wiiju haa o mandili, o wirtii ka nder suudu makko. ²² Bay Haama, ben Kanaana, yi'ii ko ben mun wirtii kon, o yeetii dun ben-gootoobe makko wonnoobe ka yaasi ben dido. ²³ Onsay Saama e Yaafasa yetti suddaare, be wadi nde ka balbe mabbe, be yaari bawre-bawre haa be waanoyi nde ben mabbe. Laatii be yi'aali ko ben mabbe wirtii kon, bay hari hibe hucci.

²⁴ Bay Nuuhu finii battane doyngol njaram makko dan, o humpitii ko toolaajo makko on wadi mo kon. ²⁵ O wi'i: «Yo kuddi wonan Kanaana! Yo o wonan ben-gootoobe makko ben maccudo maccube.»

²⁶ O wi'i kadi: «Yo mantoore wonan Joomiraado on, on Alla Saama! Yo Kanaana wonu maccudo Saama. ²⁷ Yo Allaahu on yanju fii Yaafasa, yo o hodu e nder galleeji Saama, yo Kanaana wonu maccudo makko.»

²⁸ Nuuhu wuuri bawto waamere nden duubi teemedde tati e cappande jowi.

²⁹ Ngurndan Nuuhu dan fow hawri duubi teemedde jeenay e cappande jowi, onsay o faatii.

Fii Leyyi Aduna on

10¹ E hino jurriya bibbe Nuuhu ben tato, dun ko Saama e Haama e Yaafasa. Ben dajanano bibbe bawto waamere nden.

Fii Bibbe Yaafasa ben

² Bibbe Yaafasa ben ko Guumaru e Maajuuja e Maadaa'i e Yaawaana e Tuubaala e Maasaka e Tiiraasa.

³ Bibbe Guumaru ben ko Askanaazu e Riifatu e Tugarma.

⁴ Bibbe Yaawaana ben ko Alasiya e Tarsiisu e Kitiankeebe ben e Dodaaniyankeebe ben. ⁵ Ko e mabbe bee yimbe hodube ka sera baharu iwi, senditii e leyde jamaaji din, mo bee e haala mun, lejol kala hodidi e bolondaa mun ka leydi mun.

Fii Bibbe Haama ben

⁶ Bibbe Haama ben ko Kuusu e Misira e Fuutu e Kanaana.

⁷ Bibbe Kuusu ben ko Sebaa e Hawila e Sabta e Ra'ama e Sabtekaa. Bibbe Ra'ama ben ko Sabaa e Dedaanu.

⁸ Kuusu kadi dananaa Numuruudu. Ko on fuddii wonude jooma kutu ka hoore leydi. ⁹ O wonno dannaajo mawdo yeeso Joomiraado on. Ko dun wadi si no wi'ee: Kaari no wa'i wa Numuruudu, dannaajo mawdo yeeso Joomiraado on. ¹⁰ Fuddoode laamateeri makko ndin ko Baabiila e Araka e Akkada e Kalna, dun ko e nder leydi Sin'aara ndin. ¹¹ Bay o iwii e ndin leydi o yahi Asuura, o sincoyi Niinawa e Rahubuutira e Kaalaha, ¹² e Rasana, ndee saare mawnde wonde hakkunde Niinawa e Kaalaha.

¹³ Ko Misira woni maamaajo Luudiyankeeben e Anaamiyankeebe ben e Lehaabiyankeeben e Naftuuhiyankeebe ben ¹⁴ e Fatruusiyankeeben e Kasluuhiyankeebe ben, be Filistiyankeeben iwi e mun, e Kaftuuriyankeebe ben.

¹⁵ Kanaana dananaa Siduunu, ko on woni dikkuru makko ndun, o dananaa kadi Hissi, ¹⁶ ko kanko kadi woni maamaajo Yebuusiyankeeben e Amoriyankeebe ben e Girgaasiyankeebe ben ¹⁷ e Hiwiyankeeben e Arqiyankeeben e Siiniyankeebe ben, ¹⁸ e Arwaadiyankeebe ben e Jamariyankeebe ben e Hamaatiyankeebe ben.

Bawto dun, bolondaaji Kanaaniyankeebe ben saakitii. ¹⁹ Keeri Kanaaniyankeebe ben ko gila Siduuna haa Gaaza telen Garaara, e telen-ma Saduma e Amuura e

Aduma e Sabuyiima haa hewti Laasa.²⁰ Ko bee doo woni bïbbe Haama ïen, be bee e bolondaaji mun e haalaaji mun e leyde mun e jamaaji mun.

Fii Bïbbe Saama ïen

²¹ Saama dajanaa bïbbe. Ko kanko woni maamaajo bïbbe Aabira ïen fow. Ko Yaafasa woni kotoo makko.²² Bïbbe Saama ïen ko Iilaama e Asuuru e Arfaksaada e Luuda e Araama.

²³ Bïbbe Araama ïen ko Uusa e Huula e Gaatara e Maasa.

²⁴ Arfaksaada dajanaa Saalaha, Saalaha kadi dajanaa Aabira.

²⁵ Aabira kajun kadi dajanaa bïbbe dido. Goddo on ko Faalaja wi'etee, ïay ko e fewndo makko leydi ndin sendanoo. Mijnan makko no wi'ee Yuqtaana.

²⁶ Yuqtaana dajanaa Almodaada e Saalafa e Hajar-Mawta e Yaaraha²⁷ e Haduraama e Uujala e Diqla²⁸ e Uubala e Abiimayiila e Sabaa²⁹ e Uufira e Hawiila e Yuubaaba. Bee doo fow ko bïbbe Yuqtaana.³⁰ Ben hoduno gila Meesaa, telen Sefaara, haa e dee pelle funnaange.

³¹ Ko bee doo woni bïbbe Saama ïen, be bee e bolondaaji mun e haalaaji mun e leyde mun e jamaaji mun.

³² Ko bee doo woni bolondaaji bïbbe Nuuhu ïen, mo kala e iwdi mun ka jamaaji mun. Ko e mabbe jamaaji din iwi, senditii e hoore leydi ndin bawto waamere nden.

Fii Suudu Towindiraandu ndun Baabiila

11 ¹Hari aduna on fow ko haala woota e kongudi gooti wowlata. ²E nder eggudu mabbe funnaange, be ari e Hollaande e nder leydi Sin'aara, be hodî don. ³Be yewtidi, be wi'i: «Mahen, piyen tuufe, juden de haa moyfa.» Be huutori tuufe lonto kaaye e ndole lonto loope. ⁴Ontuma be wi'i: «Mahen moyyinanen hoore men saare, darnen suudu, waden koore towindiraado haa ka kammu. Dabbanen hoore men innde, fii wota en saakite e hoore leydi ndin fow.»

⁵ Kono Joomiraado on tippii fii ndaarugol nden saare e ndun suudu towindiraandu ndu Banii-Aadama moyyini. ⁶ Ontuma Joomiraado on daali: «Ndaarii jamaa gooto wowloobe haala woota. E hino ko ɓe fuddii wadude kon, awa haray ɓe ronkataa wadude kala ko ɓe ebbei. ⁷ Jooni non tippoden, jiibindiren haala mabbe kan ton, fii wota ɓe nantondir e haala.»

⁸ Ontuma Joomiraado on saakiti ɓe don e hoore leydi ndin fow, ɓe acciti darnugol nden saare. ⁹ Ko wadi si nden nokkuure innaa Baabiila, ko fii ko don Joomiraado on jiibindirnoo haala yimbe aduna on fow, o saakiti ɓe e hoore aduna on fow.

Fii Jurriya Saama on

¹⁰ E hino jurriya Saama on:

Ko ka Saama hebi don duubi teemedere, o dajanaa Arfaksaada, dün ko duubi didi baawo waamere nden. ¹¹ Bawto Arfaksaada jibineede, Saama wuuri duubi teemedde jowi, o dajanaa bibbe goo, worbe e rewbe.

¹² Ko ka Arfaksaada hebi don duubi cappande tati e jowi, o dajanaa Saalaha.

¹³ Bawto Saalaha jibineede, Arfaksaada wuuri duubi teemedde nay e tati, o dajanaa bibbe goo, worbe e rewbe.

¹⁴ Ko ka Saalaha hebi don duubi cappande tati, o dajanaa Aabira. ¹⁵ Bawto Aabira jibineede, Saalaha wuuri duubi teemedde nay e tati, o dajanaa bibbe goo, worbe e rewbe.

¹⁶ Ko ka Aabira hebi don duubi cappande tati e nay, o dajanaa Faalaja. ¹⁷ Bawto Faalaja jibineede, Aabira wuuri duubi teemedde nay e cappande tati, o dajanaa bibbe goo, worbe e rewbe.

¹⁸ Ko ka Faalaja hebi don duubi cappande tati, o dajanaa Ra'uwa. ¹⁹ Bawto Ra'uwa jibineede, Faalaja wuuri duubi teemedde didi e jeenay, o dajanaa bibbe goo, worbe e rewbe.

²⁰ Ko ka Ra'uwa hebi don duubi cappande tati e didi, o dajanaa Seruuja. ²¹ Bawto Seruuja jibineede, Ra'uwa wuuri duubi teemedde didi e jeedidi, o dajanaa bibbe goo, worbe e rewbe.

²² Ko ka Seruuja hebi don duubi cappande tati, o dajanaa Naahuura. ²³ Bawto Naahuura jibineede, Seruuja wuuri duubi teemedde didi, o dajanaa bibbe goo, worbe e rewbe.

²⁴ Ko ka Naahuura hebi don duubi noogay e jeenay, o dajanaa Taaraha. ²⁵ Bawto Taaraha jibineede, Naahuura wuuri duubi teemedere e sappoo e jeenay, o dajanaa bibbe goo, worbe e rewbe.

²⁶ Ka Taaraha hebunoo duubi cappande jeedidi don, o dajanaa Abraama e Naahuura e Haaraana.

Fii Jurriya Taaraha on

²⁷ E hino jurriya Taaraha on:

Taaraha dajanaa Abraama e Naahuura e Haaraana. Haaraana kadi dajanaa Luutu.

²⁸ Haaraana faatii ka o jibinaa don fewndo ngurndan ben makko Taaraha, dun ko ndee saare Kaldiyankeebi wi'eteende Uuru. ²⁹ Abraama e Naahuura resi rewbe. Beyngu Abraama no wi'ee Saaray, beyngu Naahuura no wi'ee Milkatu mo Haaraana, dun ko ben Milkatu e Yiskatu. ³⁰ Tawi Saaray wonaa jiidotoodo, o alaa biddo.

³¹ Taaraha yetti Abraama biddo mun on e Luutu taaniraawo makko on, dun ko biddo Haaraana on, e Saaray esiraawo makko on, dun ko beyngu Abraama biddo makko on. Be yaltidi e nden saare Kaldiyankeebi wi'eteende Uuru, be fokkiti e ndii leydi wi'eteendi Kanaana. Kono bay be hewtii e ndee saare wi'eteende Haraana, be hodi don. ³² Ka Taaraha hebunoo don duubi teemedde didi e jowi, o faatii e ndee saare wi'eteende Haraana.

Fii no Abraama Toddoraa Barkinoreede

12¹Joomiraado on daalani Abraama: «Yaltu ka leydi maa e ka bolondaa maa e ka galle ben maa, yahaa haa e leydi ndi mi holloyte.² Mi waday lejol mawngol e maa, mi barkine, mi mawninay innde maa nden, awa kadi a wonay barki.³ Mi waday barki e kala du'aniido ma, mi huday kala hoynudo ma, awa kadi bolondaaji aduna on fow barkinte sabu maa.»

⁴ Abraama yahi wano Joomiraado on daalirani mo non, o yaadi e Luutu. Wa fewndo ka Abraama yaltata Haraana, hari ko mo duubi cappande jeedidi e jowi.

⁵ Abraama yetti beyngu mun Saaray, e Luutu, dun ko biddo mijan makko on, e jawle mabbe den fow wondude e jiyaabe ko be hebi e leydi Haraana kon, be sutanii Kanaana. Be yahi, be hewtoyi leydi Kanaana.

⁶ Abraama rewi e nder leydi ndin haa be hewti Sakiima ka leggal mawngal wonungal Muura ngal woni don. Wa fewndo onsay hari Kanaaniyankeebe ben no e ndin leydi.⁷ Joomiraado on feenani Abraama don, o daalani mo: «Mi yeday jurriya maa on ndii leydi.» Onsay Abraama darnani don on Joomiraado feenando mo layyorde.

⁸ Ontuma o eggi don, o yaari e dee pelle hikkorde funnaange Bayti'iila. O darni suudu makko bagi ndun hakkunde Bayti'iila e Ayyu, Bayti'iila wontirani mo hirnaange, Ayyu wontirani mo funnaange. O wadani don kadi Joomiraado on layyorde, o jantii innde Joomiraado on.⁹ Abraama sotti e nden nokkuure, o sutanii Negeeba, himo wada yaha daakoo.

Fii Kodu Abraama ngun Leydi Misira

¹⁰ Ontuma heege wadi e ndin leydi. Onsay Abraama yahi kodoyii Misira, bay hari heege ngen tiidii e leydi ndin.¹¹ Bay be badike Misira, onsay o wi'i beyngu makko Saaray: «Awa jooni non, mido andi ko a debbo labaado.¹² No Misirayankoobe ben yiiru-maa be wi'ay ko a beyngu an. Onsay be waray lan, an be acca wuuraa.

¹³Kono a wi'ay ɓe ko a bandiraawo an fii yo moyyanan sabu maa, wonkii an kin dada immorde e maa.»

¹⁴Bay Abraama naatii Misira, Misirayankoobe ɓen ndaari tawi debbo on ko tiida-ŋariijo. ¹⁵Bay yeesoobe hikkiibe e Fir'awna ɓen yi'ii on debbo, ɓe yahi, ɓe mananoyi Fir'awna fii makko. Onsay ɓe addi on debbo ka galle Fir'awna.

¹⁶Fir'awna teddini Abraama sabu beyngu makko, Abraama hebi na'i e dammi e mbabbi deyi e gori, wondude e jiyaabe worbe e rewbe, e ngeloodi.

¹⁷Kono Joomiraado on libi nabbeeli tiidudi e Fir'awna, haa e beynguure makko nden, sabu Saaray beyngu Abraama. ¹⁸Onsay Fir'awna noddi Abraama, wi'i mo: «E ko hondun wadudaa mi, ko hondun hadi yeetodaa mi oo ko sonnaajo maa? ¹⁹Ko fii hondun wi'andaa mi oo ko bandiraawo maa, haa mi yetti mo? Jooni non e hino sonnaajo maa on, yettu mo, yahaa!» ²⁰Fir'awna yamiri suufaabe mun ɓen, ɓen watti Abraama e laawol, kanko e beyngu makko e kala ko o jeyi.

Fii no Abraama e Luutu Seediri

13

¹Ontuma Abraama yalti Misira, o sutanii Negeeba, kanko e beyngu makko e Luutu, wondude e kala ko o jeyi. ²Hari Abraama no aldirnoo fota gureele e kaalisi e kaŋje. ³O wadi yaha daakoo gila Negeeba haa Bayti'iila, e ndee nokkuure nde o adinoo darnude suudu makko bagi ndun e mun, hakkunde Bayti'iila e Ayyu, ⁴dun ko ka o adinoo wadande Joomiraado on layyorde don. Kanko Abraama o jantii don innde Joomiraado on.

⁵Luutu yaadunoodo e Abraama on kadi no mari na'i e dammi e cuudi bagi.

⁶Tawi nokkuure nden faadanii ɓe ka ɓe wonda nokkun gootun, ko fii hari jawle mabbe den duudanii ɓe haa ko hadata ɓe kambe dido ɓe wonda. ⁷Yeddondiral wadi hakkunde ngaynaakoobe Abraama ɓen e ngaynaakoobe Luutu ɓen. Tawi fewndo on saa'i ko Kanaaniyankeebe ɓen e Feriiziyankeebi ɓen hodi e ndin leydi.

⁸ Abraama wi'i Luutu: «Wota yeddondiral wonu hakkunde men, maa hakkunde ngaynaakoobe an 6en e ngaynaakoobe maa 6en, ko fii ko en musibbe. ⁹ Wonaa e hino ndii leydi doo fow no waalii yeeso maa? Jooni senditoden: si a yaarii sengo nano, mi yaara ka jaamo, si a yaarii ka jaamo, mi yaara ka nano.»

¹⁰ Onsay Luutu banti gite, o haynii heccidannde Hollaande nden Yurdayniwol fow, tawi nden no wa'i wa tutateeri Joomiraado on, maa wa leydi Misira ndin, telen *Su'aara, (dun ko ado Joomiraado on halkude Saduumma e Amuura). ¹¹ Luutu kajun subii nden Hollaande Yurdayniwol fow, o yaari ka funnaange, ko nii mo kala e mabbe seediri e oya. ¹² Abraama kajun hodí e ndin leydi Kanaana, Luutu kajun hodoyi e dee ca'e wonde e nden Hollaande, o wadoyi cuudi makko bagi din telen Saduumma. ¹³ Tawi 6en yimbe Saduumma ko bonbe, awa kadi ko heewube junuubu yeeso Joomiraado on.

¹⁴ Bay Abraama seedii e Luutu, Joomiraado on daalani mo: «Bantu gite maa den, ndaaraa gila ka wondaa doo nabani funnaange e hirnaange, nano e jaamo, ¹⁵ ko fii mi yedete ndii leydi ndi yi'udaa doo fow, an e jurriya maa on haa poomaa. ¹⁶ Mi duddiniray jurriya maa on wa mbullaari ndin ka leydi, fii si goddo no waawa limude mbullaari ndin ka leydi, haray jurriya maa on no limoo. ¹⁷ Immo, jindaa e ndii leydi, jundi mayri e yanji mayri, ko fii mi yedete ndi.»

¹⁸ Ontuma Abraama sottini cuudi mun bagi din, o wadoyi di takko dee ledse mawde Mamra, dun ko leydi Habruuna. O darnani don Joomiraado on layyorde.

Fii no Abraama Dandiri Luutu

14 ¹ Fewndo bee lambe doo, dun ko Amraafala lando Sin'aara on, e Ariyuuka lando Alasaara on, e Kadar-Lawmaara lando Iilaama on, e Tiddaala lando Guyiima on, ² bee doo fow hawtituno, habidi e bee lambe doo, dun ko Beera lando Saduumma on, e Birsaa lando Amuura on, e Sin'aaba lando Aduma on, e Simibaara lando Sabuyiima on, wondude e oo lando Beela (don no wi'ee kadi Su'aara). ³ Bee

sakkitaabe linteede doo kadi hawtiti, jonnindiri juude ka Hollaande Siddiima, dun ko ka Weendu Ndiyan Landan woni don jooni.⁴ E nder duubi sappoo e didi, tawi hibe e ley koyde Kadar-Lawmaara. Kono ka hitaande sappoo e tatabere, be murti.

⁵ Ka hitaande sappoo e nayabere, Kadar-Lawmaara e lambe be o wondunoo ben habiduno e Refayankeebe ben e ndee nokkuure wi'eteende Astaruuta-Qarnayiima, be fooli be. Be fooli kadi Zuuziyankeebe ben e ndee nokkuure wi'eteende Haama, be fooli Iimiyankeebe ben kadi e ndee nokkuure wi'eteende Sawa-Qiriyatayiima. ⁶ Be fooli kadi Horiyankeebe ben ka pelle mabbe Sa'iira, haa hewtoyi Al-Paraana ka moggo wulaa. ⁷ Ontuma be yiltitii. E nder ko be yiltotoo kon, bay be hewtii Ayna-Misfaata (don no wi'ee kadi Kadeesi), be habidi don e Amalekiyankeebe ben, be foolidi be e leydi mabbe ndin fow, wondude e bee Amoriyankeebe hodube Hasasuuna-Tamaara.

⁸ Onsay lando Saduumma on e lando Amuura on e lando Aduma on e lando Sabuyiima on e lando Beela on (don no wi'ee kadi Su'aara), bee fow mottondiri, yahi e ndee Hollaande Siddiima, be hebulanii habidugol ⁹ e Kadar-Lawmaara lando Iilaama on, e Tiddaala lando Guyiima on, e Amraafala lando Sin'aara on, e Ariyuuka lando Alasaara on. Dun woni ka lambe nayo e lambe njowo dartondirani. ¹⁰ Tawi nden Hollaande Siddiima no heewunoo boyli ndole. Lando Saduumma on e lando Amuura on dogidi e koneeli mun din, wobbe e mabbe yani ka boyli, luttube ben dogiri ka pelle. ¹¹ Foolube ben yetti jawle e jaameteeji ko woni Saduumma e Amuura kon fow, be yahi. ¹² Be yettori kadi Luutu, biddo ben-gooto Abraama on, kanko e jawle makko den fow, be yaadi e mun, bay hari ko Saduumma o hodi.

¹³ Goddo goo fuutii, ari humpiti dun Abraama, oo Aabirayankeejo. Tawi on no hodi takko dee ledde mawde oo Amoriyankeejo wi'eteedo Mamra, kotiraawo Eskuula e Aanira, tawi ben ko yettodube e Abraama ahadi weldigal. ¹⁴ No Abraama

humpitornoo wondema musiddo makko on nangaama, o yetti yimbe teemedde tato e sappoo e njeetato, eltiibe fii hare, hebaabe ka galle makko, o radii be haa Daana.¹⁵ O senditi konu makko ngun jemma, be yani e mabbe. Kanko e konu makko ngun be fooli be, be radii haa Huuba, don no hikkorani Damaasi ka sengo nano.¹⁶ O artiri jawle den fow, o artiri kadi Luutu, musiddo makko on, e jawle mun den, e rewbe ben e yimbe nanganoobe ben fow.

Fii Maaliki-Siddiiqu

¹⁷ Fewndo ko Abraama artata, bay o fooloyii Kadar-Lawmaara e lambe be on wondunoo ben, lando Saduumma on ari fotti e makko e ndee Hollaande wi'eteende Sawa, nden no wi'ee kadi Hollaande Lando.¹⁸ Maaliki-Siddiiqu lando Salaam on ardi e jaameteeji e njaramji. Tawi on ko yottinoowo sadaka ka Alla, Jom Bural on.¹⁹ On du'anii Abraama, o wi'i: «Yo Alla Jom Bural on, on tagudo leydi e kammu, wadu barki e maa.²⁰ Mantoore wonanii Alla Jom Bural on, on wattudo aybe maa ben e jungo maa.»

Onsay Abraama jonni mo sappabun e kala ko o heboyi.

²¹ Lando Saduumma on torii Abraama, o wi'i: «Jonnitan yimbe an ben, an yettaa jawle den.»

²² Abraama jaabii lando Saduumma on, wi'i: «Mi woondirii Alla Jom Bural on, on tagudo leydi e kammu,²³ mi yettataa hay fus e ko jeydaa kon, hay gaarawol maa bokkun habbirkun padal, fii wota a wi'oy: «Ko min aldfini Abraama.»²⁴ Min, fus alanaa lan ton, si hinaa ko yimbe an ben jaami kon, e gebal bee yimbe be mi yaadunoo e mun, d'un ko Aanira e Eskuula e Mamra, bee-le, yo be hendo gebal mabbe ngal.»

Fii Ahadi ndi Joomiraado on Yettani Abraama ndin

15¹ Bay feyfii e dün, Joomiraado daalani Abraama e nder fejninannde, wi'i: «Wota a hulu hay fus, ko min tigi woni hiwitorgo maa ngon, mbarjaari maa ndin no mawni fota.»

² Onsay Abraama jaabii: «Yaa an Alla Joomiraado, ko hondun okkataa mi, mido woniri nii e 6aawo biddo? Ronoowo lan on ko Aliyaasaru jeyaado Damaasi.»

³ Abraama wi'i kadi: «A okkoraali lan jurriya, awa ko kurkotoodo ka galle an ronatammi.»

⁴ Ontuma Joomiraado on daalani mo, wi'i: «Wonaa on mo sikkudaa ronay-maa, kono ko iwdo e keeci maa tigi ronay-maa.»⁵ Joomiraado on yaltini mo ka yaasi, daalani mo: «Jooni tiggito ndaaraa kammu ngun, limaa koode den si tawii hida waawi limude de.» Ontuma o daalani mo kadi: «Ko nii jurriya maa on duudiroyta.»

⁶ Abraama gomdini Alla, Allaahu on jogitorani mo ngal gomdinal makko peewal.

⁷ O daalani mo kadi: «Ko min woni Joomiraado on, on yaltindo ma ka saare Kaldiyankeebé wi'eteende Uuru, fii yedugol ma ndii leydi, haloraa.»

⁸ Onsay Abraama wi'i: «Yaa an Alla Joomiraado, ko honno mi andirta wonde mi haloray ndii leydi?»

⁹ Joomiraado on daalani mo: «Addanan jale tatiiwe e mbeewa mba duubi tati e ngaari baalii ndi duubi tati, e legetereeru e gabooru.»

¹⁰ Abraama addi dün fow, o hirsi, o fecci dì e hakkunde, o wallini pecce den, o fewtindiri, o acci bolun hakkunde majje, kono colli din kajun o feccaano dì.

¹¹ Ontuma jigaaje den jippanii tebbeeli din, Abraama radii de.

¹² Ka mutual naange, doyngol tiidungol yani e Abraama. No o daanornoo, niwre tiidunde hulbiniinde hibpii e makko.¹³ Joomiraado on daalani Abraama: «Andu fota wonde jurriya maa on wonoyay tujaranke e leydi ndi 6e jeyaaka e mun, 6e maccindinoo ton, 6e njaggee e nder duubi teemedde nay.¹⁴ Kono mi naawoyay on

jamaa mo ɓe maccindinanii. Bawto dun, ɓe yaltidoyay don e jawle duudude.

¹⁵ Kono an, a tawtoyay maamaabe maa ɓen e nder buttu, surredaa e nder nayeewu hittungu. ¹⁶ Jurriya maa on artoyay doo ka jamaanu nayabu, ko fii bakkatuji Amoriyankeebe ɓen timmaali taho.»

¹⁷ Bay naange ngen mutii, nibbitii, wolojere wondunde e curki e pitlol yiite yaltiti, rewi hakkunde pecce teewu den. ¹⁸ Ko nden jande Joomiraado on yettani Abraama ahadi, o daalani mo, o wi'i: «Ko jurriya maa on mi yedi ndii leydi, gila e ngoo maayo Misira, haa hewtoyi ka maayo njano Furaatiwol, ¹⁹ dun ko ndii leydi ndi ɓee Kiinayankeebe e ɓee Keniisiyankeebe e ɓee Kadmoniyankeebe ²⁰ e ɓee Hissiyankeebe e ɓee Feriiziyankeebe e ɓee Refayankeebe ²¹ e ɓee Amoriyankeebe e ɓee Kanaaniyankeebe e ɓee Girgaasiyankeebe e ɓee Yebuuusiyankeebe woni e mun.»

Fii Haajirata e Jibineede Ismaa'iila

16 ¹ Wa fewndo onsay hari Saaray beyngu Abraama jiidanaaki mo. Tawi Saaray no mari kordo Misirayankoojo wi'eteedo Haajirata. ² Onsay Saaray wi'i Abraama: «Bay Joomiraado on yedaali lan jiidi, jooni, yiidee e kordo an on, no gasa ka ondon hebanammi biddo.» Abraama jaabi ko Saaray wowlani mo kon. ³ Onsay Saaray yetti on kordo mun Misirayankoojo wi'eteedo Haajirata, o okki mo moodi makko fii beyngu. Dun hawrondiri Abraama wonii e ndin leydi Kanaana duubi sappo.

⁴ Onsay Abraama yiidi e Haajirata, on yetti reedu. Bay Haajirata andii sowike, o itti bote e Saaray jeydo mo on. ⁵ Onsay Saaray wi'i Abraama: «Yo oo monee mo mi hebi yantu e maa. Ko fii ko min tigi jonnu-maa oo kordo an. Bay jooni o tawii o reedii, o ittii bote e an. Yo Joomiraado on jaawu hakkunde men.»

⁶ Abraama jaabii beyngu mun Saaray, o wi'i mo: «Kordo maa on no e jungo maa, wadu mo ko faaladaa woo.» Onsay Saaray njaggi mo haa on dogi mo.

⁷ Malaa'ikaajo Joomiraado on tawi mo e takko bündu ndiyan ka wulaa, dun ko nduu bündu wondu ka laawol Suura, ⁸ o wi'i: «Ko an yo Haajirata, kordö Saaray, ko honto iwrudaa e ko honto yahataa?»

O jaabii mo: «Ko Saaray jeydo lan on mi woni dogude.»

⁹ Malaa'ikaajo Joomiraado on wi'i mo: «Yiltito ka jeydo ma on, yankinanodaa mo.» ¹⁰ Malaa'ikaajo Joomiraado on wi'i mo kadi: «Mi yanay jurriya maa on yan nudee, bë duuday haa bë duudana limoore.»

¹¹ Malaa'ikaajo Joomiraado on wi'i mo fahin: «Awa ko a sowido, a jibinoyay booboo gorko, a innoyay on *Ismaa'iila, ko fii Joomiraado on nanii hito maa e nder tampere maa nden. ¹² On biddo maa wa'ay wa mbabba buruure, o habay fow, fow habay mo, o wona feereejo e telen-ma sibbe makko ben fow.»

¹³ Haajirata jammi on Joomiraado yewtunoodo mo, «Alla Ru'ii», e maanaa «Alla rentudo», ko fii o wi'uno: «Taw si ko doo mi yi'i rentudo lan on?» ¹⁴ Ko sabu dun wadi si ndun woynu wondu hakkunde Kadeesi e Baarada wi'aa *Woynu Lahay-Ru'ii.

¹⁵ Haajirata jibinani Abraama booboo gorko. Abraama inni on biddo mun mo Haajirata jibini Ismaa'iila. ¹⁶ Hari Abraama ko mo duubi cappande jeetati e jeegoo fewndo Haajirata jibinani mo Ismaa'iila.

Fii Maande Ahadi ndin

17 ¹ Fewndo ko Abraama hebi duubi cappande jeenay e jeenay, Joomiraado on feejnani mo, daalani mo: «Ko min woni Alla Jom Bawgal on. Nawru ngurndan maa dan no feewiri yeeso an. ² Mi hunnay ahadi ndi mi wadunoo hakkunde an e maa ndin, mi yanete yan nudee.»

³ Onsay Abraama sujjani mo. Allaahu on daalani mo, wi'i: ⁴ «E hino ahadi ndi mi wadunoo hakkunde an e maa ndin: A wonay maamaajo leyyi duufudi. ⁵ Hande kadi wonaa *Abraama innetedaa, kono ko *Ibraahiima innetedaa, ko fii mi wadii

ma maamaajo leyýí duududi.⁶ Mi duddinay jiidi maa ndin fota, mi waday leyýí duududi e maa, awa kadi lambe iway e maa.⁷ Mi waday ahadi hakkunde an e maa e jurriya maa aroyoowo baawo maa on e nder jamaanuuji mabbe din. Ndin ahadi ko poomayankeeri, mi wona Alla maa e Alla jurriya maa on si feyyii e maa.⁸ Mi okkete an e jurriya maa aroyoowo baawo maa on ndii leydi Kanaana ndi wondaa kodo e mun fow, ndi wonana on halal haa poomaa, awa kadi mi wonay Alla mabbe.»

⁹ Allaahu on daalani Ibraahiima kadi: «An, a hunnay ahadi an ndin, an e jurriya maa aroyoowo baawo maa on e nder jamaanuuji mabbe din.¹⁰ E hino maande ahadi ndi jogitotodon hakkunde an e mon e jurriya maa aroyoowo baawo maa on: kala gorko e mon ko sunninteedo.¹¹ Hidon haanaa sunnineede. Ko dun wonata maande ahadi wondi hakkunde an e mon ndin.¹² Kala gorko jibinaado e mon sunninte jande o hebi balde jeetati, dun ko e nder jamaanuuji mon din fow, woni ko kurkaadujo hebaado ka galle maa, maa hara ko mo ittudaa kaalisi soodudaa e juude janano mo jeyaaka e jurriya maa on.¹³ Kala gorko kurkaadujo hebaado ka galle maa, maa mo ittudaa kaalisi soodudaa, ko sunninteedo. Ko ndin ahadi an wonayndi ka balli mon wonata ahadi poomayankeeri.¹⁴ Kala gorko mo sunninaaka, mo nden battatere alaa e bandu mun, haray hakkunde makko e yimbe makko ben tayii, ko fii haray o bonnii ahadi an ndin.»

¹⁵ Allaahu on daalani kadi Ibraahiima: «Beyngu maa *Saaray, hande kadi wota a noddir mo Saaray. Kono ko *Saarata woni innde makko.¹⁶ Mi waday barki e makko, mi okke biddo gorko immorde e makko. Mi waday barki e makko, o wona neene leyýí din. Lambe jamaaji iway e makko.»

¹⁷ Onsay Ibraahiima sujji, jali, o wi'i ka bernde makko: «Hara mo duubi teemedere gasay hebude biddo gorko, e hara Saarata, oo mo duubi cappande

jeenay gasay jiidaade?»¹⁸ Onsay Ibraahiima torii Alla, wi'i: «Yaa an Alla, yo Ismaa'iila wuuru yeeso maa.»

¹⁹ Kono Allaahu on jaabii mo, wi'i: «Wonaa non, beyngu maa Saarata jibinante booboo gorko, a innay on *Issaaqa. Mi waday ahadi an ndin e makko, ndi wonana jurriya makko aroyoowo ɓaawo makko on ahadi poomayankeeri.²⁰ Mi nanii fii ko Ismaa'iila kon, mi waday barki e makko, mi duddina jiidi makko ndin, mi yanjanay mo yanjnudee, o wonay baaba lambe sappoo e dido, awa kadi mi waday lejol mawngol e makko.²¹ Kono ahadi an ndin, ko e Issaaqa mi wadata ndi, oo mo Saarata jibinanoyay-maa ko arata e oo saa'i.»²² Bay Allaahu on gaynii mo yewtude, o acci Ibraahiima don, o yenti.

²³ Onsay Ibraahiima yetti Ismaa'iila biddo mun on, e kala gorko kurkadujo hebaado ka galle makko e be o ittunoo kaalisi o soodi ben fow. O hawtindiri worbe wonbe ka galle makko ben fow, o sunnindini be nden nande, wano Allaahu on daalirani mo non.²⁴ Ko fewndo Ibraahiima hebi duubi cappande jeenay e jeenay, o teddinaa.²⁵ Fewndo ko Ismaa'iila biddo makko on kadi sunninaa, hari ko mo o duubi sappoo e tati.²⁶ Ko nden nande tigi Ibraahiima e Ismaa'iila biddo mun on sunnindinaa,²⁷ wondude e kala gorko kurkadujo hebaado ka galle makko kanko Ibraahiima, e be o itti kaalisi, o soodi e juude jananbe, be fow, be sunnindinaa.

Fii no Jibineede Issaaqa Hiitoraa

18¹ Joomiraado on feejani kadi Ibraahiima e takko dee ledde mawde Mamra, tawi himo joodii ka dambugal suudu makko bagi nalorma ka fewndo nguleendi.

² Onsay o banti gite, o haynii worbe tato no darii yeeso makko. No o haynornoo be, o immii ka dambugal suudu makko, o wubbi fii jabbagol be, o jiccanii be ka leydi,³ o wi'i: «Jom an, si hida yedimmi sulfu, mi torike ma, wota a feyfuu oo jiyaado maa.⁴ Yo ndiyan seeda addane on ko sembodon, onsay fowtodon ka ley

leggal.⁵ Yo mi addanoy on huntere bireedi fii ko sattinorodon si feyýon, ko fii ko dun rewni on ka oo jiyaado mon.»

Onsay ɓe jaabii mo: «Awa warru wano wiirudaa non.»

⁶ Ontuma Ibraahiima yahi tinna, tawoyi Saarata ka suudu, o wi'i mo: «Etu tinna sariyaare tati condi farin, piyaa dñun, moyýinnaa bireedi.»⁷ Kanko Ibraahiima o dogi kadi, o yaari ka wuro, o yettoyi ton jale laatiinge fayunge, o jonni nge jiyaado makko goo, on moyýini nge hejna.⁸ O yëtti kadi kosan e ɓira keccan, wondude e teewu jale defaado on, o bannani ɓe. Fewndo ko ɓe jaamata, hari himo darii takko mabbe ka ley leggal.

⁹ Onsay ɓe landii mo: «Ko honto ɓeyngu maa Saarata woni?»

O jaabii ɓe: «Himo ka nder suudu bagi doo.»

¹⁰ Goddo e mabbe wi'i: «Pellet mi yiltitoyto ka maa doo ko arata e oo saa'i, onsay ɓeyngu maa Saarata hebay ɓiddo gorko.»

Fewndo o wowlata dñun, tawi Saarata no jentii ɓe ka dambugal suudu mun baawo mabbe.¹¹ Fewndo on saa'i hari Ibraahiima e Saarata nawyii fota, duubi mabbe din toowii haa hay Saarata acciino yi'ude farilla.¹² Kanko Saarata o jali e bernde, himo wi'a: «Hara min, oo jiidiraawo nayeejo, mi hebay faale? E hino jom an kadi nawyii.»

¹³ Onsay Joomiraado on daalani Ibraahiima: «E ko fii hondun Saarata jalani, himo wi'a: «Hara ko goonga mi hebay ɓiddo, min oo nayeejo?» »¹⁴ Joomiraado on daali kadi: «Hara no woodi ko sattanimmi? Ko arata e oo saa'i todðaado, mi yiltitoto ka maa doo, onsay Saarata hebay boobo gorko.»

¹⁵ Bay Saarata hulii, o yeddi, o wi'i: «Mi jalaali.»

Kono Joomiraado on daali: «Oo'o, a jalii.»

Fii no Ibraahiima Fattorani Saduumma

¹⁶ Bay ɓen worbe fokkitii, ɓe fewtiri Saduumma. Onsay Ibraahiima dowti ɓe fii waynondirgol e mabbe. ¹⁷ Joomiraado on daali: «Hara mi suuday Ibraahiima ko mi wadata kon? ¹⁸ Pellet Ibraahiima wonay lejol mawngol jogiingol doole, awa kadi leyýí aduna on fow barkinte sabu makko. ¹⁹ Ko bay mi suborii mo fii yo o yamir ɓibbe makko ɓen e beynguure makko aroyoore baawo makko nden jokkugol laawol an ngol e nder huutorgol peewal e nundal, fii no mi laatinirana Ibraahiima ko mi daalannoo mo kon.»

²⁰ Onsay Joomiraado on daali: «Ko wonaa wulliteede e hoore Saduumma e Amuura kon duudii, awa kadi junuubu mabbe on no tiidi fota. ²¹ Jooni, yo mi jippo, mi ndaara si tawii ɓe wadii ko wullitaa e an kon fow. Si hinaa non kadi, mi anda.»

²² Ben worbe iwi don, ɓe yaari Saduumma. Kono Ibraahiima kajun lutti daraade don yeeso Joomiraado on. ²³ Onsay Ibraahiima ɓadii Joomiraado on, wi'i mo: «E hara a halkiday feewube ɓen e bonbe ɓen? ²⁴ No gasa hara feewube cappande njowo no e nden saare. Taw si a halkay nde, a gasataa nde mujnaade sabu ɓen cappande njowo feewube wonbe e mayre? ²⁵ Yo wadugol sifa dun woddsito ma: waridugol feewube e bonbe. Si hinaa dun haray feewube ɓen wa'ii wa bonbe. Yo dun woddsito ma! E hara haananaa Naawoowo Aduna on fow jaawirgol no feewiri?»

²⁶ Joomiraado on daali: «Si mi tawoyii feewube cappande njowo ka saare Saduumma, mi mujnoto nde fow sabu mabbe.»

²⁷ Onsay Ibraahiima jaabii, wi'i: «Awa jooni, mi suusii yewtidugol e Jom an, min ndii mbullaari e ndoondi. ²⁸ No gasa hara njowo no ɣakki e ɓen cappande njowo feewube. Taw si a muliray saare nden fii ɓen njowo ɣakkube?»

Joomiraado on jaabii: «Si mi tawii ton cappande nayo e njowo feewube, mi mulataa saare nden.»

²⁹ Ibraahiima wi'i kadi: «No gasa hara ko cappande nayo pet tawoytaa ton?»

Joomiraado on daali: «Mi wadoytaa hay fus sabu ɓen cappande nayo.»

³⁰ Ibraahiima wi'i kadi: «Jom an, mi torike ma, wota a tikku si mi wowlii kadi. No gasa hara ko cappande tato tawoytaa ton?»

Joomiraado on jaabii: «Mi wadoytaa hay fus si ko cappande tato mi tawoyi.»

³¹ Ibraahiima wi'i kadi: «Awa jooni, mi suusii yewtidude e Jom an, no gasa hara ko noogayo tawoytaa ton?»

Joomiraado on daali: «Mi mulataa nde sabu ɓen noogayo.»

³² Ibraahiima wi'i kadi: «Awa jooni, wota Jom an tikku si mi wowlii nde wootere kadi. No gasa hara ko feewube sappo tawoytaa ton.»

Joomiraado on jaabii kadi: «Mi mulataa nde sabu ɓen sappo.»

³³ Bay Joomiraado on gaynii yewtidude e Ibraahiima, o yahi. Ibraahiima kadi yiltitii ka mun.

Fii Mulugol Saduumma e Amuura

19¹ Malaa'ikaabe ɓen dido hewtiri Saduumma kiikiide, tawi Luutu no joodii ka naatirgal saare. No Luutu haynornoo ɓe, o immii, o yahi jabbagol ɓe, no o fottirnoo e mabbe, o sujjani ɓe. ² Onsay o wi'i ɓe: «Koohoobe an, mi torike on, naatiree ka an min oo jiyaado mon, mi okkora on ko semboron, waalon, bimbi law dawon feyfude.»

Be jaabii mo: «Oo'o, men waalay ka fottirde jamaa.»

³ Kono Luutu jeeji ɓe haa ɓe jabí, ɓe naatiri ka suudu makko. O wadani ɓe caatal, o judani ɓe bireedi de aldaa e lewen, ɓe nafii.

⁴ Hari hay ɓe waalaaki si worbe iwri nokkeeli din fow e nder saare Saduumma nden, gila e sukaabe haa e mawbe, ɓe fow ɓe huubi suudu Luutu ndun. ⁵ Be noddi Luutu, ɓe wi'i mo: «Ko honto bee worbe naatirbe ka maa e oo jemma doo woni? Yaltinan men ɓe, men jina ɓe.»

⁶ Onsay Luutu yalti fii yewtidugol e ben yimbe, oombori baafal ngal baawo makko, ⁷ o wi'i be: «Ko onon yo musibbe, mi torike on, wota on wadu oo bone!

⁸ Jooni mi torike on, bay mido mari jiwbe dido be andaa gorko, accee mi yaltinana on be, wadon be ko faaladon woo. Fii tun wota on wadu bee worbe, arbe fattii haa ka furgere suudu an doo, ko boni.»

⁹ Be jaabii: «Potto don!» Be wi'i kadi: «Ndaarii oo tunjarankeejo no ari doo, no waditii naawoowo e hoore men. Awa jooni men wadete buri bone mo men faalaa wadude beya on!» Onsay be dooli Luutu, be badii baafal ngal fii bonnugol ngal.

¹⁰ Ontuma ben malaa'ikaabe dido fonti juude, nangi Luutu, naadi ka nder suudu, ombi baafal ngal. ¹¹ Ontuma be wumini kala wonnoobe ka dambugal suudu, gila e suka haa e mawdo, tawi han kadi be waawataa yiitude baafal ngal.

¹² Ben malaa'ikaabe dido wi'i Luutu: «Hara hisa mari doo sibbe goo kadi, maa hisa mari esiraabe goo, maa bibbe rewbe e bibbe worbe goo, maa be jeydudaa goo kadi ka saare doo? Awa yaltin be e nder ndee nokkuure, ¹³ ko fii men mulay ndee nokkuure. Ko wonaa wulliteede e hoore bee yimbe ka Joomiraado on kon tiidii haa Joomiraado on nulii men fii mulugol ndee nokkuure.»

¹⁴ Luutu yalti hollitoygol dun esiraabe mun yamanbe mo jiwbe makko ben, o wi'i be: «Immee, yalton e ndee saare, ko fii Joomiraado on mulay nde woni.» Kono, wa'ani esiraabe makko ben wa si ko e samakala o woni.

¹⁵ Ka peeral fajiri, malaa'ikaabe ben hawjini Luutu, wi'i mo: «Immo, yettaa beyngu maa e jiwbe maa dido be wondudaa doo ben, yalton e ndee nokkuure, fii wota on mule tuma saare nden donkintee.»

¹⁶ Bay o nangii nennagol, malaa'ikaabe ben jogii jungo makko ngon, kanko e beyngu makko e jiwbe makko ben dido, sabu yurmeende Joomiraado on e hoore makko, be yaltini be haa ka baawo saare, be acci be don. ¹⁷ Bay be nabii be ka baawo saare, goddo e ben malaa'ikaabe wi'i: «Dogee, dandon wonkiji mon din,

hara on yeýitaaki, on daraaki hay nokku e nder ndee hollaande, yaaron ka pelle fii wota on mule!»

¹⁸ Onsay Luutu wi'i be: «Oo'o koohoobe an, mi torike on. ¹⁹ Min, oo jiyaado mon, mi hebii sulfu mon, on wadanii lan moyyere mawnde fii dandugol wonkii an kin. Kono min mi waawataa dogirde ka pelle, fii wota oo bone hewtito lan, mi maaya.

²⁰ Awa e hino doo kodolun, ko kun buri lan badaade ka mi fattoyoo. Bay hikun fandiri nii, accee mi dogira ton, wonkii an kin dada.»

²¹ Malaa'ikaajo on jaabii mo: «Awa fii newnangol ma ko toridaa kon kadi, mi mulataa kun kodolun kun wowludaa fii mun. ²² Awa dogu, yahaa tinna, ko fii mi waawataa wadude hay fus doo e a hewtoyde ton.» (Ko dun wadi si kun kodolun innaa *Su'aara.)

²³ Ko Luutu hewtata Su'aara, hari naange ngen fudii. ²⁴ Onsay Joomiraado on saayini mbollan yiite e hoore Saduma e Amuura, iwrude e Joomiraado on ka kammu. ²⁵ O lanci den ca'e didi, wondude e nden hollaande, e kala hodunoobe e majje, e kala ko fudi ka leydi. ²⁶ Kono beyngu Luutu kajun yeýitii, o wonti doosal hayre landan.

²⁷ Bimbi nden jande law, Ibraahiima dawi e ndee nokkuure nde o darinoo e mun yeeso Joomiraado on. ²⁸ O ndaariri telen Saduma e Amuura, o ndaari hollaande nden fow, o haynii duggal no yawa ka leydi ton wa'ungal wa curki beembal yiite.

²⁹ Wa fewndo ko Joomiraado on mulata den ca'e didi de Luutu hodunoo e mun, kanko Joomiraado on o anditi fii Ibraahiima, onsay o suuti Luutu e hakkunde on kasaara.

Fii Luutu e Jiwbe mun ɓen

³⁰ Luutu yalti Su'aara, kanko e jiwbe makko ɓen dido. Bay hari himo huli hodugol Su'aara, o hodidoyi e jiwbe makko ɓen dido ka fello e nder fammeere.

³¹ Ontuma jiw makko afo on wi'i mijan mun: «E hino jooni ben men nawyii, awa

kadi gorko woo alaa doo ko wonda e men wano aduna on fow gerdata non.³² Aru yernen ben men njaram *wiijnu, waaliden e mabbe fii no hebiren jurriya iwrude e mabbe.»³³ Nden nande jemma, be yarni ben mabbe njaram wiijnu. Jiwo afo on ari waalidi e ben mabbe, kono ben mabbe andaali fewndo dun wadi.

³⁴ Bimbi nden nande afo on wi'i mijan mun: «E oo jemma feyfudo doo mi waaliduno e ben men. Hande kadi jemma en yarnay be, an kadi waalidoyaa e mabbe fii no hebiren jurriya iwrude e mabbe.»³⁵ E on jemma don kadi, be yarni ben mabbe njaram wiijnu. Toolaajo on kadi naati, waalidi e ben mabbe. Dun kadi laatii ben mabbe andaali.

³⁶ Jiwbe Luutu ben didoo non yetti reedu iwrude e ben mabbe. ³⁷ Jiwo afo on jibini booboo gorko, o inni mo Mohaabu. Ko on woni maamaajo Mohaabiyankeebe ben, ben no woodi haa hande.³⁸ Jiwo tosooko on kadi jibini booboo gorko, o inni mo Ban-Ammi. Ko on woni maamaajo Ammoniyankeeben, ben no woodi haa hande.

Fii Kodu Ibraahima ngun Negeeba

20¹ Ibraahima eggi ka wonnoo don kadi, hammiri e ndii leydi Negeeba. O hodoyi hakkunde Kadeesi e Suura, o kodoyii kadi Garaara. ² Ko don Ibraahima wi'i wonde beyngu mun Saarata ko bandiraawo mun. Ontuma Abii-Maaliki lando Garaara on nulani Saarata, o yetti mo.

³ Nande goo jemma, Allaahu on daalani Abii-Maaliki e nder koydol, wi'i mo: «A maayii, sabu oo debbo mo yettudaa, ko fii oo debbo ko yettaado.»

⁴ Wa nden nande, hari Abii-Maaliki yiidaali e on debbo, o wi'i: «Enee, Jom an, hara a mulay lejol hay si ko feewungol? ⁵ Hinaa Ibraahima tigi wi'ii lan wondema oo debbo ko bandiraawo makko, kanko debbo on kadi o wi'immi ko o kotoo makko. Awa ko bernde laabunde e juude laabude mi warri dun.»

⁶ Allaahu on daalani mo kadi e nder ngol koydol, wi'i mo: «Mido andi ko e hoore bernde laabunde wadirdaa dñun, ko min hadu-maa wadugol oo junuubu yeeso an. Ko dñun wadi si mi newnanaali ma meemugol on debbo. ⁷ Jooni non nattu oo debbo ka moodi makko, ko fii on ko annabaajo, on toranto ma fii no wuuriraa. Kono fotu andude si a nattaali mo, pellet a maayay, an e ko jeydaa kon fow.»

⁸ Abii-Maaliki immii bimbi law, o nodditi mbatulaabe makko ßen fow, o fillitanii ße fii dñun fow. Onsay ßen mbatulaabe makko huli fota. ⁹ Ontuma Abii-Maaliki noddi Ibraahiima, landii mo: «Ko hondun wadudaa men nii? E ko hondun mi bonnu-maa haa defudaa mi, min e laamateeri an ndin, wadugol oo bakkatu njano? A wadinii lan ko haanaaka Wadeede.» ¹⁰ Abii-Maaliki wi'i kadi Ibraahiima: «Ko hondun sikkunodaa si warrudaa nii?»

¹¹ Ibraahiima jaabii mo: «Hari mido sikka kulol Alla woo alaa e ndee nokkuure, awa kadi ße waray lan sabu ßeyngu an. ¹² Awa kadi, ko o bandiraawo an tigi, ßay ko men ben-gootooße, hinaa non men neene-gootooße, e hoore dñun kadi o wontii ßeyngu an.» ¹³ O wi'i kadi: «Nde Allaahu on yaltinnoo lan ka galle ben an, o wadimmi seteejo, mi wi'i ßeyngu an: «E hino sulfu mo wadantaa mi on, kala ka yaaruden, yo a wi'u ko mi kotoo maa.»»

¹⁴ Onsay Abii-Maaliki yetti na'i e dammi, e kurkaduuße rewße e worße, o watti e juude Ibraahiima, o jonniti mo kadi ßeyngu makko Saarata. ¹⁵ Abii-Maaliki wi'i mo kadi: «E hino leydi an ndin yeeso maa, hodir ka faaliradaa woo.»

¹⁶ Kanko Abii-Maaliki o wi'i Saarata: «E hino mi jonnii kotoo maa tammaaji wuluure kaalisi, fii yo dun wonan ße wondudaa ßen fow seedee wondema a felnaaki e yeeso yimße ßen fow.»

¹⁷ Ontuma Ibraahiima toranii ße Alla, Allaahu on sellini Abii-Maaliki e ßeyngu mun e horße makko ßen, onsay ßen watti jiidaade, ¹⁸ ko fii hari Joomiraado on

uddii ndimdimol kala debbo wondo ka galle Abii-Maaliki, sabu Saarata beyngu Ibraahiima.

Fii Jibineede Issaaqa

21 ¹ Allaahu on faabii Saarata, o wadirani mo wano o daalirnoo non. ² Saarata yetti reedu, jibinani Ibraahiima biddo gorko e nder nayeewu Ibraahiima. Dun wadi e saa'i mo Alla wi'unoo mo on. ³ Ibraahiima inni on biddo gorko, mo Saarata jibinani mo, *Issaaqa. ⁴ Ibraahiima sunnini Issaaqa ka balde jeetati makko, o wadiri dun wano Alla yamirnoo mo non. ⁵ Hari Ibraahiima ko mo duufi teemedere fewndo o dajanaa Issaaqa mo makko. ⁶ Ontuma Saarata wi'i: «Allaahu on jalnii lan, kala nanudo dundoo jaliday e an.» ⁷ O wi'i kadi: «Ko hombo wi'aynoo Ibraahiima, Saarata muyninanay mo bibbe? Kono-le mi hebanii mo biddo e nder nayeewu makko.»

Fii no Haajirata Radoraa

⁸ Bay boobo on njandii haa entaama, nden jnande ben makko Ibraahiima wadi caatal mawngal. ⁹ Onsay Saarata yi'i Ismaa'iila mo Haajirata Misirayankoojo on dajannoo Ibraahiima on no jala. ¹⁰ Ontuma Saarata wi'i Ibraahiima: «Rado oo kordo e biddo mun on, ko fii biddo oo kordo ronidataa e Issaaqa mo an.»

¹¹ Ngol kongol satti e Ibraahiima fota, bay Ismaa'iila kadi ko biddo makko.

¹² Kono Allaahu on daalani Ibraahiima: «Wota fii oo kordo maa e biddo mun sattu e maa. Nanan Saarata kala ko o wi'u maa, ko fii ko e Issaaqa jurriya maa on nodditirtee. ¹³ Mi waday e biddo kordo maa on lejol mawngol, bay on kadi ko o jurriya maa.»

¹⁴ Ibraahiima immii bimbi law, o yetti jaametee e sasa ndiyan, o jonni Haajirata, o fawi dun ka balbe makko, o radodi mo e biddo makko on. Be yahi, be woni e yiilagol ka wulaa Birsabaa.

¹⁵ Bay ndiyan dan ka sasa lannii, o wallini paykun kun don e ley lekkun. ¹⁶ O pottitori paykun kun embere fampannde ndagawal, o joodii don, ko fii hari himo wi'a: «Wota mi yi'u ka paykun kun maayata.» O fewtiri ka paykun kun woniri ton, o nangi e fesugol town.

¹⁷ Allaahu on nani hawa paykun kun. Onsay Malaa'ikaajo Allaahu on noddi Haajirata iwrude ka kammu, wi'i mo: «Ko hondun wadu-maa Haajirata? Wota a hulu, ko fii Allaahu on nanii hawa paykun kun ka kun woni don.» ¹⁸ Malaa'ikaajo on wi'i mo kadi: «Immo, yettoyaa paykun kun, jogodaa mo moyýa, ko fii mi waday lenjol mawngol e makko.»

¹⁹ Allaahu on holli mo don woyndu ndiyan. O yahi, o hebbini sasa on ndiyan, o ari, o yarni paykun kun.

²⁰ Allaahu on wondi e kun paykun, bay kun njandii, kun hodoyi ka wulaa, kun woni waajiroohun laajjal. ²¹ Ko ka wulaa Paraana kun hodunoo. Onsay neene makkun resani kun debbo iwudo leydi Misira.

Fii Ahadi ndin Hakkunde Ibraahiima e Abii-Maaliki

²² Ko e on saa'i, Abii-Maaliki e Fiikuula, hooreejo konu makko ngun, ari, wi'i Ibraahiima: «Allaahu on no wondi e maa e kala ko wondaa wadude. ²³ Jooni woondiranen doo Allaahu on wondema a janfoytako lan, min e 6ibbe an 6en, haa nabani jurriya an aroyoowo on. Kadi wano min mi moyýori e maa non, an kadi a moyýoray non e an, min e ndii leydi ndi kodidaa e mun.»

²⁴ Ibraahiima wi'i: «Awa mi woonday.»

²⁵ Kono Ibraahiima feli Abii-Maaliki sabu woyndu ndiyan ndu kurkaaduuþe Abii-Maaliki 6en jattunoo mo ndun. ²⁶ Kono Abii-Maaliki jaabii mo: «Min mi andaa ko hombo wadi dun, a wowlanaali lan. Awa kadi haa hande mi nanaali fii dun.»

²⁷ Onsay Ibraahiima yetti na'i e dammi, okki Abii-Maaliki, kambe dido be yettodi ahadi. ²⁸ Onsay Ibraahiima wadi baali biigi jeedidi feere. ²⁹ Abii-Maaliki landii Ibraahiima: «Ko hondun woni fii dii baali biigi jeedidi di wadudaa feere?»

³⁰ Ibraahiima jaabii: «Ko yo a jabu dii biigi jeedidi, fii yo dun wonanan seedee wonde ko min jasi ndun woyndu.» ³¹ Ko dun wadi si nden nokkuure wi'aa *Birsabaa, ko fii ko don ben dido woondindirannoo.

³² Bay be gaynii yettodude ndin ahadi Birsabaa don, Abii-Maaliki immii, kanko e Fiikuula, hooreejo konu makko ngun, be yiltitii ka leydi Filistiyankeebé ben.

³³ Onsay Ibraahiima tuti Birsabaa don aslahi, o jantii don innde Joomiraado on, on Alla Poomayankeejo. ³⁴ Ibraahiima kodino ka leydi Filistiyankeebé ben ko neebi.

Fii Sunna Ibraahiima on

22 ¹ Bawto dun, Allaahu on ndarndii Ibraahiima, o daalani mo: «Ibraahiima!». Ibraahiima jaabii: «Naamu! E hino lan.»

² Allaahu on daalani mo: «Yettu biddo maa bajjo on, on mo yidudaa, dun ko Issaaqa, yahaa e ndii leydi Moriyaa, ittoyaa mo don sadaka sunneteedo e hoore wongo e pelle de mi holloyay maa den.»

³ Ibraahiima immii bimbi law, o fecci ledde fii sunna on, o habbi mbabba makko mban, o yetti Issaaqa biddo makko on e kurkaaduube makko dido, o immii, o yahi e nden nokkuure nde Allaahu on daalani mo fii mun. ⁴ Ka be hebunoo don balde tati yaadu, Ibraahiima banti gite, o haynii nden nokkuure ka wodditii. ⁵ Onsay Ibraahiima wi'i kurkaaduube makko ben: «Luttidee doo e mbabba mban haa min e kun paykun men yaha too, men rewoya Alla. Ontuma men arta, men tawta on doo.»

⁶ Ibraahiima yetti ledde sunna den, o rondi de Issaaqa biddo makko on, kanko o yetti labi kin e yiite ngen. Be yaadi kambe dido. ⁷ Onsay Issaaqa wi'i ben mun Ibraahiima: «Baaba en!»

Ibraahiima jaabii: «Naamu booboo an.»

Issaaqa wi'i: «E hino yiite ngen e ledde den, kono ko honto non baalii sunna ngin woni?»

⁸ Ibraahiima jaabii: «Boobo an, Allaahu on tigi ndaaray fii ngin baalii sunna.» Be jokki yaadu maabbe.

⁹ Bay be hewtii e nden nokkuure nde Allaahu on daalannoo mo fii mun, Ibraahiima moyyini don layyorde, o fawi don falimaaje den. O habbi Issaaqa biddo makko on, o wallini ka hoore falimaaje. ¹⁰ Onsay Ibraahiima fonti jungo, yetti labi kin fii layyagol Issaaqa biddo makko on. ¹¹ Don kisan, Malaa'ikaajo Joomiraado on noddi mo kanko Ibraahiima iwrude ka kammu, o wi'i: «Ibraahiima! Ibraahiima!»

O jaabii: «Naamu! E hino lan!»

¹² Onsay malaa'ikaajo on wi'i mo: «Wota a fawu paykun kun jungo, wota a wadu kun hay huunde. Ko fii jooni mi andii ko a huloowo Alla, bay a salanaaki lan biddo maa bajjo on.»

¹³ Ibraahiima banti gite, haynii ngaari baalii faawo mun ndi galaadi mun fallii e pitahun. Onsay Ibraahiima yahi, addoyi ndin ngaari baalii, o hetti ngin sunna lonto biddo makko on. ¹⁴ Ibraahiima inni nden nokkuure: Faabo Joomiraado on. Ko dun wadi si no wi'ee haa hande: «Faabo heboto ka fello Joomiraado on.»

¹⁵ Malaa'ikaajo Joomiraado on noddi Ibraahiima kadi iwrude ka kammu, ¹⁶ wi'i mo: «Mi woondirii hoore an, ko Joomiraado on daali dun, bay a wadii dun, a salanaaki lan biddo maa gorko bajjo on, ¹⁷ mi waday barki e maa fota, mi yanjanjurriya maa on yanjnudee, be wa'a wa koode den ka kammu e wa njaareendi ndin ka sera baharu. Jurriya maa on haloray ca'e aybe mun ben. ¹⁸ Bay a doftike kongol an ngol, leyyi aduna on fow barkinte sabu jurriya maa on.»

¹⁹ Onsay Ibraahiima e Issaaqa yiltitii, tawtoyi kurkaaduube mun ben, be yiltodi Birsabaa. Ibraahiima hodi don.

Fii Bibbe Naahuura ɓen

²⁰ Bawto dун, Ibraahiima humpitii wonde Milkatu, бeyngu Naahuura ben gooto makko on, jibinii bibbe worbe. ²¹ Ben bibbe ko Uusaa, ko on woni afo on, e Buusaa mijan makko, e Qamuu'iila, ko on woni ben Araama, ²² e Kaasada e Hazuwa e Fildaasa e Yidlaafa e Batuu'iila. ²³ Batuu'iila dananaa Rifqatu. Ko bee bibbe worbe njeetato doo Milkatu jibinani Naahuura, on ben gooto Ibraahiima. ²⁴ Hari Naahuura no mari *taaraajo goo, on no wi'ee Ra'uumatu, on kadi jibinani mo bee doo, dун ko Taabaha e Gaahama e Taahasa e Ma'aka.

Fii Mayde Saarata e no o Surriraa

23

¹ Duubi Saarata din fow hawri duubi teemedere e noogay e jeedidi, ko ngurndan makko dan fow non. ² Ko e ndee saare wi'eteende Qiriyat-Arba'a o faatii, dun ko Habruuna e nder ndii leydi Kanaana. Ibraahiima yahi heynii Saarata, fesi mo.

³ Ontuma Ibraahiima immii takko furee on, o yahi, o wi'oyi Hissiyankeeben:

⁴ «Ko mi kodo e tujarankeejo hakkunde mon. Wallee lan mi heba berde halal ka mon doo fii yo mi hebu ka mi surra бeyngu an.»

⁵ Hissiyankeeben jaabii Ibraahiima, be wi'i: ⁶ «Heditee men, yo koohoojo amen. Ko on be Allaahu on wadi mawbe e hakkunde amen. Subee ka burani on woo e hakkunde berdeeji amen din ka surron maydo mon on. Hay gooto e amen salantaako on berde mun ka surron maydo mon on.»

⁷ Onsay Ibraahiima immii, jiccanii yimbe ndin leydi, dun ko Hissiyankeeben,

⁸ o wi'i be: «Si on jabii, yo mi wattin maydo an on ka leydi mon doo, haray mi torike on, toranee lan Ifruuna mo Suhaara ⁹yo o hendaran ndee fammeere makko Makfilati wonde ka sera ngesa makko, o yeeyammi nde coggu timmungu e tawnde mon fii yo nden wonanan berde halal.»

¹⁰ Tawi Ifruuna no joododi e Hissiyankeeben. Onsay kanko Ifruuna Hissiyankeejon o jaabii Ibraahiima e tawnde ben Hissiyankeeben, wondude e kala wonnoobe

naatude ka saare makko, o wi'i: ¹¹ «Oo'o, hedee lan yo koohoojo an, mi okkii on ngesa mban. Mi okkidii on mba e fammeere wonde don nden. Mi okkii on dun e tawnde yimbe an ben fow. Surree don maydo mon on.»

¹² Ibraahiima jicci kadi yeeso ben yimbe ndin leydi, ¹³ o jaabii Ifruuna e tawnde yimbe leydi ndin, o wi'i: «Min kadi hedito lan, accu jabaa mi jonne coggu ngesa mban, fii no mi surrira don maydo an on.»

¹⁴ Ifruuna jaabitii Ibraahiima, o wi'i mo: ¹⁵ «Hedee lan, yo koohoojo an: hara leydi jaroori tammaaji teemedde nay kaalisi, dun ko hondun hakkunde men? Surree tun maydo mon on.»

¹⁶ Ibraahiima jabi ko Ifruuna wi'i kon. Onsay o yobi mo ngun coggu ngu o hottinoo e tawnde ben Hissyankeebe, dun ko tammaaji teemedde nay kaalisi di njulaabe ben huutoraynoo din. ¹⁷ Ko nii mban ngesa Ifruuna wonba Makfilati, dun ko yeeso Mamra, wondude e nden fammeere wonde e nder mabba e kala ledde wonde ka nder ngesa, ¹⁸ wontirani Ibraahiima halal. Dun wadi e tawnde ben Hissyankeebe, wondude e kala wonnoobe naatude ka saare makko.

¹⁹ Bawto dun, Ibraahiima surri beyngu mun Saarata e nden fammeere wonde e mban ngesa Makfilati yeeso Mamra, dun ko Habruuna, e nder leydi Kanaana.

²⁰ Mban ngesa e nden fammeere wonde e nder mabba wontani mo kanko Ibraahiima berde halal, de o soodi e juude ben Hissyankeebe.

Fii Resaneede Issaaqa

24 ¹ Tawi Ibraahiima wonii nayeejo foto, duubi makko din toowii, hari kadi Joomiraado on wadiino barki e makko e di fow. ² Ibraahiima wi'i mbatulaajo mun mawdo on ka galle, on mo o halfini jawle makko den fow: «Sornu jungo maa ngon ka ley busal an doo. ³ Mi woondinire Joomiraado on, on Alla Jom leydi e kammu, wondema a yamantaa oo biddo an bee jiwbe Kanaaniyankeebe be mi hodi

hakkunde mun,⁴ kono a yahay ka leydi amen, ka musidal an, yettanoyaa ton Issaaqa biddo an on beyngu.»

⁵ Mbatulaajo on jaabii mo: «Kono si tawoyii non on jiwo jaboyaali men arda gaa, haray yo mi naboy biddo mon on ka leydi ka iwudon ton?»

⁶ Ibraahiima wi'i: «Rento e nabugol biddo an on ton! ⁷ Joomiraado on, on Alla Jom kammu ngun, on yaltindo lan ka suudu ben an e ka leydi musidal an, on daalannoodo lan, woondanimmi, wondema o okkay ndii leydi jurriya an on. Ko on tigi ardinoya malaa'ikaajo mun on yeeso maa fii no suboranodaa ton biddo an on beyngu. ⁸ Si jiwo on jaboyaali ardon, haray woondoore nde mi woondin-maa nden fawaaki ma. Kono wota a nattu tun biddo an on ton.» ⁹ Onsay mbatulaajo on sorni jungo mun ngon ka ley busal Ibraahiima jom makko, o woondani mo fii dun.

¹⁰ Onsay on mbatulaajo yetti ngeloodi sappo e nder ngeloodi jom mun din, o fokkiti, o nabori kala noone jawle de jom makko marnoo. O immii, o yahi

*Araama-Naharayni, o hewti ka saare Naahuura. ¹¹ O jiccini ngeloodi din ka baawo saare, e binde woyndu ndiyan, dun hawri telen kiikiide fewndo rewbe ben arata yoogugol.

¹² Onsay o wi'i: «Ko an yo Joomiraado, an Alla jom an Ibraahiima, mi torike ma, hawrindinan hande, hollaa Ibraahiima jom an giggol sella-findewol. ¹³ E hino lan ka mi darii e binde nduu bundu ndiyan, fewndo ka bee jiwbe ndee saare arata yoogugol don. ¹⁴ Yo jiwo mo mi wi'i yo liiyanan loonde mun nden mi yara woo, on jaabii lan: ‹Yaru, mi yavnante kadi ngeloodi maa din›, yo tawu ko on subanidaa Issaaqa oo jiyaado maa. Ko nii mi andirta wonde a hollii jom an giggol sella-findewol.»

¹⁵ Hay o gaynaali yewtude dun, hawri Rifqatu yaltitii, no wakkii loonde. Tawi on ko jiwu Batuu'iila, mo Milkatu beyngu Naahuura ben gooto Ibraahiima on. ¹⁶Tawi on ko curbaajo labaado fota, mo andaali gorko. O jippii ka bündu, o yōogi, o yawi.

¹⁷ Onsay on mbatulaajo dogi, fotti e makko, wi'i mo: «Mi torike ma, okkoran ndiyan seeda ka loonde maa, mi yara.»

¹⁸ Jiwo on jaabii: «Yaree yo koohoojo an.» O hittini liiyangol mo loonde nden, o okkori mo o yari. ¹⁹ Bay jiwo on okkorii mo o yarri, jiwo on wi'i mo: «Mi yooganay ngeloodi mon din kadi, di yara haa di dondita.» ²⁰ O wayli heddiidan dan don e nder kunnawal, o dogi, o yoogoyi kadi ko yonata ngeloodi din fow. ²¹ Onsay gorko on ndaari jiwo on, o deyýiti fii andugol si tawii Joomiraado on okkii mo kutu e laawol makko ngol.

²² Bay ngeloodi din gaynii yarude, gorko on yetti kurundahun kun garam jowi kajne e mulle didi kajne de garam teemedere, o jonni mo ko o wada ka juude makko. ²³ Onsay o wi'i jiwo on: «Mi torike ma, yeeto lan, an ko mo a hombo? Hara men hebay ka ben maa ton ka men waala?»

²⁴ Jiwo on jaabii mo: «Min, ko mi jiwo Batuu'iila, oo biddo gorko mo Milkatu jibinannoo Naahuura.» ²⁵ O wi'i kadi: «Meden mari nagama e hudo buy, e nokkuure ka waalee.»

²⁶ Ontuma on gorko jicci, sujani Joomiraado on, ²⁷ o wi'i: «Yo mantoore wonan Joomiraado on, on Alla Ibraahiima jom an, on mo selnaali ngol giggol mun sella-findewol e jom an. Joomiraado on ardi ke lan haa e dee galle bee sibbe jom an.»

²⁸ Onsay jiwo on dogi, o yahi ka suudu neene makko, o filloyii ko wadi kon.

²⁹ Tawi Rifqatu, on jiwo, no mari kotiraawo wi'eteedo Labaanu. Onsay Labaanu dogi fii yiidoygol e on gorko wondo ka bündu. ³⁰ No o yiirunoo kun kurundahun e den mulle ka juude bandiraawo makko on, o nani kadi ko Rifqatu bandiraawo makko on wi'i kon wonde: «Oo gorko wi'irii lan nii», onsay o ari, o tawi on gorko

no darii ka takko ngeloodi mun e binde ndun bündu.³¹ Labaanu wi'i mo: «Aree, yo onon be Joomiraado on wadi barki e mun! Ko fii hondun wonandon ka yaasi gaa? Mi woncitani on suudu ndun e nokkuure fii ngeloodi din.»

³² Onsay on gorko naati ka suudu. Dolle de ngeloodi din rondinanoo den jippinaa, di addanaa nagama e hudo. Be addani gorko on e be o wondi ben ndiyan ko be sembora.³³ Be bannani mo ko o jaama. Kono o wi'i: «Mi jaamataa doo e mi wowlude fii ko addimmi kon.» Onsay Labaanu wi'i: «Awa, maakee.»

³⁴ O wi'i: «Min ko mi mbatulaajo Ibraahiima.³⁵ Joomiraado on wadii barki e jom an fota, o wontii aaden teddudo. Joomiraado on yedii mo na'i e dammi, kaalisi e kanjye, kurkotoobe worbe e rewbe, ngeloodi e mbabbi.³⁶ Hari Saarata sonnaajo jom an on nawyii fota si o jibinani jom an Ibraahiima biddo gorko. Awa ko on biddo woni ko o okki kala ko o jeyi.³⁷ Awa kadi jom an Ibraahiima woondinanno wota mi yettan biddo makko on bee jiwbe Kanaaniyankeebe be o woni ka leydi mun,³⁸ kono yo mi yahu ka galle ben makko, hara ko ka musidal makko tigi, mi yettanoya biddo makko on beyngu.

³⁹ «Onsay mi landii jom an Ibraahiima: <Si tawoyii non jiwo on jaboyaali men arda?>

⁴⁰ «Jom an jaabitii, wi'i: <On Joomiraado an, mo mi wuuri yeeso mun, ardinay malaa'ikaajo makko on yeeso maa fii no hebiraa kutu e laawol maa ngol. Onsay a yettanay biddo an on beyngu ka musidal an, hara ko ka galle ben an tigi.⁴¹ Si a hewtoyii ka musidal an, haray woondoore nde mi woondin-maa nden fawaaki ma. Hay si be salanike ma jiwo on, haray woondoore nde mi woondin-maa nden fawaaki ma.>

⁴² «Ko mi hewti hande ka bündu, mi wi'i Joomiraado on: <Ko an yo Joomiraado, Alla Ibraahiima jom an, si tawii hida woniri okkugol lan kutu e ngol laawol an doo,⁴³ haray mido darii ka binde bündu ndiyan doo, yo jiwo arudo doo yoogugol

mo mi wi'i yo okkoran ndiyan seeda ka loonde mun, mi yara woo,⁴⁴ on jaabii lan:
 «Yaree, mi yooganay ngeloodi mon din kadi», yo tawu ko on Joomiraado on
 subanii biddo jom an on.»

⁴⁵ «Hay mi gaynaali wowlude dun ka bernde an, hawri Rifqatu yaltitii, no wakkii
 loonde, o jippii ka bündu, o yoogi. Onsay mi wi'i mo: «Mi torike ma, okkoran mi
 yara.»⁴⁶ O hittini liiyugol loonde nden, o wi'i: «Yaree, mi yarnay ngeloodi mon din
 kadi.» Mi yari, o yarni ngeloodi din kadi.⁴⁷ Onsay mi landii mo non ko mo o
 hombo. O wi'immi ko o jiwo Batuu'iila, mo Milkatu jibinannoo Naahuura on.
 Ontuma mi wadani mo kurundahun kun ka kinal makko, e mulle den ka juude
 makko.⁴⁸ Onsay mi jicci, mi sujjani Joomiraado on, mi manti Joomiraado on, on
 Alla Ibraahiima jom an, ardiido lan, fewnimmi e laawol goongawol fii yo mi
 yettan biddo jom an on beyngu, dun-le ko taaniraawo ben gooto jom an on.

⁴⁹ Jooni non, si tawii on wadanay jom an giggol sella-findewol, andinee lan. Si ko
 liddu mun kadi andinon mi, mi anda si mi yaaray nano maa jaamo.»

⁵⁰ Labaanu e Batuu'iila jaabii, wi'i: «Dundoo ko immorde e Alla, men waawataa
 ma wi'ude bonii maa moyyii.⁵¹ E hino doo Rifqatu yeeso maa, yettu mo, nabaa, yo
 o wonu sonnaajo gedal jom maa wano Joomiraado on hoddiri non.»

⁵² Bay on mbatulaajo Ibraahiima nanii din kongudi mabbe, o sujjani Joomiraado
 on ka leydi.⁵³ Ontuma on mbatulaajo yaltini cudaariiji, kaalisi e kanje e conci, o
 jonni Rifqatu. O wadani kadi kotiraawo jiwo on e neene mabbe ko keldi.⁵⁴ Bay
 feyyii e dun, kanko mbatulaajo on e be o wondunoo ben, be jaami, be yari, be
 waali don.

Bay be immike bimbi, mbatulaajo on wi'i: «Newnanee lan non jooni, mi yiltitoo
 ka jom an.»

⁵⁵ Kono kotiraawo jiwo on e neene mabbe wi'i: «Accu men wonda e jiwo on doo
 taho, hay si ko balde sappo, ontuma on yahay.»

⁵⁶ Onsay mbatulaajo on jaabii ɓe: «Bay Joomiraado on okkii lan kutu e laawol an ngol, mi torike on, wota on tongan doo. Newnanee lan tun mi yiltitoo ka jom an.»

⁵⁷ Onsay ɓe jaabii mo: «Awa nodden jiwo on, landoden mo kanko kadi.» ⁵⁸ Be noddi Rifqatu, ɓe wi'i mo: «Hida yidi yaadugol e oo gorko?»

O jaabii: «Mi yahay.»

⁵⁹ Ontuma ɓe watti Rifqatu bandiraawo maɓbe on e laawol, o yaadi e debbo dankinoodo mo on wondude e mbatulaajo Ibraahiima on e worbe ɓe o wondunoo ben. ⁶⁰ Onsay ɓe du'anii Rifqatu, ɓe wi'i: «Ko an yo bandiraawo amen, yo a wontu guluuje guluuje, yo jurriya maa on halor kodooli aybe mun ben.»

⁶¹ Ontuma Rifqatu immodi e jiwbé wondibbe mun ben, ɓe yawi ka ngeloodi, ɓe jokki gorko on. Ontuma on mbatulaajo yaadi e Rifqatu.

⁶² Dun hawrondiri Issaaqa eggii ka o wonnoo don e takko nduu woynu wi'eteendu Woyndu Lahay-Ru'ii, tawi himo daakoyii e ndii leydi Negeeba.

⁶³ Kiikiideere goo, tawi Issaaqa no yalti fontugol koyde ka buruure, tun o banti gite, o haynii ngeloodi no ara. ⁶⁴ Onsay Rifqatu kadi banti gite, haynii Issaaqa. O jippii ka hoore ngelooba. ⁶⁵ O wi'i mbatulaajo on: «Ko hombo woni oo gorko mo wonden fottude e mun, no iwra ka buruure too?»

Onsay mbatulaajo on jaabii mo: «Ko koohoojo an on nii!» Ontuma Rifqatu yetti tiggaare mun nden, o tiggii.

⁶⁶ Mbatulaajo on fillitanii Issaaqa ko o wadoyi kon fow. ⁶⁷ Onsay Issaaqa nabii Rifqatu ka suudu yumma mun Saarata. O watti beyngu makko Rifqatu e suudu. O yidi mo. Ko nii Issaaqa yarlori faatunde yumma mun nden.

Fii Mayde Ibraahiima

25 ¹Ibraahiima resuno debbo goo kadi wi'eteedo Qatuuratu. ²On jibinani mo Zimraanu e Yuqsaanu e Madaani e Midyaani e Yisbaaqa e Suhaa. ³Ko Yuqsaanu kadi dajanaa Sabaa e Dedaanu. Bibbe Dedaanu ben ko Asuuriyanke'en e

Latuusiyanke'en e Le'uumiyanke'en.⁴ Bibbe Midyaani ben ko Ayfaa e Ifru e Hanuuka e Abiida e Aldaata. Awa ko bee doo fow woni bibbe Qatuuratu ben.

⁵ Ibraahiima yetti ko o jeynoo kon fow, o okki Issaaqa. ⁶ E fewndo ngurndan makko kanko Ibraahiima, o yeduno bibbe taaraabe makko ben gebe, o pottini be takko Issaaqa biddo makko on, o nawri be e leydi hikkorndi funnaange.

⁷ Ngurndan Ibraahiima dan fow hawri duubi teemedere e cappande jeedidi e jowi. ⁸ Ibraahiima foofi foofaango mun sakkitoro ngon, o faatii e hoore nayeewu hittungu, e nder yedeede ngurndan e balde, o tawtoyi maamaabe makko ben.

⁹ Issaaqa e Ismaa'iila bibbe makko ben wattinoyi mo e ndee fammeere Makfilati, wonde e mbaa ngesa Ifruuna mo Suhaara Hissiyankeej on, dun ko yeeso Mamra.

¹⁰ Ko mban ngesa Ibraahiima soodunoo e juude bee Hissiyankeeb. Ko don kanko Ibraahiima o belnidaa e beyngu makko Saarata. ¹¹ Bawto mayde Ibraahiima, Allaahu on wadi barki e Issaaqa biddo makko on, on hodunoodo takko nduu Woyndu Lahay-Ru'ii.

Fii Jurriya Ismaa'iila on

¹² E hino jurriya Ismaa'iila biddo Ibraahiima mo Haajirata Misirayankoojo on dajannoo Ibraahiima on, dun ko on kordo Saarata. ¹³ E hino inde bibbe Ismaa'iila ben wano be heccindiriri non: afo Ismaa'iila on ko Nabaayuuta, hikki don Qidaaru e Adab'iila e Mibsaama ¹⁴ e Mismaa'u e Duuma e Massa ¹⁵ e Hadaada e Tiima e Yatuura e Naafisa e Qidaama. ¹⁶ Ko bee doo woni bibbe Ismaa'iila ben, gila ka daakaaji mabbe haa nabani ka kodooli mabbe. Ko bee rimbe sappoo e dido doo wonnoo e hoore jamaaji mabbe din.

¹⁷ Ngurndan Ismaa'iila dan fow hawri duubi teemedere e cappande tati e jeedidi. O foofi foofaango makko sakkitoro ngon, o faatii, o tawtoyi maamaabe makko ben. ¹⁸ Ben Ismaa'iilaykeebe no hodunoo gila Hawiila haa nabani Suura, dun ko

ka funnaange Misira telen yaarugol Asuura. Be woni feereebe e telen-ma sibbe mabbe ben fow.

Fii Taariika Issaaqa e Jurriya mun on

¹⁹ E hino taariika Issaaqa biddo Ibraahiima on. Ibraahiima dani Issaaqa.

²⁰ Fewndo Issaaqa hebi duubi cappande nay, o resi Rifqatu, oo jiwu Batuu'iila Araamiyankeejo iwdo Fadaani-Araama. Tawi Rifqatu on ko bandiraawo Labaanu.

²¹ Issaaqa torii Joomiraado on fii beyngu mun, ko fii hari on jiidaaki. Joomiraado on jaabini tornde makko nden, beyngu makko Rifqatu yetti reedu. ²² Ben bibbe woni e guuwindirgol ka nder reedu neene mabbe. Onsay o wi'i: «Ko hondun woni lan hebude?» O yahi, o landoyii Joomiraado on.

²³ Onsay Joomiraado on daalani mo:

«Leyyí didi no ka nder reedu maa,
din jamaaji didi iwaydi e maa seedoyay.
Jamaa goo buroya oya doole,
awa kadi ko mawdo on kurkanoytoo tosooko on.»

²⁴ Bay saa'i jibingol makko hewtii, tawi ko funeebe o saawi. ²⁵ Tawi adaado jibineede on ko bodeejo, hari bandu makko ndun ko leebindu, be inni on don *Iisu. ²⁶ Bawto dun, mijan makko jibinaa. Tawi himo jogitii Iisu ka teddudi. Ko dun woni sabu be innude mo *Yaaquuba. Hari Issaaqa ko mo duubi cappande jeegoo fewndo o dajanaa ben.

²⁷ Bay ben faybe njandii, Iisu woni waajoowo, aaden buruure. Yaaquuba kajun woni aaden deeyudo, daakiido ka hodo. ²⁸ Issaaqa kajun yidi Iisu, bay hari teewu mbaroodi no welaynoo mo. Rifqatu kan yidi Yaaquuba.

²⁹ Nande goo tawi Yaaquuba no defude maafe. Iisu ari, no iwri ka buruure no weelaa fota. ³⁰ Onsay Iisu wi'i Yaaquuba: «Tinno jonnaa mi oo maafe bodeejo doo mi jaama, ko fii mido weelaa fota.» (Ko dun wadi si Iisu jammaa Aduuma.)

³¹ Yaaquuba jaabii mo: «Yeeyan taho afoyaagal maa ngal.»

³² Iisu jaabitii mo: «E hino mido e daande mayde, ko hondun ngal afoyaagal nafatammi?»

³³ Ontuma Yaaquuba wi'i mo: «Woondanan taho.» Onsay o woondani mo, o yeeyi Yaaquuba afoyaagal makko ngal. ³⁴ Ontuma Yaaquuba jonni Iisu bireedi e maafe nebbe. O naami, o yari, o immii, o yahi. Ko nii Iisu yawitori afoyaagal mun ngal.

Fii Yaadu Issaaqa ndun Garaara

26¹ Heege waduno e leydi Kanaana ndin kadi, hara wonaa ngee heege wadunoonge fewndo jamaanu Ibraahiima. Issaaqa yahi ka Abii-Maaliki lando Filistiyankeebé ben leydi Garaara. ² Joomiraado on feejani mo, daalani mo: «Wota a yahu Misira, luttu e ndii leydi ndi mi hollay-maa. ³ Kodo e ndii leydi doo, haray mi wonday e maa, awa kadi mi waday barki e maa, bay ko an e jurriya maa on mi okkoya dee leyde doo fow. Mi tabintinoya kadi woondoore nde mi woondannoo ben maa Ibraahiima nden. ⁴ Mi yajnjiray jurriya maa on wa koode den ka kammu, mi okka be kadi dee leyde fow. Leyyí aduna on fow barkinte sabu jurriya maa on, ⁵ sabu ko Ibraahiima softinoo kongol an ngol kon, o jabi ko mi farli mo kon e yamirooje an den e waajuuji an din e sariyaaji an din.»

⁶ Onsay Issaaqa hodí Garaara. ⁷ Bay worbe nden nokkuure landike mo fii beyngu makko, o wi'i be: «On ko bandiraawo an», ko fii hari himo huli wi'ugol: «Oo ko beyngu an», fii wota worbe nden nokkuure waru mo sabu Rifqatu, bay hari on ko labaado.

⁸ Bay non kanko Issaaqa o neebii kodaade ton, jande goo tawi Abii-Maaliki, oo lando Filistiyankeebé ben, no yurnora e dampukun, tun o haynii Issaaqa no mowla Rifqatu beyngu mun. ⁹ Onsay Abii-Maaliki noddi mo wi'i: «Eyoo, jaka ko sonna maa nii! Ko hondun non wi'andaa men ko bandiraawo maa?»

Issaaqa jaabii mo: «Ko mi wi'ani dun ko kulol wareede sabu makko.»

¹⁰ Abii-Maaliki wi'i: «Ko hondun wadandaa men dun? Seeda nii goddo e jamaa on waalida e sonna maa, harayno a wonii sabu bonnere amen.»

¹¹ Ontuma Abii-Maaliki yamiri jamaa on fow, o wi'i: «Kala fawudo jungo e oo gorko maa sonnaajo makko on, ontigi donkinirte mayde.»

¹² Issaaqa remi e ndin leydi, o sojiti e nden hitaande sowande teemedere ko o sankunoo kon, ko fii Joomiraado on wadii barki e makko. ¹³ O aldi, ngun ngalu makko beydii beydaadee haa o wonti tiidudo e ngalu. ¹⁴ Himo joginoo gureele na'i e dammi e jiyaabe duudube, dun fow woni sabu ko Filistiyankeebé ben nawliri mo. ¹⁵ Kala boyli di jiyaabe ben makko ben jasunoo e fewndo ngurndan ben makko Ibraahiima, Filistiyankeebé ben uddiri di leydi.

¹⁶ Ontuma Abii-Maaliki wi'i Issaaqa: «Yaltu ka amen, ko fii a burii men doole.»

¹⁷ Onsay Issaaqa yahi ka aynde Garaara, o hodsi don. ¹⁸ Kanko Issaaqa o jasitii boyli ndiyan jasanoodi fewndo ben makko Ibraahiima din, din di Filistiyankeebé ben uddunoo baawo faatagol Ibraahiima. O innitiri din boyli inde de ben makko innunoo di den.

¹⁹ Kurkotoobe Issaaqa ben jasi ka aynde don kadi, be hawri don e datal ndiyan laabudan. ²⁰ Kono ngaynaakoobe Garaara ben yeddondiri e ngaynaakoobe Issaaqa ben, hibe wi'a: «Ko menen jeyi dan ndiyan.» Ko dun wadi si o inni ndun woynu *Esek, ko fii be yeddondirno e makko.

²¹ Kurkotoobe Issaaqa ben jasi kadi woynu goo, be yeddondiri fii mayru don kadi. O inni ndun don *Sitiina. ²² O immii e nden nokkuure, o yahi, o jasoyi woynu goo. Ndun don non yeddondiral wadaali fii mayru. O inni ndun *Rahuubuuta, ko fii o wi'uno: «Jooni Joomiraado on yedii men nokkuure yaajunde, awa men bantoto e ndii leydi».

²³ O iwi don, o yahi Birsabaa. ²⁴ Joomiraado on feejani mo e on jemma, o daali: «Ko min woni Alla Ibraahiima ben maa. Wota a hulu ko fii mido wondi e maa, mi

barkinte, mi yanbay jurriya maa on sabu Ibraahiima kurkaadu an ndun.»

²⁵ Issaaqa darni don layyorde, o jantii innde Joomiraado on. O darni suudu makko bagi e nden nokkuure. Onsay kurkotoobe makko ben jasi don woyndu.

²⁶ Abii-Maaliki iwi Garaara, ari ka makko, wondude e oo gido makko wi'eteedo Ahuuata, e Fiikuula hooreejo konu makko ngun. ²⁷ Onsay Issaaqa wi'i be: «E ko hondun addi on ka an, bay on anuno lan, radidon mi ka mon?»

²⁸ Ben jaabii: «Men ndaarii, men tawii Joomiraado on no wondi e maa. Ko dun wadi si men wi'i: «Woondoore wonii hakkunde men, hakkunde amen e maa. Awa yettoden ahadi ²⁹ wondema a wadataa men hay fus ko boni, bay menen men tampinaano ma, ko moyyere tun men wadanno-maa, men acci yahudaa e dow buttu, an oo mo Joomiraado on wadi barki e mun fewndo doo.» »

³⁰ Onsay Issaaqa wadani be caatal, be nafii, be yari. ³¹ Ontuma be immii bimbi law, be woondindirani. Issaaqa watti be e laawol, be hooti e dow buttu.

³² Nden jande tigi kurkotoobe Issaaqa ben ari humpiti mo fii woyndu ndu be jasi ndun, be wi'i mo: «Men hebii ndiyen!». ³³ Issaaqa inni ndun woyndu *Sabaa, ko dun wadi si nden saare no innee haa jooni *Birsabaa.

³⁴ Ko ka Iisu hebunoo don duubi cappande nay, o tiggi Yahuudiita mo Biirii, on ko Hissyankeejo, e Basiimatu mo Ayluunu, on kadi ko Hissyankeejo. ³⁵ Laatii ben rewbe Iisu mettiti Issaaqa e Rifqatu.

Fii no Issaaqa Du'orani Yaaquuba

27¹ Hari Issaaqa nawyii fota, gite makko den nibbitii haa o accii yi'ude. Ontuma o noddi Iisu, afo makko on, o wi'i mo: «Biddo an!»

On nootii mo, o wi'i: «Naamu! E hino lan!»

² Issaaqa wi'i: «Mi nawyii, mi andaa nde mi maayata. ³ Yettu non jooni jogaaji maa din, dun ko laajal maa ngal e ndagaaje maa den, yahaa ka buruure

waajanoyaa mi mbaroodi.⁴ Moyyinanaa mi neema weldo, hara ko no mi faaliraa non, addanaa mi, mi jaama, fii yo mi du'ano-ma ado mi mayde.»

⁵ Tawi Rifqatu no heditinoo 6e fewndo Issaaqa yewtaynoo dün Iisu biddo mun on. Iisu yahi ka buruure fii waanjogol addana ben mun teewu mbaroodi.

⁶ Ontuma Rifqatu wi'i Yaaquuba biddo mun on wonde: «Hey, mi nanii ben maa no wi'a kotoo maa Iisu:⁷ Addanan teewu mbaroodi, moyyinanaa mi neema weldo, mi jaama, fii yo mi du'ano-ma yeeso Joomiraado on ado mi mayde.»⁸ Jooni non boobo an, hedo ko mi hollay-maa kon, wadaa ko mi yamiray-maa kon.⁹ Yahu ka wuro, addanoyaa mi be'oy labaakoy didoy, mi moyyinana ben maa en neema weldo, wano welirta 6e non.¹⁰ Yettaa dun, nabanaa ben maa en, 6e jaama, fii yo 6e du'ano-ma ado 6e faataade.»

¹¹ Onsay Yaaquuba jaabii yumma mun Rifqatu, o wi'i: «Awa, kono non kotoo an Iisu ko leebindo, min-le ko mi newdudo.¹² No gasa ka ben an en mowloyammi, 6e wi'a ko e jalugol 6e mi woni, mi addana hoore an kuddi, mi fada du'aa!»

¹³ Neene makko wi'i mo: «Yo ndin kuddi don rewtu e an, yo boobo an. An, hedito lan tun, yahu addanaa mi be'oy koy.»

¹⁴ O yahi, o yettoyi koy, o addani yumma makko, on moyyini neema weldo no welirta ben makko.¹⁵ Ontuma Rifqatu yetti conci Iisu afo makko on gurdi labeede din, wonnoodi e juude makko ka suudu din, o borni di Yaaquuba toolaajo makko on.¹⁶ O suumiri juude on den e daande nden guri be'oy koy, dun ko dii nokkeeli didi newdudi.¹⁷ Onsay o yetti neema weldo on e bireedi mo o moyyinnoo on, o jonni Yaaquuba biddo makko on.

¹⁸ On yahi, tawi ben mun, o noddi mo, o wi'i: «Baaba en!»

Issaaqa nootii mo, wi'i: «Naamu, e hino lan! Ko hombo e 6ibbe an 6en nii?»

¹⁹ Yaaquuba wi'i ben mun: «Ko min Iisu, afo mon on nii! Mi wadii ko wi'udon mi kon. Bañee, mi torike on, toolodon, nafodon teewu mbaroodi an ndin fii yo on du'ano lan.»

²⁰ Issaaqa wi'i biddo mun on: «Eppa, a yaawii heboyde dun nee, biddo an!»

Yaaquuba jaabii: «Ko bay Alla Joomiraado mon on hawrindinii lan e mun.»

²¹ Issaaqa wi'i Yaaquuba: «Awa, bado lan mi mowle, yo biddo an, mi anda si tawii ko an Iisu nii maa si hinaa.» ²² Yaaquuba battii ben mun Issaaqa, o mowli mo, o wi'i: «Hawa kan ko hawa Yaaquuba, kono juude den ko juude Iisu.» ²³ Kono o anditaali mo bay juude makko den no leebiniri wa kotoo makko Iisu, o du'anii mo. ²⁴ O wi'i mo: «Hara ko an tigi woni Iisu biddo an on?»

O jaabii: «Ko min nii.»

²⁵ Issaaqa wi'i: «Bannanan mi jaama oo teewu mbaroodi, yo biddo an, fii yo mi du'ano-ma.»

Yaaquuba bannani ben mun Issaaqa, o jaami, o addani mo kadi njaram, o yari.

²⁶ Ontuma Issaaqa ben makko wi'i mo: «Bado lan, lunnodaa mi, yo biddo an.»

²⁷ O badii, o lunni mo, Issaaqa anditi barngol oya ngol e conci din. Ontuma o du'anii mo, o wi'i: «Ka haqiiqa, ngol barngol oo biddo an no wa'i wa urngol ngesa mba Joomiraado on wadi barki e mun.» ²⁸ Yo Allaahu on okke caawa kammu ngun e nguureeji leydi ndin, wondude e nende e njaramji kesi haa duuda. ²⁹ Yo jamaaji dofto ma, yo leyiyi jiccano ma. Yo a wonu hooreejo musibbe maa ben, yo neene-gootoobe maa ben fow jiccano ma. Kala hududo ma yo wonu hudaado, kala du'aniido ma yo wonu du'anaado.»

³⁰ Fewndo Issaaqa gayni du'anaade Yaaquuba, ko Yaaquuba yaltata ka ben mun Issaaqa, tun Iisu iwti ka waajio. ³¹ Kanko kadi o moyyini neema weldo, o nabani ben makko. O wi'i ben makko: «Baaba en, awa, bañee nafodon teewu mbaroodi biddo mon on fii yo on du'ano lan.»

³² Issaaqa ben makko wi'i mo: «Ko an hombo nii?»

O jaabii: «Ko min Iisu, biddo mon afo on.»

³³ Issaaqa diwni diwnol tiidungol fota, o wi'i: «Ko hombo-le yahi waajoyi addanimmi teewu mbaroodi, mi jaami fow ado a arude, mi du'anii mo? Pellet o wonay barkinaado.»

³⁴ Bay Iisu nanii kongudi ben mun din, o sonki sonko tiidungo, mettungo fota, o wi'i ben makko: «Du'anee lan min kadi, yo baaba en!»

³⁵ Issaaqa jaabii: «Mijan maa ardii yoyre, o jattii du'aa maa on.»

³⁶ Iisu wi'i: «E hara ko fii ko *Yaaquuba o innetee wadi si o daynirimmi nii dii laabijji didii non? O yettiino lan afoyaagal ngal, jooni kadi e hino o jattii du'aa an on.» O wi'i kadi: «Hara on maranaa lan du'aa goo?»

³⁷ Onsay Issaaqa jaabii Iisu, wi'i: «E hino jooni mi wadii mo hooreejo maa, mi wadii sibbe makko 6en fow kurkantoo6e mo, mi neeminirii mo nende e njaramji kesi. Ko hondun non mi waawi wadande ma jooni, yo biddo an?»

³⁸ Iisu wi'i ben mun: «Hara ko du'aa gooto pet mardon, baaba en? Du'anee lan min kadi yo baaben!» Onsay Iisu nangi e fesugol town.

³⁹ Ben makko Issaaqa jaabii mo, wi'i: «Galle maa den wodditoto nguureeji leydi ndin e caawa kammu ngun. ⁴⁰ Ko kaafa maa kan wurnete, a kurkanto mijan maa. Kono e nder ko wembotodaa kon, a kolmbitoyay kolombowal makko ngal ka daande maa.»

Fii no Yaaquuba Dogiri Labaanu

⁴¹ Iisu marani Yaaquuba ngayngu sabu du'aa mo ben ma66e du'aninoo mo on. Iisu wi'i ka bernde mun: «Nande sowru mayde ben an sowti woo, mi waray mijan an Yaaquuba.»

⁴² Onsay Rifqatu humpitii kongudi Iisu afo makko on, o noddi Yaaquuba toolaajo makko on, o wi'i mo: «Awa, kotoo maa Iisu no faala-maa yottorde warugol ma.

⁴³Jooni non hedo lan, yo booboo an. Immo dogaa, yahaa Haraana ka kotoo an Labaanu, ⁴⁴wonoyaa ka mabbe taho haa tikkere kotoo maa nden rippoo. ⁴⁵Nde seytaane makko iwoyi e hoore maa woo, o yejjiti ko wadudaa mo kon, mi imminoyay ko artiroye. Hara ko fii hondun fuutorton mi on didoo non jande wootere?»

⁴⁶Rifqatu wi'i Issaaqa kadi: «Ngurndan an dan mettitii lan sabu bee jiwbé Hissiyankeebe. Si Yaaquuba kadi resii Hissiyankeejo, wa'udo wa bee jiwbé doo, haray ko fii hondun mi wuuranta hande kadi?»

28 ¹Issaaqa noddi Yaaquuba, du'anii mo, o yamiri mo, o wi'i: «Wota a resu debbo Kanaaniyankeejo woo. ²Immo, yahaa Fadaani-Araama, ka soro maa Batuu'iila, yettoyaa ton jiwé e hakkunde gedalbe kaawu maa Labaanu ben. ³Yo Allaahu Jom Bawgal on wadu barki e maa, o duddina jiidi maa ndin, o yajne yajnudee, fii no wontiraa moftal jamaaji. ⁴Yo Allaahu on yedide e jurriya maa on kii barki ki o yedunoo Ibraahiima fii yo a halor ndii leydi ndi wondaa kodo e mun, ndin ndi Alla yedunoo Ibraahiima.» ⁵Issaaqa immini Yaaquuba fii yahugol Fadaani-Araama, ka Labaanu biddo Batuu'iila Araamiyankeejo on, on ko bandiraawo Rifqatu, yumma Yaaquuba e Iisu.

⁶Bay Iisu ndaarii tawii Issaaqa du'anike Yaaquuba, o imminii mo Fadaani-Araama fii resoygol ton debbo, o ndaari kadi o tawi fewndo ko Issaaqa du'antonoo mo, o yamirno mo, o wi'i: «Wota a resu debbo Kanaaniyankeejo», ⁷o tawi kadi Yaaquuba doftike ben mun e yumma mun, o yahii Fadaani-Araama, ⁸kanko Iisu o faamii kadi wonde bee jiwbé Kanaaniyankeebe no metta ben makko Issaaqa, ⁹ko dun wadi si o yahi haa ka Ismaa'iila, o resoyi ton debbo no wi'ee Mahalatu, on ko bandiraawo Nabaayuuta, biddo Ismaa'iila mo Ibraahiima, o tawtini mo beya rewbe makko.

Fii Koydol Yaaquuba ngol

¹⁰ Yaaquuba iwi Birsabaa, o sutanii Haraana. ¹¹ O hewti e nokkuure, o waali don, ko fii hari naange ngen mutoyii. O yetti hayre e nden nokkuure ko o awloo, o waalii. ¹² O hoydi bargal no darii ka leydi, juggoyii ka kammu. Malaa'ikaabe Alla ben no wada don yawa tippoo.

¹³ Tawi Joomiraado on no e hoore ngal bargal, o daali: «Ko min woni Joomiraado on, on Alla maama maa Ibraahiima e Alla Issaaqa. Ko ndii leydi ndi waalidaa e mun mi yedete, an e jurriya maa on. ¹⁴ Jurriya maa on duudiray wa mbullaari ndin ka leydi, a layiray nano e jaamo, hirnaange e funnaange. Awa kadi bolondaaji aduna on fow barkinte sabu maa, an e jurriya maa on. ¹⁵ Awa andu, min tigi mido wondi e maa, mi reenete kala ka yaarudaa, mi artire kadi e ndee nokkuure, ko fii mi selataa ma fannin mi hunnaali ko mi fodu-maa kon.»

¹⁶ Ontuma Yaaquuba fini e nder ngol koydol, o wi'i: «Pellet, Joomiraado on no e ndee nokkuure, hari-le min mi andaano dun!» ¹⁷ O huli, o wi'i: «Eppa ndee nokkuure no hulbinii nee, hinaa hay fus nii ko hinaa suudu Alla, doo ko dambugal kammuuli din nii!»

¹⁸ Yaaquuba immii bimbi law, o yetti nden hayre nde o awlinoo, o darni nde, o maandini, o hibbi nebban e hoore mayre. ¹⁹ O inni nden nokkuure Bayti'iila. (Kono hari nden saare ko Luuzu wi'etee.)

²⁰ Yaaquuba woondani Allaahu on, o wi'i: «Si tawii Allaahu on no wondi e an, o reenii lan e ngol laawol ngol mi yahata e mun doo, o neeminii lan, o okkii lan ko mi bornoo, ²¹ e si mi hewtitii ka galle ben an e jam, haray Joomiraado on wonay Alla an. ²² Ndee nokkuure ka ndee hayre nde mi maandini, darii doo, wonay suudu Alla. E hoore dun, mi okkay Alla sappabun e kala ko o okkimmii kon haa timma.»

Fii Kodu Yaaquuba ngun ka Labaanu

29

¹ Yaaquuba nangiti datal, o yaari ka leydi bee yimbe funnaange. ² O yi'i woyndu ka buruure, tawi gure tati dammi no waalii e binde mayru, tawi ko e ndun woyndu di woowaa yarneede. Tawi omborde mayru on ko hayre njande. ³ Tuma gureele den fow jajnaa, hayre nden tallee, dammi din yarnee, onsay nde wattee ka hoore woyndu.

⁴ Yaaquuba wi'i ngaynaakoobe ben: «Musibbe, ko on be honto?»

Ben jaabii: «Ko men be Haraana.»

⁵ O wi'iti be kadi: «Hara hidon andi Labaanu taaniraawo Naahuura on?»

Be jaabii: «Meden andi mo.»

⁶ O wi'i be kadi: «Hara himo e jam?»

Be jaabitii: «Himo e jam! E hino daa toode Raahiilu jiwo makko on ka hewtidata e dammi makko din.»

⁷ Onsay Yaaquuba wi'i: «Jooni non siwaa nibbude, hewtaali taho ka gure den janjetee. Yarnee dammi din, yahon ornon di.»

⁸ Be jaabii: «Men waawataa wadude diun ado gure den fow jajneede, ko onsay men tallata hayre ombirde woyndu ndun, si men yarna dammi din.»

⁹ Ko fewndo o yewtidata e mabbe, Raahiilu hewtidi e dammi ben mun din bay kanko kadi ko o ngaynaako. ¹⁰ No Yaaquuba yi'irnoo Raahiilu, jiwo Labaanu bandiraawo yumma makko on, wondude e dammi Labaanu din, o battoyii kisan, o talli hayre ombirde woyndu ndun, o yarni dammi kaawu makko Labaanu din.

¹¹ Ontuma Yaaquuba lunnii Raahiilu, o wulli weltaare. ¹² Yaaquuba andini Raahiilu ko o musiddo ben makko, awa kadi ko o biddo Rifqatu. On jiwo dogi kisan, humpitoyi dun ben mun.

¹³ No Labaanu kadi nanirnoo ndun ardu Yaaquuba, on biddo bandan makko, o dogi kisan jaabagol mo. Bay o tawtii mo, o hirbii mo, o lunnii, o nabi mo ka galle makko, onsay Yaaquuba fillitanii kaawu mun Labaanu ko feyfi kon fow.

¹⁴ Ontuma Labaanu wi'i mo: «Pellet, ko en endan e yiyan gootan.» Onsay Yaaquuba wondi e makko lewru.

Fii no Yaaquuba Resiri Raahiilu e Layyatu

¹⁵ Onsay Labaanu wi'i Yaaquuba: «Hara ko fii ko a musiddo an yangorantaa mi nii tun? Yeeto lan ko gasetedaa yobeede.»

¹⁶ Tawi Labaanu no mari jiwbe dido. Afo on no wi'ee Layyatu, toolaajo on no wi'ee Raahiilu. ¹⁷ Layyatu ko fota-ndardeejo, kono Raahiilu kajun ko labaado, fota-ŋariijo.

¹⁸ Tawi Yaaquuba no yidi Raahiilu, o wi'i: «Mi kurkanto on duubi jeedidi fii yo on okkan Raahiilu toolaajo mon on.»

¹⁹ Labaanu wi'i: «Ndikkanammi okkugol ma mo edii okkugol mo goddo goo. Wonu ka an doo!» ²⁰ Ontuma Yaaquuba kurkanii mo duubi jeedidi fii resugol Raahiilu, dun wa'ani mo wa balde seedaaje nii, hakkee ko o yidunoo mo.

²¹ Bay feyfii e dun, Yaaquuba wi'i Labaanu: «Wattidee lan non e beyngu an ko fii ahadi men ndin timmii, mi faalaama wontitude e makko.»

²² Labaanu moobindiri yimbe nokkuure nden fow, o wadi caatal. ²³ Bay jemmii, o yetti Layyatu jiwo makko on, o nabani Yaaquuba, o yiidi e makko. ²⁴ Labaanu jonni Layyatu kordo mun no wi'ee Zilfatu ko kurkanoo mo. ²⁵ Bay weetii Yaaquuba tawi ko Layyatu. O wi'i Labaanu: «E ko hondun wadudon mi? Wonaa fii Raahiilu mi yanganii on? Ko fii hondun daynandon mi?»

²⁶ Labaanu wi'i: «Sifa dun wadetaake ka amen, okkitirgol toolaajo on ado afo on.

²⁷ Timmindin yontere nden e oo doo, onsay men okkoyte oya kadi, fii ko yangoytoda kon ka an doo duubi jeedidi kadi.»

²⁸ Yaaquuba wadi dun, o lannintinodi yontere nden e Layyatu. Ontuma Labaanu okki mo non Raahiilu toolaajo mun on, on kadi woni beyngu makko. ²⁹ Labaanu jonni Raahiilu kordo mun goo no wi'ee Bilhatu ko kurkanoo mo. ³⁰ Yaaquuba

watti Raahiilu e suudu, o yidi mo buri Layyatu. O golliti ka Labaanu e nder duubi jeedidi kadi.

Fii Bibbe Yaaquuba ben

³¹ Bay Joomiraado on tawii Layyatu ko ajaado, o wadi mo jiidotoodo. Tawi Raahiilu kajun hinaa jiidotoodo. ³² Layyatu yetti reedu, o jibini booboo gorko, o inni on booboo *Ruubaynu, ko fii o wi'uno: «Joomiraado on yi'ii tampere an nden, jooni non moodi an yiday lan.»

³³ O yetti reedu kadi, o jibini booboo gorko, o wi'i: «Joomiraado on nanii wondema ko mi ajaado, o yedii lan oo doo kadi.» Layyatu inni ondon *Sim'uunu.

³⁴ O yetti kadi reedu, o jibini booboo gorko. O wi'i: «E ngal doo non, moodi an bannitay lan ko fii mi jiidanike mo bibbe tato worbe.» Ko dun wadi si ondon innaa *Lewi.

³⁵ O yettiti fahin reedu, o jibini booboo gorko, o wi'i: «E ngal doo non mi mantii Joomiraado on.» Ko dun wadi si o inni ondon *Yahuuda. O acciti jiidagol fewndo don.

30 ¹ Bay Raahiilu tawii jiidanaaki Yaaquuba, onsay o nawli jaaja makko. O wi'i Yaaquuba: «Jonnan, min kadi bibbe, si hinaa dun mi maayay!»

² Bernde Yaaquuba metti kisan, o wi'i Raahiilu: «Hara ko min woni Alla, on salaniido ma jiidi?»

³ Raahiilu wi'i mo: «E hino doo Bilhatu, kordo an on, yiidu e makko, o jibinanammi ka hoore koyde an doo, min kadi mi heba bibbe immorde e makko.»

⁴ O okki mo Bilhatu, kordo makko on, ko wonana mo beyngu, Yaaquuba yiidi e makko. ⁵ Ontuma Bilhatu yetti reedu, o jibinani Yaaquuba booboo gorko. ⁶ Raahiilu wi'i: «Bay Allaahu on jaawiranii lan nii, o jaabinanii lan, o yedii lan booboo gorko.» Ko dun wadi si o inni on booboo *Daana.

⁷ Bilhatu, on kordo Raahiilu, yetti fahin reedu, o jattorani mo boobo gorko.

⁸ Raahiilu wi'i: «Mi gertike jaaja an ko tiidi, haa mi wawtike mo.» O inni on boobo don *Naftali.

⁹ Bay Layyat kadi tawii accii jiidi, o yetti Zilfatu, kordo makko on, o okki Yaaquuba ko wonana mo beyngu. ¹⁰ Zilfatu, kordo Layyat on, jibinani Yaaquuba boobo gorko. ¹¹ Layyat wi'i: «Mi arsikaama!» O wi'i on boobo *Gaada.

¹² Zilfatu, kordo Layyat on, jattorani Yaaquuba boobo gorko. ¹³ Layyat wi'i: «Eppa mi malii! Rewbe ben wi'ay ko mi malaado.» O inni on boobo *Asiira.

¹⁴ Ruubaynu yalti fewndo sonitugol ngawri, o tawi ledde lekki jiidi ka ngesa, o addorani den neene makko Layyat. Ontuma Raahiilu wi'i Layyat: «Mi torike ma, okkoran dee ledde lekki jiidi de oo biddo maa addan-maa!»

¹⁵ On jaabii mo: «Kere ko jattudaa moodi an kon yonaali ma haa ka yettaa kadi dee ledde lekki jiidi de oo biddo an addanimmi?»

Ontuma Raahiilu jaabii: «Awa jooni on yiiday e nder oo jemma doo fii yo mi hebu biibbe ledde de oo biddo maa addan-maa.»

¹⁶ Kiikiide ko moodi mabbe Yaaquuba iwtata golle, Layyat yalti, jaabii mo, wi'i: «Ko ka an naatirton, ko fii ko ledde lekki jiidi de biddo an on addanimmi den mi tolmiri on.» O waaliri ka makko nden jande.

¹⁷ Allaahu on jaabinani Layyat, o yetti reedu, o jibinani Yaaquuba boobo gorko njowabo on. ¹⁸ Layyat wi'i: «Allaahu on yobii lan sabu ko mi okki moodi an en oo kordo an kon.» O inni mo *Yassaakara.

¹⁹ Layyat yetti kadi reedu, o jibinani Yaaquuba boobo gorko njeegaboo on.

²⁰ Onsay Layyat wi'i: «Allaahu on okkii lan dokkal moyyal. E ngal doo non moodi an teddinay lan, ko fii mi jiidanike be worbe njeegoo.» O inni mo *Zabuluunu.

²¹ Bawto dñun, o jibinoyi non boobo jiwo, o inni mo Diinatu.

²² Onsay Allaahu on yeiyítii non Raahiilu, o jaabinani mo, o newnani mo jiidagol. ²³ Onsay o yetti reedu, o jibini booboo gorko. O wi'i: «Allaahu on ittanii lan kaa hersa an.» ²⁴ O inni on booboo *Yuusufu, o wi'i: «Yo Joomiraado on beydanan booboo gorko kadi.»

Fii Wuro Yaaquuba ngon

²⁵ Bay Raahiilu jibinii Yuusufu, Yaaquuba wi'i Labaanu: «Jooni non newnanee lan mi hoota ka leydi an, ²⁶ accon mi nabora rewbe an e bibbe an be mi yanganii on fii mun ben, bay onon tigi hidon gelii yangi ki mi yanganii on kin.»

²⁷ Onsay Labaanu wi'i mo: «Mido faalaa yo a sulfinanan wonaa doo, ko fii mi taskike mi tawii ko sabu maa Joomiraado on wadiri barki e an. ²⁸ Jooni non hottano lan njoddi maa ndi faaladaa ndin, mi jonnete.»

²⁹ Yaaquuba wi'i mo: «Onon tigi hidon andi no mi yangorani on e ko honno wuro mon ngon kadi yepiri e juude an, ³⁰ ko fii dii seedaaji di marnodon ado mi arde doo beydike fota jooni. Awa kadi ko gila mi hewti ka mon doo Joomiraado on wadi barki e mon. Jooni non ko honde tuma min kadi mi yangantoo beynguure an nden?»

³¹ Onsay Labaanu wi'i mo: «Hara ko hondun mi jonnete?»

Yaaquuba jaabii: «Wota on jonnañ hay huunde. Si tawii on wadaniñ lan ko mi wi'oyta on kon, mi ornay fahin dammi mon din, mi aynana on di kadi. ³² Hande yo mi yahu ka wuro, mi suba, mi hikkindira kala dammi wondudi e tobbe e baade, e kala baalii lahii e hakkunde baali din, e kala mbeewa wondumba e baade e tobbe e hakkunde be'i din. Haray ko dindon wonata njoddi an ndin. ³³ Nundal an ngal andoyto tuma seenidon tinugol ko gasata wonude njoddi an ndin kon. Kala di tawoydon aldaa e baade maa tobbe e hakkunde be'i din, e kala baalii ngii tawata wonaa lahii e hakkunde baali din, haray wonanii lan nguyka.»

³⁴ Labaanu wi'i: «Awa, yo woniran en no wi'irdaa non.» ³⁵ Nden jande tigi Labaanu hikkindiri kala ciikuliji wonduisi e ciifi e baade, e kala deyi wonduisi e tobbe e baade, maa rawnitaydi, e kala baali lahi e hakkunde baali din, o watti di e juude bibbe makko worbe ben. ³⁶ Ontuma o wodditor Yaaquuba ka yaaretee balde tati. Onsay Yaaquuba lutti don e aynugol dammi Labaanu heddiidi din.

³⁷ Yaaquuba yetti caldi kecci noone ledde tati, o ciifi di haa ko rawni kon yaltiti.

³⁸ Ontuma o yetti din caldi ciifaadi, o wadi di ka nder kunnaaje yarirde yeeso ka dammi din yarata don nde hidji ara yarugol. Nde di ari yarugol, hara hidji siwrani hubindirgol, ³⁹ di hubindira yeeso din caldi, di rima bikkoy koy ciifi maa tobbe maa baade.

⁴⁰ Yaaquuba pottina bikkoy koy feere, o fewtina dammi heddiidi din hella dammi Labaanu wadudi ciifi din e bawlitaydi din. Ko non o hebiri gure feereeje, o bannindiraali di e dammi Labaanu din. ⁴¹ Tuma woo nde dammi yeddudi din faalaa wondineede, Yaaquuba wadayno din caldi ka nder kunnaaje yeeso din dammi fii yo di hubindir yeeso din caldi. ⁴² Si o tawii dammi din no nooki, o wadataa din caldi ka kunnaaje. Ko wano non, nookudi din wontirani Labaanu, yeddudi din wontirani mo kanko Yaaquuba. ⁴³ Ko e nder dun, jawle makko den yaaji fota, o hebi dammi duududi, e kurkaaduube worbe e rewbe, o hebi ngeloodi e mbabbi kadi.

Fii no Yaaquuba Yiltitori Kanaana

31 ¹ Yaaquuba nani kongudi bibbe Labaanu ben, ben no wi'a: «Yaaquuba yettii ko ben men marnoo kon fow, ko ndii jawdi ben amen o hebiri dee jawle doo fow.»

² Yaaquuba ndaari tawi ndarde Labaanu den wa'anaa mo wano woowiri non.

³ Ontuma Joomiraado on daalani Yaaquuba: «Yiltito ka leydi baabiraabe maa ben, ka musidal maa, mi wonday e maa.»

⁴ Yaaquuba nulani Raahiilu e Layyatu yo ɓen yahu, ɓe fottoya ka wuro makko.

⁵ O wi'i ɓe: «Mi ndaarii mi tawii ndarde ben mon den wa'anaa lan wano woowiri non, kono min, Alla ben an on no wondi e an. ⁶ Onon tigi hidon andi mi yanganike ben mon, beru doole an den fow. ⁷ Awa kadi ben mon janfike lan, o yiltindirii njoddi an ndin laabi sappo. Kono Allaahu on newnanaali mo wadugol lan ko boni. ⁸ Si o wi'uno: ‹Tobbaadi din wonay njoddi maa›, harayno dammi din fow rimayno tobbaakoy. Si o wi'uno kadi: ‹Ciifindi din fow wonay njoddi maa›, harayno dammi din fow rimayno ciifinkoy. ⁹ Ko non Allaahu on jabitiri wuro ben mon ngon e juude makko, o yedimmi.

¹⁰ «Bay saa'i ka dammi din hubindiraynoo dɔn hewtii, mi hoydi ciikuliji wondinaynoodi din no wadi ciifi e tobbe e baadoy. ¹¹ Malaa'ikaajo Allaahu on wi'immi e nder ngol koydol: ‹Yaaquuba!›

«Mi jaabii: ‹Naamu, e hino lan!›

¹² «O wi'i kadi: ‹Bantu gite maa dən, ndaaraa, ciikuliji wondi wondinde din fow ko wadudi ciifi e tobbe e baadoy, ko fii mi yi'ii ko Labaanu wadu-maa kon fow. ¹³ Ko min woni Alla on daalannoodo ma e ndee nokkuure Bayti'iila nde darnunodaa hayre e mun, maandinirdaa hibbugol nebban e hoore mayre, ka wadannodaa mi don woondoore. Jooni non, immo, yaltaa e ndii leydi, hootaa ka jibinadaa ton.» »

¹⁴ Onsay Raahiilu e Layyatu jaabii moodi mun: «Taw si meden mari kadi ndondi maa gebal ka galle ben amen doo? ¹⁵ Taw si ben amen wadaano men jananbe? Ko fii ɓe yeeyiino men, ɓe jaamii coggu amen ngun. ¹⁶ Kala jawdi ndi Allaahu on yetti e juude ben amen, ko menen e bibbe amen ɓen jeyi. Jooni non, wadee kala ko Allaahu on daalani on.»

¹⁷ Onsay Yaaquuba immii, yawni bïbbe makko ïen e rewbe makko ïen ka hoore ngeloodi. ¹⁸ O nabori gureele makko ïen fow, e kala jawle de o moobunoo Fadaani-Araama, o yaari ka ben makko Issaaqa, dun ko e ndii leydi Kanaana.

¹⁹ Ko fewndo Labaanu yahi tayoygol leebi dammi mun din, Raahiilu ari wujji sanamuaji ben mun din. ²⁰ Yaaquuba kajun janfii Labaanu, Araamiyankeejo on, bay o banginanaali mo eggudu makko ndun. ²¹ O immii, o dogidi e kala ko o marnoo, o lumbi maayo ngon, o yaari ka pelle Galaada.

Fii no Labaanu Jokkitiri Yaaquuba

²² Ka jallal tammal, Labaanu andinaa wonde Yaaquuba dogii. ²³ Onsay Labaanu immodi e musibbe mun ïen, ïe jokkiti mo e nder balde jeedidi, ïe tawoyi mo ka pelle Galaada. ²⁴ Kono e nder jemmaare, Allaahu on feejani Labaanu, on Araamiyankeejo, e nder koydol, o daalani mo: «Reeno yewtoygol Yaaquuba ko woni woo, woni bonii woni moyyii.»

²⁵ Bay Labaanu hewtitike Yaaquuba, tawi Yaaquuba darnii suudu makko bagi ndun ka hoore fello. Labaanu e musibbe mun ïen kadi darni ka pelle Galaada don.

²⁶ Onsay Labaanu wi'i Yaaquuba: «Ko hondun wadudaa? Ko fii hondun janfanidaa mi, si soggiraa jiwbé an ïen wa kasooße hare? ²⁷ Ko hondun moltanidaa dogudaa, suudidaa mi, a andinaali lan? Andu-le mi newnanteno yahaa e nder yima ama, hada korli, senyina talinji. ²⁸ E ngal doo a gerdi komoyaagal, bay a newnanaali lan waynondirgol e jiwbé an ïen e taaniraabe an ïen. ²⁹ Mido marnoo feere wadugol on ko boni, kono e oo jemma feyyudo, Alla ben maa on daalanno lan, o wi'i: <Reeno yewtoygol Yaaquuba ko woni woo, woni bonii woni moyyii!> ³⁰ Jooni non, a yahii yahudee sabu sawteende galle ben maa den, kono ko fii hondun non wujjandaa mi allaaji an din?»

³¹ Onsay Yaaquuba jaabii Labaanu, o wi'i: «Hari mido huli wota on jattitanan jiwbé mon ïen. ³² Kono non kala on mo yiirudon allaaji mon din ko rammoowo!

Jooni non ndaaree e yeeso bee musibbe men doo, kala ko jeydon ka an doo, yetton.» Kono tawi Yaaquuba andaa wonde Raahiilu wujjiino allaaji din.

³³ Onsay Labaanu naatoyi ka suudu bagi Yaaquuba e ka suudu Layyat e ka suudu horbe ben, o yiitaali hay huunde. O yalti ka suudu Layyat, o naati ka suudu Raahiilu. ³⁴ Tawi Raahiilu yettiino sanamuji din, o suudii di ka hirke ngelooba mban, o joodike e hoore majji. Labaanu dabbiti e nder suudu ndun fow, o yiitaali hay huunde. ³⁵ Onsay Raahiilu wi'i ben mun: «Wota on tikku yo baaba en fii ko mi immaaki kon ka mi joodii doo, ko fii mido wondi e farilla.» Ben makko Labaanu dabbiti sanamuji din, yiitaali.

³⁶ Tikkere Yaaquuba nden beydii, o yeddondiri e Labaanu. Onsay Yaaquuba jaabii Labaanu, o wi'i: «Ko hondun mi bonni, e ko junuubu hombo mi wadi, si jokkiron mi bernde sattunde? ³⁷ Bay on ndaarii e nder pawle an den fow, ko hondun yi'udon e ko jeyaa ka suudu mon? Hollon mi dun tigi e yeoso sibbe men ben doo, be wona seedee hakkunde men, enen dido. ³⁸ Gila mi ari ka mon doo hebii nii duubi noogay, hay nde wootere be'i mon din e baali mon din hawkiali. E hoore dun kadi mi jaamaali ga'i baali wuro mon ngon. ³⁹ Awa kadi si dammol waranooma e ladde, mi artirantaano on, haray ko min fawtinoo dun. E hoore dun, on landitotono lan kala ko wujja e nder mun, jemma e jalorma. ⁴⁰ E hino no mi wonirnoo, jallal ngal fow nguleendi no piyammi, jemma on fow mido ngoba jaangol haa norre an fow fuutoo mi. ⁴¹ Ko dundoo mi feyini e nder dii duubi noogay ka galle mon. Mi kurkanike on duubi sappo e nay fii resugol jiwbé mon ben dido, duubi jeegoo fii hefugol ka dammi mon, e hoore dun on yiltindirii njoddi an ndin laabi sappo. ⁴² Si Alla ben an, on Alla Ibraahiima, on Alla mo Issaaqa hulata, wondaano e an, on accitayno lan e hoore jungo meho. Kono Allaahu on yi'i tampere an nden e yangi juude an den, onsay o heyi hakkunde men hanki jemma.»

⁴³ Onsay Labaanu wi'i mo: «Bee rewbe ko bibbe an, bee bibbe mabbe ko taaniraabe an, ngoo wuro ko wuro an, e kala ko yi'udaa doo ko min jeyi. Hara hande ko hondun mi waawi wadande bee bibbe an rewbe e bee bibbe mabbe be be jibini? ⁴⁴Jooni non, aru enen dido, yettoden ahadi, ko wona seedee hakkunde an e maa.»

⁴⁵ Ontuma Yaaquuba yetti hayre, o darni nde fii maandingol. ⁴⁶Yaaquuba wi'i musibbe mun ben: «Moobee kaaye.» Be hocciaa kaaye, be wadi mowre. Be joodii e hoore nden mowre, be nafii. ⁴⁷Labaanu toddii nden nokkuure *Yagar-Sahaduuta. Yaaquuba kajun inni nden nokkuure Galiidu.

⁴⁸ Labaanu wi'i: «Ndee mowre doo wonii seedee hakkunde men hande.» Ko dun wadi si don innaa *Galiidu. ⁴⁹Don no wi'ee kadi Misfaata, bay Labaanu wi'uno: «Yo Joomiraado on aynu hakkunde men tuma wirnondirsen. ⁵⁰Si a tilfii bibbe an rewbe ben, maa a resii rewbe goo, a wattii e mabbe, haray wonaa neddo wonata hakkunde men, maanditodaa wonde ko Alla wonata seedee hakkunde men.»

⁵¹ Ontuma Labaanu wi'i Yaaquuba kadi: «E hino doo ndee mowre kaaye e ndee hayre dariinde de mi wadi hakkunde men. ⁵²Ndee mowre e ndee hayre ko seedee. Mi yawtataa ndee mowre mi yaara ka maa, an kadi wota a yawtu ndee mowre ardaa ka an fii wadugol bone. ⁵³Yo Alla Ibraahiima on, on Alla Naahuura, on Alla ben mabbe, jaawu hakkunde men.»

Yaaquuba woondiri Alla, on mo ben makko Issaaqa hulata. ⁵⁴Onsay Yaaquuba itti sadaka ka fello don, o nodditi musibbe makko ben fii nafagol. Be nafii, be waali ka fello don.

32¹ Bimbi nden nande Labaanu immii law, o hirbii bibbe makko ben e taaniraabe makko ben, o du'anii be. Ontuma o immii fii hootugol ka makko. ²Yaaquuba kadi nangiti laawol mun. Malaa'ikaabe Alla ari fotti e makko. ³Bay Yaaquuba yi'ii be, o wi'i: «Doo ko daaka Allaahu!» O toddanii nden nokkuure innde *Mahanayiima.

Fii Nulal Yaaquuba ngal e Iisu

⁴ Yaaquuba nuli wobbe ko hikkoo yeeso makko yaha ka kotoo makko Iisu e ndii leydi Sa'iira, ka fulawaa Aduumma. ⁵ O yamiri ɓe, o wi'i: «E hino ko wi'oyton Iisu koohoojo an on kon: <Yaaquuba nduu kurkaadu mon wi'ii wonde: Ko haa hande mi kodinoo ka kaawu an Labaanu. ⁶ Mido jogii na'i e dammi e mbabbi e kurkaaduube worbe e rewbe. Mi imminii ko andinoya on onon koohoojo an on fii yo on sulfinanana.» »

⁷ Bay ben ɓe Yaaquuba nulunoo artii, ɓe wi'i mo: «Men yahii haa ka kotoo maa Iisu, kanko tigi himo arude fottugol e maa, himo wondi e worbe teemedde nayo.»

⁸ Yaaquuba huli fota, o maapii. O senditi yimbe makko ben, o wadi ɓe mojobe didi, o wadiri non kadi dammi din e na'i din e ngeloodi din, ⁹ o wi'i: «Si Iisu fottii e konu aranu ngun, o foolii ngun, no gasa ka konu dimmu ngun dadoya.»

¹⁰ Onsay Yaaquuba torii Alla, o wi'i: «Yaa an Alla ben an Ibraahiima, yaa an Alla ben an Issaaqa, Joomiraado, ko an yamirimmi, wi'i: <Yilto ka leydi maa e ka musidal maa, mi moyyoto e maa.» »

¹¹ Yaaquuba wi'i kadi: «Mi hewtaa ngol giggol sella-findewol ngol wadandaa mi, min nduu kurkaadu maa. Fewndo mi lumbaynoo Yurdayniwol, tawi ko tuggordu an ndun tun mi joginoo, jooni non mi wontii mojobe cidi. ¹² Dandan masiibo kotoo an Iisu, ko fii mido huli wota o aru, o piyammi, o piyidammi e rewbe an ben e bibbe mun ben. ¹³ Bay a wi'uno lan: <Mi moyyoto e maa, mi yajnjira jurriya maa on wa ndii njaareendi ka baharu ndi limotaako.» »

¹⁴ Ko don Yaaquuba waalunoo. O yetti e nder jawle makko den ko o nelda kotoo makko Iisu, ¹⁵ dun-le ko: be'i teemedde cidi deyi e ciikuliji noogay, baali teemedde cidi deyi e ga'i baali noogay, ¹⁶ ngeloodi cappande tati deyi wondude e bikkoy mun muynaykoy, kolce cappande nay na'i e ga'i sappo, mbabbi noogay deyi e mbabbi sappo gori.

¹⁷ O yetti di, o halfiniri kurkaadi makko din wuro wuro, o wi'i be: «Hikkee yeeso an, wadon sagara hakkunde gure den.» ¹⁸ O yamiri hikkiido yeeso on, o wi'i: «Si a fottii e kotoo an Iisu, o landike ma: «Ko hombo jeyu-maa e ko honto yahataa, e ko hombo jeyi ngoo wuro wongo yeeso maa?», ¹⁹ a jaaboray mo nii, wi'aa: «Ko Yaaquuba, kurkaadu maa ndun jeyi di, ko Iisu koohoojo an on neldaar di, kanko tigi himo arude baawo amen.» »

²⁰ O yamiri dun kadi dimmo on e tammo on e kala jokkube den gure. O wi'i be: «Ko nii yewtirton Iisu nde fottudon e makko woo, ²¹ on wi'ay: «E hino Yaaquuba, kurkaadu maa ndun, kajun kadi, ka arata baawo amen too.» (Tawi Yaaquuba no miijoo: «Mi walliniray bernde makko nden ndii neldaari ndi mi ardini yeeso an doo. Onsay si men yiidii, no gasa o jaabboray lan welo-welo.»)

²² O hikkini neldaari ndin yeeso, e nden jemmaare don o waali ka daaka. ²³ O immii e nder on jemma, o yetti rewbe makko ben dido e horbe makko ben dido e bibbe makko ben sappoo e goo, o lumbi Yabuukawol. ²⁴ O yetti be, o lumbiniri ka lumbirde, wondude e ko o jeyi kon fow.

Fii Tippiro Yaaquuba ngon

²⁵ Bay Yaaquuba luttitii kajun tun baawo, gorko ari, yani e makko, be piiri haa ka peeral fajiri. ²⁶ Nde on tawnoo foolataa mo, o uttii mo ka keeci, keeci Yaaquuba din jolkitii e nder ko be piirata kon. ²⁷ Onsay on gorko wi'i mo: «Accitan mi yaha, bay fajiri on feerii!»

Yaaquuba jaabii mo: «Mi accitataa ma fannii a du'anaaki lan.»

²⁸ Gorko on wi'i mo: «E ko honno wi'etedaa?»

O jaabii: «Ko Yaaquuba».

²⁹ Gorko on wi'i mo: «A wi'etaake Yaaquuba hande kadi, jooni ko *Isra'iila wi'etedaa, ko fii a catike e Alla e neddanke, a hebii polgal.»

³⁰ Yaaquuba landii mo, wi'i: «Yandi, yeeto lan no innetedaa!»

On jaabii mo: «Ko hondun landantodaa innde an nden?» Onsay on gorko du'anii mo don.

³¹ Yaaquuba toddanii nden nokkuure innde, o inni nde *Fanuu'iila, ko fii o wi'uno: «Mi yi'ii Allaahu on gite e gite, kono wonkii an kin dadii.»

³² Tawi naange ngen fudii fewndo Yaaquuba feyfata Fanuu'iila, tawi himo laya sabu keeci makko din. ³³ Ko dun wadi haa hande si Banii-Isra'il'en jaamataa teewu wondudo e dadol jokkere nden ka keeci, sabu ko Yaaquuba uttanoo ka dadol jokkere keeci makko kon.

Fii no Yaaquuba Yiidiri e Iisu

33 ¹ Yaaquuba banti gite, haynii Iisu no ara wondude e worbe teemedde nayo. Onsay o senditi bibbe ben e hakkunde Layyat e Raahiilu e horbe ben dido. ² O feyfini horbe ben e bibbe mun ben yeeso, o hikkini don Layyat e bibbe mun ben, o watti Raahiilu e Yuusufu baawo. ³ Onsay kanko tigi o hikkii yeeso mabbe, himo wada yaha jiccoo haa timmi laabiji jeedidi, hawri o badondirii e kotoo makko. ⁴ Onsay Iisu dogi fotti e makko, hirbii mo, wengii e daande makko, lunni mo, tun be fesi. ⁵ Iisu banti gite, o yi'i rewbe ben e faybe ben, o wi'i: «E ko hombe woni bee be wondudaa?»

Yaaquuba jaabii: «Ko bee faybe doo Allaahu on yedirimmi sulfu mun on, min nduu kurkaadu maa.» ⁶ Onsay horbe ben wondude e bibbe mun ben badii be, jicci. ⁷ Layyat e bibbe mun ben kajun kadi badii be, jicci. Ontuma Yuusufu e Raahiilu kadi badii jicci.

⁸ Ontuma Iisu wi'i: «E ko hondun wadataa dee gure de mi fotti e mun fow?»

Yaaquuba jaabii: «Ko fii hebugol sulfu mon, onon koohoojo an on.»

⁹ Iisu wi'i: «Mijan, a tawdan e ngalu, maru ko jeydaa kon.»

¹⁰ Yaaquuba jaabii mo: «Oo'o, mi jeejii ma, si tawii a sulfinanii lan, jabu koo ko mi neldu-maa. Ko fii mido ndaarira yeeso maa ngon wano mi ndaarirta Allaahu

on non, bay a jaబborii lan no moyýiri.¹¹ Mi torike ma, jabu ndii neldaari ndi mi neldu-maa, bay Allaahu on yedii lan sulfu, mido yonni fow.» O jeeji don Iisu haa on jabi.

¹² Iisu wi'i: «Immoden yahen, mi hikkanto en yeeso.»

¹³ Yaaquuba jaabii: «Koohoojo an, hidon andi mido wondi e faybe be ayýaa, e kadi mido wondi e baali e na'i muynooji, si en karhii yaadu majji on, hay si ko jallal gootal, dammi din fow yeway.¹⁴ Koohoojo an, hikkee yeeso an, min nduu kurkaadu mon, min mi jokkiray doy no faybe ben e wuro hikkiingo yeeso an ngon waawiri yaarude woo, haa mi hewtoya ka mon, leydi Sa'iira, yo koohoojo an.»

¹⁵ Iisu wi'i: «Awa yo mi accide e yimbe an goo.»

Yaaquuba jaabii: «Hara ko fii hondun? Min yo mi hebu tun sulfu e mon, yo koohoojo an.»

¹⁶ Nden nande Iisu nangiti laawol Sa'iira. ¹⁷ Kono Yaaquuba kajun yahi Sukuuta, o darnani hoore makko suudu, o wadani gureele makko den togooji. Ko dun wadi si nden nokkuure wi'aa *Sukuuta.

Fii no Yaaquuba Hewtitiri Kanaana

¹⁸ Bay Yaaquuba iwii Fadaani-Araama, o hewti e jam moyýere e ndee saare Sakiima jeyaande e ndii leydi Kanaana, o daakii ka sera saare don. ¹⁹ O soodi e juude 6ibbe Hamuura, dun ko ben Sakiima, tumbere leydi nde o darnunoo suudu makko bagi e mun nden. O yobani nde tammaaji teemedere. ²⁰ O darni don layyorde, o inni nden *Al-Allaahu Isra'ilila.

Fii no Sakiima Dooliri Diinatu

34 ¹Diinatu, on jiwo mo Layyatub jibinani Yaaquuba, yalti fii yiidugol e jiwbé leydi ndin. ² Sakiima, 6iddo Hamuura Hiwyankeejo on, dun ko lando leydi ndin, yi'i mo, nangi mo, waalidi e makko, hersini mo. ³ O watti Diinatu, on jiwo Yaaquuba,

wonkii makko. O yidi jiwo on fota, o mbeldii bernde jiwo on.⁴ Sakiima wi'i Hamuura ben mun: «Resanee lan oo jiwo.»

⁵ Fewndo Yaaquuba nani wonde Diinatu jiwo makko on tuuninaama, tawi bïbïe makko worbe ïen no yahi ngayna. O jebbilii haa ïen arti.

⁶ Hamuura ben Sakiima yahi ka Yaaquuba fii yewtidugol e makko.⁷ Bay bïbïe Yaaquuba ïen iwtii aynugol, ïe humpitii dun. Be ïaldï, dun metti ïe, ïe tikki fota, sabuna Sakiima wadii borre-jnaa ka ïeynguure Isra'iila, fii ko o dooli jiwo Yaaquuba on kon, dun wonaa ko haani.

⁸ Hamuura wi'i ïe: «Sakiima, oo bïddo an, wadii bernde mun nden fow e oo jiwo mon. Mi torike on, okkanee lan mo oo jiwo mon, o resa.⁹ Yettindiranen, men yetta jiwbe mon ïen, onon kadi yetton jiwbe amen ïen.¹⁰ Hodiden, dun leydi ndin wonay e sookeeje mon. Hodon, njulodon, dabbon halal doo.»

¹¹ Sakiima wi'i ben Diinatu e kotiraabe Diinatu ïen: «Si on sulfinanii lan, mi ittay ko landidon mi woo.¹² Happanee lan teñe yottiido e jawdi ïamal no ndi foti woo, mi jonnay on. Kono okkee lan tun jiwo mon on, mi resa.»

¹³ Bïbïe Yaaquuba ïen jaabori Sakiima e ben mun Hamuura yoyre, bay hari Sakiima tuuniniino Diinatu bandiraawo mabbe on.¹⁴ Be wi'i ïe: «Menen, ko huunde sattande men non nde men waawataa wadude, okkugol bandiraawo amen on aaden mo sunninaaka, ko fii dun no hersinanii men.¹⁵ Men newnanii on faale mon on woo, si tawii on wa'ii wano men wa'i non, hara kala duhiido e mon sunninte.¹⁶ Ontuma men okkoyay on jiwbe amen ïen, menen kadi men yettana on jiwbe mon ïen, hodiden, wonten jamaa gooto.¹⁷ Kono si on jabaali sunnineede, men yettay jiwo amen on, men yaha.»

¹⁸ Tawi ñin kongudi mabbe don no henani Hamuura e Sakiima bïddo mun on.

¹⁹ Suka on nennaaki wadugol ñun, ko fii himo jinani jiwo Yaaquuba on fota, tawi kadi ko kanko woni bïddo buraado teddineede on ka galle ben makko.

²⁰ Hamuura e Sakiima biddo mun on yahi ka naatirgal saare mabbe, be wi'i worbe saare mabbe nden: ²¹ «Bee arbe doo no wondani en e buttu, yo be wonu ka leydi doo, be golla e mayri, ko fii leydi ndin no yaaji beru mabbe. En yettay jiwbe mabbe ben, enen kadi okken be jiwbe men ben. ²² Kono non bee worbe jabii hodidugol e men, wonten jamaa gooto woo, si tawii kala duhiido e men sunninirte wano mabbe non. ²³ Taw si dee gureele mabbe e jawle mabbe e ko heditii fow wontanay en? Jaben tun faale mabbe on fii yo be hodidu e men.»

²⁴ Kala tawanoodo e ngal mottondiral ka naatirgal saare nani ko Hamuura e Sakiima biddo mun on wowli kon, jabi, sunninaa.

²⁵ Nande timmunoo balde tati, hari hibe wondi e muuseendi, onsay bibbe Yaaquuba worbe ben dido, dun ko Sim'uunu e Lewi, ben ko kotiraabe Diinatu, mo kala e mabbe yetti kaafa, be naati e ndee saare buttunde, be wari kala gorko. ²⁶ Be wariri Hamuura e Sakiima biddo mun on kaafa, be yetti Diinatu ka galle Sakiima, be yahi. ²⁷ Bibbe Yaaquuba ben ari e maybe ben, be jatti keyeeji saare nden, sabu ko bandiraawo mabbe on tuuninanoo kon. ²⁸ Be yetti na'i din e dammi din, wondude e mbabbi din e kala ko wonnoo ka saare e ka gese, ²⁹ be halori jawle den fow wondude e bikkoy e rewbe, be jatti kala ko wonnoo ka galleeji ton.

³⁰ Ontuma Yaaquuba wi'i Sim'uunu e Lewi: «On addanii lan sokola e hoore jiddingol lan e hakkunde bee hodube e ndii leydi, wano bee Kanaaniyankeebe e bee Feriiziyankeebe. Hidon andi min mi duudiraaka yimbe, si be hawtitii e hoore an, be piyay lan haa be mulidammi e beynguure an nden.»

³¹ Kono bibbe makko ben jaabii mo: «Ko hondun o wadirani nii bandiraawo amen on wa si on ko cagaajo?»

Fii no Yaaquuba Hootiri Kanaana

35 ¹ Allaahu on daalani Yaaquuba: «Immo, yahaa Bayti'iila, hodoyaa ton, darnoyaa ton layyorde fii on Allaahu feejannoodo ma fewndo dogaynoodaa kotoo maa Iisu.»

² Yaaquuba wi'i beynguure mun nden e kala be o wondunoo e mun: «Hawkee kala sanamuji di jogidon, labbinon hoore mon, bornodon conci goo. ³ Immoden yahen Bayti'iila, mi darnoya ton layyorde fii oo Allaahu jaabinannoodo lan fewndo mi maapinoo, on wondunoodo e an e nder ndun yaadu an.» ⁴ Be jonni Yaaquuba kala sanamuji di be joginoo, wondude e kodi noppi mabbe din. Onsay Yaaquuba iri di fow e ley ngal leggal njanal wonungal takko Sakiima.

⁵ Onsay be iwi don. Tun, kulol Allaahu on ari e hoore den ca'e hunditunoodé be, hay gooto jokkitaano bibbe Yaaquuba ben.

⁶ Yaaquuba hewti Luuzu, dun ko Bayti'iila, e ndii leydi Kanaana, kanko e jamaa mo o wondunoo on fow. ⁷ O wadi don layyorde, o wi'i nden nokkuure Al-Bayti'iila, ko fii ko don Allaahu on feejannoo mo fewndo o dogaynoodo makko.

⁸ Bay Dabuuratu, muyninnoodo Rifqatu on, faatike, o surraa e ley ngal leggal wi'eteengal Leggal Wullaandu wongal ley Bayti'iila.

⁹ Bay Yaaquuba iwtii Fadaani-Araama, Allaahu on feejani mo kadi, wadi barki e makko. ¹⁰ Allaahu on daalani mo: «Ko Yaaquuba wi'etenodaa, kono a wi'etaake hande kadi Yaaquuba, ko Isra'iila noddetedaa.» Ko nii o okkiri mo ndee innde *Isra'iila.

¹¹ Allaahu on daalani mo kadi: «Ko min woni Alla Jom Bural, hebu bibbe, duudaa. Jamaa iway e maa, moftal jamaaji iway e maa kadi. Awa kadi lambe yaltay e keeci maa. ¹² Ndii leydi ndi mi yedi Ibraahiima e Issaaqa, mi yedete ndi, mi yeday ndi kadi jurriya maa aroyoowo baawo maa on.» ¹³ Bay Allaahu on gaynii mo daalande dun e nden nokkuure, onsay Allaahu on yenti.

¹⁴ Yaaquuba darni hayre e nden nokkuure nde Allaahu on daalani mo e mun, o hibbi sadaka hibbeteedo e hoore mayre, o juuri nde kadi nebban. ¹⁵ Yaaquuba inni nden nokkuure nde Allaahu on daalani mo e mun Bayti'iila.

Fii Jibineede Buniyamiinu e Mayde Raahiilu

¹⁶ Be iwi Bayti'iila, tawi hakkunde don e Ifraata no poodii, d'un hawrondiri e jibingol Raahiilu, o hebi satteende e mun fota. ¹⁷ Fewndo ɻata on fidi mo, debbo wallitotoodo mo on wi'i mo: «Wota a hulu ko fii a hebii kadi booboo gorko.»

¹⁸ Fewndo Raahiilu timmata, o inni booboo on *Buni-Awni, kono ben booboo on inni mo *Buniyamiinu. ¹⁹ Raahiilu faatii, o surraa ka laawol Ifraata, d'un ko Bayti-Lahiimi. ²⁰ Yaaquuba wadi hayre ka hoore yenaande, nden hayre ko maandinorde yenaande Raahiilu nden haa jooni.

²¹ Isra'iila iwi don, o darnoyi suudu makko bagi ndun gada *Magdal-Idri.

²² Fewndo Isra'iila hodunoo e ndin leydi, Ruubaynu yahi waalidoyi e Bilhatu, *taaraajo ben makko on. Ben makko Isra'iila humpitii fii d'un.

Bibbe worbe Yaaquuba ɻen ko be sappoo e dido:

²³ Bibbe Layyat u worbe ɻen, ko Ruubaynu afo Yaaquuba on, e Sim'uunu e Lewi e Yahuuda e Yassaakara e Zabuluunu.

²⁴ Bibbe Raahiilu ɻen kadi ko Yuusufu e Buniyamiinu.

²⁵ Bibbe Bilhatu, kordo Raahiilu on, ko Daana e Naftali.

²⁶ Bibbe Zilfatu, kordo Layyat u on kadi, ko Gaada e Asiira.

Ko bee doo woni bibbe worbe Yaaquuba be o dajanaa Fadaani-Araama ɻen.

Fii Mayde Issaaqa

²⁷ Yaaquuba arti takko ben mun Issaaqa, d'un ko Mamra, ka wi'etee don Qiriyat-Arba'a e ndii leydi Habruuna, ka Ibraahima e Issaaqa arnoo kodii don.

²⁸ Ngurndan Issaaqa dan hawruno duubi teemedere e cappande jeetati. ²⁹ O foofi foofaango sakkitoro, o faatii, o tawtoyi maamaabe makko ɻen, tawde o yedaama ngurndan e balde. Bibbe makko ɻen Iisu e Yaaquuba wattini mo.

Fii Jurriya Iisu on

36

¹ E hino jurriya Iisu, oo wi'eteedo Aduuma. ² Ko e hakkunde jiwbe Kanaaniyankeebe ben Iisu resi rewbe mun ben: dun ko Aadatu, biddo Ayluunu on, on ko Hissiyankeejo, e Ohooli-Baamatu, oo biddo Anaa, taaniraawo Sib'uuna, oo ko Hiwiyankeejo, ³ e Basiimatu, oo biddo Ismaa'iila, bandiraawo Nabaayuuta.

⁴ Aadatu jibinani Iisu Elifaaza. Basiimatu kadi jibinani mo Ra'uu'iila.

⁵ Ohooli-Baamatu kadi jibinani mo Ya'uusa e Ya'alaama e Qooraha. Ko bee doo woni bibbe Iisu, be o dajanaa leydi Kanaana ben.

⁶ Iisu yetti rewbe mun ben e bibbe mun ben, worbe e rewbe, e kala yimbe ko wonnoo ka galle makko, wondude e gureele makko den e daabeeji makko din fow e jawle makko de o hebi leydi Kanaana den fow, o yahi e leydi goo ka wodditii mijan makko Yaaquuba. ⁷ Tawi jawle mabbe den duudanii wondugol be nokkun gootun. Awa kadi tawi leydi ka be kodinoo don no faadani gureele mabbe den.

⁸ Iisu wi'eteedo Aduuma on hodoyi ka pelle Sa'iira.

⁹ E hino jurriya Iisu on, ko on woni maamiraawo Aduumayankeebe ben ka pelle Sa'iira.

¹⁰ E hino inde bibbe Iisu ben: ko Elifaaza mo Aadatu, beyngu Iisu, e Ra'uu'iila mo Basiimatu, beyngu Iisu.

¹¹ Bibbe Elifaaza ben ko Taymaana e Umaru e Safwaa e Gassama e Qanaaza.

¹² Timnaa'u ko taaraajo Elifaaza mo Iisu, on kadi jibinani mo Amaleka. Ko bee doo woni taaniraabe Aadatu, beyngu Iisu on.

¹³ E hino bibbe Ra'uu'iila ben: Ko Nahata e Zaaraha e Samma e Mizza. Ko bee doo woni taaniraabe Basiimatu, beyngu Iisu on.

¹⁴ E hino bibbe Ohooli-Baamatu, beyngu Iisu on, jiw Anaa e taaniraawo Sib'uuna: on jibinani Iisu Ya'uusa e Ya'alaama e Qooraha.

¹⁵ E hino hooreebe bolondaaji jurriya Iisu on:

Jurriya Elifaaza, afo Iisu on, ko Taymaana e Umaru e Safwaa e Qanaaza e

¹⁶Qooraha e Gassama e Amaleka. Ko bee doo woni hooreebe bolondaaji Elifaaza din e nder leydi Aduuma ndin, ben-le ko taaniraabe Aadatu.

¹⁷E hino jurriya Ra'uu'iila mo Iisu on: ko Nahata e Zaaraha e Samma e Mizza. Ko bee doo woni hooreebe bolondaaji Ra'uu'iila din e nder leydi Aduuma ndin, ben-le ko taaniraabe Basiimatu, beyngu Iisu on.

¹⁸E hino jurriya Ohooli-Baamatu, beyngu Iisu on: ko Ya'uusa e Ya'alaama e Qooraha. Ko bee doo woni hooreebe bolondaaji Ohooli-Baamatu, jiw Anaa e beyngu Iisu on.

¹⁹Ko bee doo woni jurriya Iisu wi'eteedo Aduuma on, ko bee kadi woni hooreebe bolondaaji mabbe din.

Fii Horiyankeebe ben Sa'iira

²⁰E hino jurriya Sa'iira, Horiyankeejo on, adinoobe hodude e leydi ndin ben: ko Looataana e Soobaala e Sib'uuna e Anaa ²¹e Diisuuna e Iisara e Diisaana. Ko bee doo woni hooreebe bolondaaji Horiyankeebe ben, dun ko bibbe Sa'iira wonbe e ndii leydi Aduuma ben.

²²Bibbe Looataana ben ko Hori e Haymaama, bandiraawo Looataana on ko Timnaa'u.

²³E hino bibbe Soobaala ben: ko Alwaana e Manaaha e Ebaala e Safuu e Unaama.

²⁴E hino bibbe Sib'uuna ben: ko Ayya e Anaa. Ko Anaa on attinoo yi'ude bulli di'e wulde den ka wulaa ka o aynaynoo mbabbi ben makko Sib'uuna din don.

²⁵E hino bibbe Anaa ben: ko Diisuuna e Ohooli-Baamatu jiw Anaa on.

²⁶E hino bibbe Diisuuna ben: ko Hamdaana e Esbaana e Yitraana e Keraana.

²⁷E hino bibbe Iisara ben: ko Bilhaana e Zawaana e Aqaana.

²⁸E hino bibbe Diisaana ben: ko Uusu e Araana.

²⁹ E hino hooreebe bolondaaji Horiyankeebe ben: ko Lootaana e Soobaala e Sib'uuna e Anaa ³⁰ e Diisuuna e Iisara e Diisaana. Ko bee doo woni hooreebe bolondaaji Horiyankeebe ben e ndii leydi Sa'iira.

Fii Lambe Aduuma ben

³¹ E hino lambe laaminoobe leydi Aduuma ndin, ado lando laamaade Banii-Isra'iila'en:

³² Beela biddo Be'uura on laamii Aduuma. Tawi saare makko nden no wi'ee Dinhaaba.

³³ Bay Beela faatike, Yuubaaba biddo Zaaraha jeyaado Bozraa lontii mo.

³⁴ Bay Yuubaaba faatike, Huusaama jeyaado e ndii leydi Taymaaniyankeebe ben lontii mo.

³⁵ Bay Huusaama faatike, Hadaadu biddo Badaada lontii mo. Ko on foolunoo Midiyaani e ndii leydi Mohaabu. Tawi saare makko nden no wi'ee Awita.

³⁶ Bay Hadaadu faatike, Samla jeyaado leydi Masriika lontii mo.

³⁷ Bay Samla faatike, Saa'uulu jeyaado Rahuubuuta binde maayo lontii mo.

³⁸ Bay Saa'uulu faatike, Baalu-Haanaana biddo Akbuura lontii mo.

³⁹ Bay Baalu-Haanaana biddo Akbuura on faatike, Hadaaru lontii mo. Tawi saare makko nden no wi'ee Faa'uu. Beyngu makko kadi no wi'ee Mahiitabiila mo Matriida e Maazahab.

⁴⁰ E hino inde hooreebe bolondaaji Iisu din, wano bolondaaji mabbe din e leyde mabbe den jeydiri non: ko Timnaa'u e Alwaa e Yatiita ⁴¹ e Ohooli-Baamatu e Iilata e Fiinuuna ⁴² e Qanaaza e Taymaana e Mibsaara ⁴³ e Magdii'iila e Iiraama.

Ko bee doo woni hooreebe bolondaaji Aduuma din, wano kodooli mabbe din e leyde de be halornoo den jeydiri non. Ko Iisu oo woni maamaajo Aduumayankeebe ben.

Fii Koydi Yuusufu din

37

¹ Yaaquuba hodî e ndii leydi Kanaana ndi ben makko kodinoo e mun. ² E hino taariika Yaaquuba kan: Tawi Yuusufu paykun kun duubi sappoo e jeedidi no aynidaynood e kotiraabe mun ben wuro. Kun paykun no wondunoo e ben ben-gootoobe mun, dun ko bîbbe Bilhatu ben e bîbbe Zilfatu ben, ben rewbe ben makko. Tawi non Yuusufu no yewtaynood e ben maâbe boneeji kotiraabe mun ben.

³ Tawi non Isra'iila, dun ko ben maâbe Yaaquuba, no yidunoo Yuusufu buri bîbbe mun ben fow, ko fii o dajuno mo e nder nayeewu makko. O moyyinani mo dolokke pikkaado. ⁴ Ben-gootoobe makko ben tawi ben maâbe no yidunoo mo buri be fow, be anj mo, be wowlirantaano mo no newori.

⁵ Yuusufu hoydi koydol, o sifanii ngol ben-gootoobe makko ben, be burti mo non ajude. ⁶ O wi'i be: «Hedee non, mi sifanoo on koydol ngol mi hoydi ngol.

⁷ Tawi hidan e nder ngesa, hidan habba ba'e. Tun, waare an nden immii, darii, ba'e mon den hunditi waare an nden, de sujjani nde.

⁸ Onsay ben-gootoobe makko ben wi'i mo: «Hara ko goonga a laamoto men, kaa hara ko haqiiqa a wonay fewjoowo e hoore amen kadi?» Be burti mo ajude kadi sabu din koydi e din kongudi makko.

⁹ O hoydi koydol goo kadi, o sifanii ngol ben-gootoobe makko ben, o wi'i be: «E hino ko mi hoydi kon kadi. Naange ngen e lewru ndun wondude e koode sappoo e go'o, no sujjanimmi.»

¹⁰ Bay o sifanike dun ben makko e ben-gootoobe makko ben, ben makko feli mo, wi'i: «E ko hondun ngol koydol maa firi? A sikku min e neene maa e ben-gootoobe maa ben, men sujjante?» ¹¹ Ben-gootoobe makko ben burti mo nawlude, kono ben makko mari dun maanditii.

Fii no Ben-Gootoobe Yuusufu ben Yeeyirnoo mo

¹²Nande goo, ben-gootoobe makko ben yahuno Sakiima fii aynoygol wuro ben mabbe ngon. ¹³Isra'iila wi'i Yuusufu: «Hida andi ben-gootoobe maa ben no yahi aynoygol Sakiima. Aru mi nule e mabbe.»

O jaabii be: «Awa.»

¹⁴Isra'iila wi'i mo: «Yahu ndaaroyaa si ben-gootoobe maa ben no e jam, e si tawii wuro ngon no dadî, araa humpitaa mi.» O immini mo ka aynde Habruuna fii yahugol Sakiima.

Bay Yuusufu hewtii Sakiima, ¹⁵goddo tawi himo jinda ka ladde, on landii mo: «E ko hondun dabbataa?».

¹⁶O jaabii: «Ko ben-gootoobe an ben mi woni dabbitude. Yandi, yeeto lan ka be woni aynirde.»

¹⁷On neddo wi'i mo: «Be iwiino doo, ko fii mi nanii hibe wi'a, *«Mehen Duutaana.»* »

Ontuma Yuusufu jokkiti ben-gootoobe mun ben haa o tawoyi be Duutaana. ¹⁸Be haynii himo ara ka woddi. Ado o hewtude ka be woni don, tawi be haldii sahinbingol mo. ¹⁹Mo bee e mabbe wi'i: «E hino daa hoydoowo on ka arata.

²⁰Jooni non, aree waren mo, untoyen mo e nder woyndu goo, wi'oyen ko kullii jaadungii jaami mo. Ontuma en yi'ay si din koydi makko laatopto.»

²¹Bay Ruubaynu nanii dun, o ebbi jattitugol mo e juude mabbe, o wi'i be: «Wota en wonu sabu makko.» ²²Ruubaynu wi'i be kadi: «Wota on hibbu dey yiyan, untee mo tun e nder nduu woyndu ka ladde doo, wota on fawu mo jungo.» (Ko o wiirunoo dun ko fii no o dandira mo e juude mabbe, o natta mo ka ben mabbe.)

²³Bay Yuusufu hewtii ka ben-gootoobe mun ben woni don, be borti mo dolokke on - on dolokke pikkaado mo o borninoo. ²⁴Onsay be yetti mo, be untoy ka nder woyndu. Tawi hay huunde alaa e nder ndun woyndu, awa kadi ndiyan alaano e mayru.

²⁵ Ontuma be joodii fii jaamugol. Be bantoyi gite mabbe, be haynii lappol seteebe Ismaa'iilayankeebe no iwra leydi Galaada, ngeloodi mabbe no rondii junjurangi e nebbele wujeteede e urngallooji di ben nabaynoo leydi Misira.

²⁶ Onsay Yahuuda wi'i ben-gootoobe mun ben: «Ko nafa hondun woodani en warugol oo ben-gooto men suuden yiyan makko? ²⁷ Accee yeeyen mo bee Ismaa'iilayankeebe, hara en fawaali mo jungo, ko fii oo ko ben-gooto men, ko endan men.» Be nanani mo, be jabii.

²⁸ Bay ben njulaabe iwbe Midiyaani hewtii don, ben-gootoobe Yuusufu ben yawni mo ka nder woyndu, be yeeyi mo ben Ismaa'iilayankeebe tammaaji noogay kaalisi, ben nabori mo Misira.

²⁹ Ruubaynu aroyi non ka woyndu, o tawi Yuusufu alaa ton. O seeki conci makko din. ³⁰ O yiltii ka ben-gootoobe makko ben, o wi'i be: «Paykun kun alaa ton! E min non jooni ko honno mi wadata?»

³¹ Ontuma be hirsi ngaari mbeewa, be yetti dolokke Yuusufu on, be moddini mo yiyan. ³² Be yetti on dolokke pikkaado, be nabani ben mabbe, be wi'i: «Awa meden yi'i doo goddun. Ndaaree si tawii ko dolokke biddo mon on nii, maa si hinaa.»

³³ Yaaquuba anditi on dolokke, o wi'i: «Ko dolokke biddo an on tigi nii! Kullii jaadungii jaamii mo! Yuusufu wadaama ceeli-ceeli!» ³⁴ Yaaquuba seeki conci mun din, o baabii conci heynordi, o heynii biddo makko on balde buy. ³⁵ Biibbe makko worbe e rewbe ari yarlingol mo, kono o salii yarlineede, himo wi'a: «Ko e nder keyngu mi tippotoo ka wonunde maybe ben mi tawtoya biddo an on!» O lutti e fesugol Yuusufu mo makko.

³⁶ Njulaabe iwbe Midiyaani ben yeeyitoyi Yuusufu Misira. Be yeeyi mo oo wi'eteedo Fuuti-Faara, on ko mbatulaajo e hooreejo suufaabé Fir'awna ben.

Fii Yahuuda e Tamaaru

38¹ Fewndo on saa'i Yahuuda wodditoyii ben-gootoobe mun ɓen, o yahi ka gorko Adulaamiyankeejo wi'eteedo Hiira.² Ko don Yahuuda yi'i jiwō mo ben mun woni Kanaaniyankeejo wi'eteedo Su'aa. O tiggi mo, o wattī mo e suudu.³ On yetti reedu, o jibini booboo gorko, booboo on innaa Iiri.⁴ O yetti kadi reedu, o jibini booboo gorko, o inni mo Uunaana.⁵ O jibini fahin booboo gorko, o inni ondon Siila. Fewndo o jibinta mo, tawi himo ka wi'etee don Kaziiba.

⁶ Onsay Yahuuda yettani Iiri, afo mun on, debbo wi'eteedo Tamaaru.⁷ Tawi Iiri afo Yahuuda on ko bondo yeeso Alla, Joomiraado on yettiti mo.

⁸ Ontuma Yahuuda wi'i Uunaana: «Yahu non jooni ka sonnaajo kotoo maa on, nattanaa mo jalaande, hebanaa kotoo maa jurriya.»⁹ Bay Uunaana no andunoo wonde ɓen bibbe wonataa bibbe mun, tuma o yiidunoo e beyngu kotoo makko woo, o hibbayno maniiyu makko on ka leydi, fii tun wota o heban kotoo makko jurriya.¹⁰ Tawi kon ko o wadaynood no boni ka Alla, Joomiraado on yettiti mo kanko kadi.

¹¹ Ontuma ben mabbe Yahuuda wi'i Tamaaru esiraawo mun on: «Yahu heynoyodaa ka galle ben maa en haa Siila mo an njanda.» (Tawi Yahuuda no sikka ondon kadi maayiray wano kotiraabe mun ɓen maayiri non.) Tamaaru yahi, wonoyi ka galle ben mun.

¹² Bay nettoyii, beyngu Yahuuda on faatii, on ko jiwō Su'aa. Bay Yahuuda yarlike faatunde nden, o yahi Timnata ka tayanoobe mo leebi dammi makko din woni ton, wondude e Hiira oo weldiddo makko Adulaamiyankeejo.¹³ Tamaaru banginanaa dün, o wi'aa: «E hino daa ka esiraabe maa ɓen yahata Timnata fii tayooygol leebi dammi mabbe din.»

¹⁴ Bay kanko Tamaaru o tawii Siila njandii kono haa jooni o tigganaaka mo, o bortii conci makko keyngu din, o tiggii, o suumii. O joodoyii ka naatirgal hodo Aynayim, dün ko laawol Timnata.

¹⁵ Yahuuda yi'i mo, sikki ko o cagaajo sabu ko o buumii kon. ¹⁶ O gundii mo ka laawol, o wi'i mo: «Accu yiiden.» (Tawi Yahuuda anditaali ko esiraawo makko on non.)

On jaabii mo: «Ko hondun okkataa mi fii yo en yiidu?»

¹⁷ O jaabitii: «Mi addante be'un an goo.»

Debbo on wi'i: «E hoore a accay doo seedee haa addoyaa kun.»

¹⁸ Yahuuda jaabii: «Ko seedee hondun mi jonnay-maa?»

Debbo on wi'i: «Ko maandinirdun maa dun e lukkitorgol mun ngol e tuggordu ndu jogidaa ndun.» Ontuma o jonni mo, ɓe yiidi. (Bawto dñun, Tamaaru yettani mo reedu.) ¹⁹ Tamaaru immii, yahi, onsay o itti tiggaare nden, o bornii conci makko keyngu dñin.

²⁰ Onsay Yahuuda jonni be'un kun oo weldiddo makko Adulaamiyankeejo fii no o hettira seedeeji di o accunoo e juude debbo on din. Kono on tawoyaali mo. ²¹ O landii yimbe nokkuure ka on debbo wonnoo don, o wi'i: «E ko honto oo debbo cagaajo, wonnoodo laawol Aynayim woni?»

Be jaabii mo: «Debbo cagaajo alaa doo.»

²² O yiltitii ka Yahuuda, o wi'i mo: «Mi tawoyaali mo. Hay yimbe nokkuure nden wi'ii lan wonde debbo cagaajo alaa ton.»

²³ Yahuuda wi'i: «Yo o maru ko o jogii kon fii wota en wirtu hoore men. Min doo, mi naabanii mo be'un kun, kono a tawaali mo.»

²⁴ Bay wano lebbi tati feyyii, Yahuuda yeetaa wonde: «Tamaaru esiraawo maa on wonii jeenoowo. Hay o yettii reedu e nder jeeno makko ngon.»

Onsay Yahuuda wi'i: «Yaltinee mo, o sunnee.»

²⁵ Bay ɓe fokkintinii mo ka yaasi, ontuma o nuli e esiraabe makko, o wi'i: «Ko oo gorko jeydo dii piiji doo woni baaba nduu reedu an. Etee andon ko hombo jeyi oo maandinirdun e lukkitorgol mun e nduu tuggordu.»

²⁶ Yahuuda anditi din pijji, o wi'i: «Oo debbo no burimmi feewude, bay mi jombanaali mo Siila biddo an on.» Gila dun kanko e Yahuuda ɓe yiiditaali e mbalndi.

²⁷ Bay fewndike ka o jibina, tawi ko funeebe o saawi. ²⁸ Fewndo o jibinta, goddo e maɓbe yaltini jungo, debbo wallitotoodo on nangi ngo, haɓbi ngo gaarawol bodewol, o wi'i: «Ko oo doo attotoo yaltude.» ²⁹ Kono on nattiti jungo ngon. Ciwto makko on yalti. Onsay debbo wallitotoodo on wi'i: «Ko yolnde honde udditandaa hoore maa!» Ko dun wadi si ondon innaa Faarisa. ³⁰ Ontuma dimmo on yalti, oo mo gaarawol bodewol ngol woni ka jungo mun, ɓe inni ondon Zaaraha.

Fii no Yuusufu Toojiraa Sokaa

39¹ Ismaa'iilaykeebe ɓen nabi Yuusufu Misira. Oo Misirayankoojo wi'eteedo Fuuti-Faara, mbatulaajo e hooreejo suufaabe Fir'awna ɓen, sooditi mo e juude ɓen Ismaa'iilaykeebe.

² Tawi Joomiraado on no wondi e Yuusufu, kala ko o golli kelda. Hari himo ka galle jom makko Fuuti-Faara, on Misirayankoojo. ³ Fuuti-Faara tawi Joomiraado on no wondi e Yuusufu, kala ko o nangani, Joomiraado on okkay mo kutu mun.

⁴ Yuusufu kurkanii jeydo mo on, o hebi sulfu makko, on halfini mo galle mun den, o watti kala ko o jeyi e juude makko. ⁵ Gila pande o halfinno Yuusufu galle makko den e kala ko o jeyi, Joomiraado on wadi barki e den galle on Misirayankoojo sabu Yuusufu. Kin barki layi e kala ko on jeynoo, gila ka suudu haa ka gese. ⁶ O acci kala ko o jeyi e juude Yuusufu, o haajanooka hay e huunde si hinaa jaametee makko on.

Tawi kadi Yuusufu ko moyya mbaadiijo, labaado. ⁷ Bay feyyii e dun, ɓeyngu jom makko watti tenyinde Yuusufu, o wi'i mo: «Accu waaliden!»

⁸ Kono Yuusufu salii, o wi'i ɓeyngu jom makko: «E hino jom an haajaaka hay e huunde ka nder galle gaa. O wattii kala ko o jeyi e juude an. ⁹ Hay gooto buraa lan

ka nder galle doo. O tonjanaa lan hay fus si wonaa an, bay an ko a sonnaajo makko. Ko honno mi wadirta on bakkatu njano, haa mi fawoo junuubu e yeeso Allaahu on?»¹⁰ Tawi jande woo jande ko non o wowliranaynoo Yuusufu, kono on jabaali hay battagol mo, hinaa fere waalida e makko.

¹¹ Nande goo Yuusufu naati ka suudu fii gollugol, tawi hay gooto e yimbe galle den alaa ka nder suudu ton.¹² Onsay beyngu Fuuti-Faara on nangi mo dolokke on, wi'i mo: «Waaliden.» Yuusufu wippitii, accidi mo e dolokke mun on, dogi, yalti.

¹³ Bay debbo on tawii Yuusufu accidii mo e dolokke mun on, dogii, yaltii,¹⁴ o noddi golloobe ka nder galle ben, o wi'i: «Ndaaree, en addanaama Aabirayankeejo ko jiiба en. O yanii e an fii yo men waalidu. Kono mi sonki, mi noddi faabo.¹⁵ Nde o tawnoo mi sonkii, mi noddii faabo, o accidimmi e dolokke makko on, o dogi, o yalti.»

¹⁶ Onsay debbo on wallini dolokke Yuusufu on takko mun haa moodi makko hewtiti.¹⁷ O siforani nii moodi makko, o wi'i: «Oo jiyaado Aabirayankeejo mo addandaa en doo yanii e an fii jiibugol lan.¹⁸ Bay mi noddii faabo, mi sonkii, o accidimmi e dolokke makko on, o dogi, o yalti.»

¹⁹ Bay Fuuti-Faara nanii ko beyngu mun sifanii mo kon, wi'i: «E hino ko jiyaado maa on wadimmi kon», o tikki tikkudee,²⁰ o nangi Yuusufu, o soki mo ka kasooбе lando on sokii don ka nder kaso. Yuusufu woni don e joge.

²¹ Tawi Joomiraado on no wondi e Yuusufu, o holli mo giggol tiidungol, o yedi mo sulfu yeeso hooreejo kaso ngon.²² On hooreejo kaso ngon halfini Yuusufu kasooбе wonbe ton ben fow. Kala ko wadetenoo ton ko Yuusufu fewjaynoo.

²³ Hooreejo kaso ngon haajanooka hay e huunde e ko o halfini Yuusufu kon, ko fii Joomiraado on no wondi e Yuusufu, himo okki mo kadi kutu e kala ko o huuwaynood.

Fii Koydi Mbatulaabe Fir'awna ben

40¹ Bay feyyii e dun, nande goo halfinaado njaramji wondude e judoowo bireedi lando Misira on wadi jom mabbe lando Misira on bone.² Fir'awna tikkani ben mbatulaabe mun dido, dun ko hooreejo judoobe bireedi ben e hooreejo halfinaabe njaramji ben.³ O nangi be, o watti be e juude hooreejo aynoobe kasongon, on naadi be ka nder kaso ka Yuusufu sokaa don.⁴ Hooreejo aynoobe kasongon yetti ben dido halfini Yuusufu, on dankii be. Be neebi ton seeda e joge.

⁵ Nande goo, ben mbatulaabe dido, dun ko halfinaado njaramji on e judoowo bireedi Fir'awna on, ben sokidaabe e kaso, hoydidi e nder jemma gooto, mo bee koydol feerewol, koydol kala e firo mun.

⁶ Bay weetii, Yuusufu ari ndartugol be, tawi hibe aani.⁷ Ontuma, o landii ben mbatulaabe Fir'awna, be o sokidaa ka kaso jom makko, o wi'i be: «E ko hondun nibbitudon hande?»

⁸ Ben jaabii mo: «Meden hoydi godsun, kono alaa ko firana men.»

Yuusufu wi'i be: «Wonaa Allaahu on firo woodani? Awa, yeetee lan ko hoydudon.»

⁹ Hooreejo halfinaabe njaramji din fillitanii Yuusufu koydol mun ngol, o wi'i: «E nder koydol an ngol, mi yi'i delbol yeeso an.¹⁰ Tawi ngol delbol no mari caldi tati. Din caldi fiini, foyyi, wadi dukke wiijnu bendude.¹¹ Tawi jardukun Fir'awna kun no e juude an. Mi yetti bibbe wiijnu ben, mi haami de ka jardukun Fir'awna, mi watti kun e juude Fir'awna.»

¹² Onsay Yuusufu wi'i mo: «Ko dundon firi: caldi din tati ko balde tati.¹³ E nder balde tati Fir'awna bantay hoore maa nden, o jonnite darnde maa nden, wattaa mo jonnude njaramji makko din, wano wonirannodaa mo non aranun.¹⁴ Kono non ko yo a anditoy fii an, hollaa mi moyyere tuma heboydaa hettaare, wowlanaa Fir'awna fii an, wonanaa mi sabu yaltugol e nder ngoo kaso.¹⁵ Ko fii min, ko ka

leydi Aabirayankeebe ben mi jattaa. Awa doo kadi hay fus mi bonnaa ko mi sokiree e nder kaa ngayka.»

¹⁶ Bay hooreejo judooße bireedi ben tawii ngon firo don no moyýí, o wi'i Yuusufu: «Awa min, ko mi hoydí ko mido rondii debehoy tatoy bireedi. ¹⁷ Hari no ka nder debehun dowhun kala noone bireedi fii Fir'awna. Kono tawi colli din no naamude ko woni e nder kun debehun kun mi rondii.»

¹⁸ Onsay Yuusufu jaabii mo, wi'i: «Ko dundon firi: debehoy koy tatoy ko balde tati. ¹⁹ E nder balde tati Fir'awna ɓantay hoore maa nden, o taya nde, o wenge e leggal, colli din jaama teewu maa ngun.»

²⁰ Nden jalaande tammere hawri ko jalaande anditugol fii jibineede Fir'awna. O wadani mbatulaabe makko ɓen caatal. O ɓanti hoore hooreejo halfinaabe njaramji ɓen e hoore hooreejo judooße bireedi ɓen e yeeso mbatulaabe makko ɓen. ²¹ O jonniti hooreejo halfinaabe njaramji makko din darnde mun nden, on watti jardukun kun e juude Fir'awna. ²² Onsay o wengi hooreejo judooße bireedi ɓen wano Yuusufu siforannoo ɓe non. ²³ Kono hooreejo halfinaabe njaramji din anditaali fii Yuusufu few, o yejjiti fii makko.

Fii Koydí Fir'awna din

41 ¹ Bay duubi didi feyýii, Fir'awna hoydí himo darii daande Niiluwol. ² O yi'i kolce jeedidi na'i laatiidi, ngarbudi no yawa Niiluwol, oorira ka kalinre. ³ O yi'i kadi kolce jeedidi nookudi, horiidi no yawa Niiluwol ɓawto diya arani, daroo takko majji daande Niiluwol. ⁴ Tun, din na'i nookudi horiidi naami diya jeedidi laatiidi ngarbudi. Fir'awna fini fewndo don.

⁵ O dantii kadi, o hoydí dimmun. O yi'i cawti jeedidi sembudi labaadi no funta e bagawol gootol. ⁶ O yi'i kadi cawti jeedidi sewudi, di bifi yorni no funta ɓawto diya arani. ⁷ Tun, sewudi din modi diya cawti sembudi hebbindi. Fir'awna fini fewndo don kadi, o tawi jaka ko koydol.

⁸ Bay weetii bimbi, tawi hakkil Fir'awna fow no jiibii. O nodditi kala ndureejo wondude e gandidube ben fow e nder leydi Misira, o fillitanii 6e dii koydi makko. Kono hay gooto waawaali firande di Fir'awna.

⁹ Onsay hooreejo halfinaabe njaramji din wi'i Fir'awna: «Hande mi anditii fii bonnere an goo. ¹⁰ Fir'awna tikkanno mbatulaabe mun ben. Onsay o wadimmi e joge ka suudu hooreejo aynoobe tata makko on ben, wondude e hooreejo judoobe bireedi ben. ¹¹ Men didoo non, men hoydidi e nder jemma gooto, mo bee koydol feerewol, koydol kala e firo mun. ¹² Tawi meden wondi e suka Aabirayankeejo, on ko jiyaado hooreejo suufaaabe mon ben. Men fillitanii mo din koydi amen, o firani men di, o firi koydol mo bee e amen. ¹³ Dun wadiri wano o siforani men non tigi. Jonnitudon mi golle an den, wengudon dimmo an on.»

¹⁴ Onsay Fir'awna nulani Yuusufu, on yaltinaa tinna ka kaso. Yuusufu fembii, 6ornii conci goo, o yahi ka Fir'awna.

¹⁵ Fir'awna wi'i Yuusufu: «Mido hoydi koydol, kono mi hebaali ko firanammi ngol. Mi nanii wonde hida waawi firude koydol ngol fillitanadaa.»

¹⁶ Onsay Yuusufu jaabii Fir'awna, o wi'i: «Wonaa min dey, ko Allaahu on okkata on firo moyyo.»

¹⁷ Onsay Fir'awna wi'i Yuusufu: «Mi yi'ii ka koydol an, mido darii daande Niiluwol. ¹⁸ Mi yi'i kolce jeedidi na'i ngarbudi laatiidi no yawa Niiluwol, oorira ka kalinre. ¹⁹ Mi yi'i kadi kolce jeedidi horiidi nookudi no yawa bawto diya arani. Hari haa hande mi yi'aali kaanirdi non e nder ndii leydi Misira. ²⁰ Din na'i horiidi kaanudi jaami diya kolce jeedidi ngarbudi. ²¹ Di jaami din, hay andaaki e deedi majji di jaamii godduun, hidi kaaniri wano di kaanirnoo. Ko fewndo don mi fini.

²² «Mi yi'i fahin e nder koydol goo cawti jeedidi hebbindi labaadi no funta e bagawol gootol. ²³ Mi yi'i kadi cawti jeedidi sewudi daydudi, di bifi yorni, no funta

bawto diya arani.²⁴ Cawti sewudi din modi cawti labaadi din. Mi fillitanii ndureebe ben din koydi, kono hay gooto firanaali lan di.»

²⁵ Yuusufu wi'i Fir'awna: «Dii koydi mon ko gooti, yo Fir'awna. Allaahu on hollay woni Fir'awna ko o aroyta wadude.²⁶ Na'i labaadi din jeedidi ko duubi jeedidi, awa kadi cawti labaadi din jeedidi ko duubi jeedidi. Dii koydi ko gooti.

²⁷ Dii na'i jeedidi horiidi nookudi yawunoodi bawto diya arani, ko duubi jeedidi, awa kadi dii cawti jeedidi mehi, di bifì din yorni, ko duubi jeedidi heege aroyaydi.

²⁸ «Wano mi wi'irnoo on non, yo Fir'awna, Allaahu on no hollude Fir'awna ko o aroyta wadude.²⁹ E hino ka duubi jeedidi haarannde tiidunde aranta leydi Misira ndin fow,³⁰ onsay duubi jeedidi heege hikka don, haa leydi Misira ndin yejjita nden haarannde, ko fii ngen heege mehindinay leydi ndin.³¹ Haarannde leydi ndin anditoytaake, hakkee ko ngen heege hikkoytoonge don tiidoyta.³² Ko woni sabu ngol koydol dimmitude ko bay ko huunde tabitunde immorde ka Allaahu on, nde Allaahu on tigi yawnorta wadugol.

³³ «Jooni non, yo Fir'awna dabbu aaden faamudo gandidudo, o wada mo hoore e leydi Misira ndin.³⁴ Yo Fir'awna accu, o toddoo hooreebe ko yaha e nder leydi Misira ndin, yanta jowabun kala ko sojita e nder dii duubi jeedidi haarannde.

³⁵ Yo ben moobitu kala jaameteeji e dii duubi moyyi araydi, den nende maree e juude Fir'awna, dun wona jaametee maraado ka ca'e.³⁶ Din jaameteeji wonana leydi ndin maral fii dii duubi jeedidi heege aroyaydi e nder ndii leydi Misira, hara leydi ndin re'iraaka ngen heege.»

Fii no Yuusufu Lamminiraa Misira

³⁷ Nden yewtere Yuusufu weli Fir'awna e mbatulaabe mun ben.³⁸ Ontuma Fir'awna wi'i be: «Taw si en hebay wano oo neddo doo e wondude e Ruuhu Allaahu on?»

³⁹ Fir'awna wi'i Yuusufu: «Bay Allaahu on andinii ma dundoo fow, hay gooto alaa faamudo gandidiri wa maa. ⁴⁰ Ko an tigi wonata hooreejo galle an den, awa kadi jamaa an on fow wonay e ley kongol maa. Ko jullere laamu nden tun mi burdu-maa.»

⁴¹ Fir'awna wi'i Yuusufu kadi: «Awa, mi lamminii ma e hoore leydi Misira ndin fow!» ⁴² Fir'awna itti hurundaare mun maandinirnde nden ka jungo mun, o sorni nde ka hondu Yuusufu. O borni mo conci dimi, o watti mo kodol kañje ka daande.

⁴³ O yawni mo e hoore giri-giriwal ngal pucci poodata hikkiingal mo ngal, suufaabe makko ben no ewnoo, wi'a: «Wadee bolol!» Ko nii Fir'awna wadiri Yuusufu hooreejo e leydi Misira ndin fow.

⁴⁴ Onsay Fir'awna wi'i Yuusufu: «Ko min woni Fir'awna! Kono si hinaa e dunjayee maa, hay gooto townataa jungo maa koynal e nder leydi Misira ndin fow.»

⁴⁵ Onsay Fir'awna okki Yuusufu innde goo, dun ko Safnaata-Fanihi, o tiggani mo Asnaatu, on ko biddo Fuuti-Feera, yottinoowo sadaka on Uuna. Bawto dun, Yuusufu yalti jindugol e leydi Misira ndin.

⁴⁶ Hari Yuusufu ko mo duubi cappande tati fewndo ko Fir'awna, oo lando Misira, jonnata mo nden darnde. Onsay Yuusufu yalti e tawnde Fir'awna fii jindugol e nder leydi Misira ndin fow. ⁴⁷ E nder din duubi jeedidi haarannde, to'e^d leydi ndin hebbini fota. ⁴⁸ Yuusufu mottindiri naameteeji leydi Misira ndin e nder din duubi jeedidi haarannde, o mari din naameteeji ka ca'e, o mari e saare kala naameteeji sojaadi e den gese binde mayre. ⁴⁹ Yuusufu mottindiri nende wa njaareendi ndin ka baharu, duudeendi majje on duudi haa acci etaade, ko fii hari dun no duudi haa feyñiti.

⁵⁰ Ado hitaande heege aranere nden naatude, tawi Asnaatu, biddo Fuuti-Feera, yottinoowo sadaka on Uuna, jibinanii Yuusufu bibbe worbe dido. ⁵¹ Yuusufu inni

^d41.47 Maa: «tooje».

afo on *Manasse, ko fii o wi'uno: «Allaahu on yejjintinii lan tampereeji an din e belynguure ben an nden.»⁵² O inni jatturu ndun *Efrayiima, ko fii o wi'uno: «Allaahu on wadii lan jiidotoodo e leydi ndi mi tampunoo.»

⁵³ Dii duubi jeedidi haarannde e ndii leydi Misira timmi,⁵⁴ ontuma dii duubi jeedidi heege fuddori wano Yuusufu wi'irnood non. Tawi heege wadii e deya leyde fow, kono hari jaametee no woodi e nder leydi Misira ndin fow.⁵⁵ Onsay bay heege wadii e leydi Misira ndin fow, jamaa on woytii e Fir'awna fii jaametee. Fir'awna wi'i Misirayankoobe ben: «Yahee ka Yuusufu, wadon ko o yamiri on woo.»

⁵⁶ Bay heege ngen wadii e leydi ndin fow, ontuma Yuusufu yaltini jaameteeji maranoodi din. O yeeyi di Misirayankoobe ben, ko fii hari heege ngen no tiidi e nder leydi Misira ndin fow.⁵⁷ Onsay yimbe leyde den fow ari Misira soodugol jaametee e juude Yuusufu, bay hari heege ngen tiidii fota e leyde den fow.

Fii Arugol Ben-Gootoobe Yuusufu ben Misira

42¹ Yaaquuba humpitii wonde nendi no woodi leydi Misira. Onsay o wi'i bibbe makko ben: «E ko hondun joodidon doo e ndaarindirgol?»² O wi'i be kadi: «Minanii wonde nendi no woodi Misira. Yahee ton soodanoyon en ko wuuriren, hara en maayaali.»

³ Onsay ben-gootoobe Yuusufu ben sappo yahi Misira fii soodoygol nendi.⁴ Kono Yaaquuba immindinaali be e Buniyamiinu mijnpiraawo Yuusufu on ko fii o wi'uno: «Fii wota tanaa hebu mo.»⁵ Bibbe Isra'iila ben hewtidi e yimbe goo arbe fii soodugol nendi, ko fii hari heege ngen wadii e nder leydi Kanaana ndin kadi.

⁶ Tawi ko Yuusufu woni hooreejo leydi ndin, ko kanko kadi yeeyaynoo yimbe leydi ndin jaametee. Ben-gootoobe makko ben hewti, be sujjani mo, be tuggi tiide mabbe den ka leydi.⁷ Yuusufu yi'i ben-gootoobe mun ben, o anditi be, kono

o faytinkinori be wa janano. O yewtiri be no mettiri, o wi'i be: «Ko honto iwudon?»

Be jaabii: «Meden iwi leydi Kanaana ari fii soodugol jaametee.»

⁸ Yuusufu anditi ben-gootoobe mun ben, kono kambe be anditaali mo. ⁹ Onsay Yuusufu anditi koydi dì o hoydunoo be din. O wi'i be: «Onon ko on tefooße bonße! Ko andugol lo'ereeji leydi ndin addi on.»

¹⁰ Be jaabii mo: «Oo'owoye, koohoojo amen, menen bee jiyaabe mon, ko yelu soodugol jaametee addi men doo. ¹¹ Menen doo fow ko men ben-gootoobe, ko men yimbe nundube! Menen bee jiyaabe mon wonaa men tefooße bonße.»

¹² O wi'i be kadi: «Wonaa goonga non, ko fii andugol lo'ereeji leydi ndin addi on!»

¹³ Be jaabii: «Menen bee jiyaabe mon, ko men bibbe sappoo e dido ben-gootoobe, be leydi Kanaana. Awa toolaajo amen on no wondi e ben amen fewndo doo, oya on maayiino.»

¹⁴ Onsay Yuusufu wi'i be: «Ko dun tigi mi wonnoo on wowlande, ko on tefooße bonße. ¹⁵ E hino ko mi woni on ndarndorde kon: fodde Fir'awna no wuuri, fannii toolaajo mon on araali, on yaltataa doo. ¹⁶ Toddee goddo e mon ko yahana mijan mon, onon luttube ben non on wonay e joge fii yo kongudi mon din ndarnde anda si ko di goonga. Si tawii wonaa non woniri, fodde Fir'awna no wuuri, haray ko on tefooße bonße.» ¹⁷ Ontuma o wadi be fow e joge e nder balde tati.

¹⁸ Ka nalaande tammere, Yuusufu wi'i be: «E hino ko wadoton kon fii yo on dadu, bay min ko mi huloowo Alla: ¹⁹ si tawii ko on nundube, yo goddo e mon wonu ka suudu joge, luttube ben nabana beynguureeji mon weelaadi din nendi. ²⁰ Onsay addanon mi toolaajo mon on, dun andoto si ko wowludon kon ko goonga, dadon wareede.» Be wadi dun.

²¹ Onsay ɓe ɻuni, ɓe wi'i: «Pellet hiden fawii hakkee mijan men, ko fii en yi'uno annde wonkii makko kin fewndo o torii en sulfu, saliden jabande mo. Ko sabu dун ndee tampere hebiri en.»

²² Ruubaynu yetti haala kan, wi'i ɓe: «Mi wi'aano on wota on wadu kun paykun ko boni, laatii on jabanaali lan? Jooni non en yantaama yiyan makkun on.» ²³ Hari ɓe andaa wonde Yuusufu no faamude dun, ɓay hibe wadunoo nantinoowo hakkunde mabbe.

²⁴ Onsay Yuusufu takkitii, o wulli, o arti, o yewtidi e mabbe. O nangi Sim'uunu e gite mabbe, o sokoyi.

²⁵ Yuusufu yamiri yo bootooji mabbe din hebbine nendi, mo kala e mabbe wattanee kaalisi ko soodi kon ka nder booto mun. O yamiri kadi yo ɓe jonne njooba. Ko dundoo o wadani ɓe. ²⁶ Be fawi bootooji mabbe nendi din ka hoore mbabbi mabbe, ɓe yahi.

²⁷ Fewndo ɓe yiltotoo, goddo e mabbe udditi booto mun on fii yettangol mbabba mun mban jaametee ka ɓe weeri don. O ndaari o tawi jaka kaalisiji makko si o nabunoo soodugol din no ka hunduko booto makko. ²⁸ O wi'i ben-gootoobe makko ben: «Mi jonnaama kaalisiji an din, e hino di ka booto an doo.»

Dun tayini ɓe deedi, ɓe woni e diwnugol, wi'indira: «Taw ko hondun Allaahu on wadi en doo?»

²⁹ Ontuma ɓe hewtitoyi ka ben mabbe Yaaquuba e ndii leydi Kanaana, ɓe fillitanii mo ko heboyi ɓe kon, ɓe wi'i: ³⁰ «Neddo fewjoowo e hoore leydi ndin yewtirii men mo mettiri, o jogitori men wa tefooбе bonbe.» ³¹ Men wi'i mo: «Menen ko men nundube, wonaa men tefooibe bonbe.» ³² Men wi'i mo kadi: «Ko men worbe sappoo e dido ben-gootoobe. Gooto e amen wuuraa, toolaajo on no wondi e ben amen fewndo doo leydi Kanaana.»

³³ «Onsay on fewjoowo e hoore leydi ndin wi'i men: «E hino no mi andirta si ko on nundube, accidee lan e ben-gooto mon goo, yetton jaameteeji ko yonanta belynguureeji mon weelaadi din. ³⁴ Yahon, addanon mi toolaajo mon on fii no mi andira wonaa on tefoobe bonbe, ko on nundube. Onsay mi jonnaa on ben-gooto mon on, hebon non no njuloron e nder leydi ndin.» »

³⁵ Bay ɓe yuppii ko wonnoo ka bootooji mabbe kon, tawi bonfo mbuudi mo kala e mabbe no ka nder booto mun. Nde kambe e ben mabbe ɓe yi'unoo koy bonfohoy mabbe kaalisi, ɓe huli. ³⁶ Onsay ben mabbe Yaaquuba wi'i ɓe: «On sendii lan e bibbe an ben! Yuusufu woodaaka, Sim'uunu woodaaka, jooni hidon faalaa yettude Buniyamiinu kadi! Dun fow ko e hoore an woni yantude.»

³⁷ Ruubaynu wi'i ben mun: «Si mi artiranaali on Buniyamiinu, haray waree bibbe an worbe ben dido. Jonnee lan mo, min tigi mi artiranay on mo.»

³⁸ Yaaquuba jaabii mo: «Biddo an on yaadataa e mon, ko fii kotoo makko maayiino, ko kanko tun lutti jooni. Si tanaa heboyii mo e nder nduu yaadu mon, haray on wonay sabu jippindingol lan e ndee hoore an furdunde ka wonunde maybe ben e nder sokola.»

Yaadu Dimmuru ndun Misira

43 ¹Tawi heege no tiidi e leydi ndin. ²Bay ɓe gaynii jaamude nende de ɓe ittoynoo Misira den, ben mabbe wi'i ɓe: «Yiltitee soodanoyon en jaametee seeda.»

³ Yahuuda jaabii mo, wi'i: «Oo fewjoowo e hoore leydi ndin hajino men, wi'i, «On yiidataa e an si hinaa on ardu e mijan mon.» ⁴ Si tawii on immindinay men e mijan amen, dun men yahay, men soodanoya on jaametee. ⁵ Kono si on immindinaali men e mijan amen, menen kadi men yahataa, ko fii on fewjoowo wi'uno men: «On yiidataa e an si hinaa on ardu e mijan mon.» »

⁶ Ontuma ben mabbe Isra'iila wi'i ɓe: «Ko fii hondun bonanidon e an, hollitudon on neddo wonde hidon mari ben-gooto goo?»

⁷ Be jaabii mo: «On neddo landino men fota fii amen e fii musidal amen ngal fow, o wi'i: <Hara ben mon no wuuri haa jooni? Hara hidon jogii ben-gooto goo?> Men jaabino mo-le ko o landii men kon. Ko honno men sogitortonoo o wi'ayno men: <Ardee e mijan mon?>

⁸ Onsay Yahuuda wi'i ben mun Isra'iila: «Accee immindinon mi e suka on, men yaada, dun en daday hara en maayaali, menen woo, onon woo, bibbe amen ben woo. ⁹Ko min landitoytodon mo, ko min yantoyton mo. Si wonii mi artiranaali on mo, si tawii mi tawtinaali on mo, haray mido fawii hakkee mon haa poomaa. ¹⁰Si tawno men tonganooki doo, harayno men yiltitinoke laabiji didi.»

¹¹ Ben mabbe Isra'iila wi'i be: «Bay wonirii nii, e hino ko wadoton kon: wattee ngaluuji leydi men ndin ka nder bootooji mon ko neldon on neddo. Naboron nebbe wujeteede seeda e njuuri seeda e junjurangi e urngallooji e bibbe ledde yakketeede wi'eteede fustugan e lawjan. ¹²Naboron kadi kaalisi cowalle didi ko nabornodon aranun kon, jonniton be kaalisiji di be wadunoo ka hunduko bootooji mon din, no gasa hara ko faljere dun wadiraa. ¹³Yettee mijan mon, yiltitodon kisan ka on neddo. ¹⁴Yo Allaahu Jom Bawgal on wadu haa on neddo yurmee on, o acca artidon e oya ben-gooto mon e Buniyamiinu. Awa si tawii kadi no hoddiraa yo bibbe an ben fuuto lan, haray yo be fuuto lan.»

¹⁵ Ontuma be yetti din neldaariiji e kaalisiji cowalle didi ko be nabornoo aranun kon, wondude e Buniyamiinu, be yahi Misira, be tawoyi Yuusufu.

¹⁶ Bay Yuusufu yiidii be e Buniyamiinu, o wi'i mbatulaajo galle makko den: «Wernoy bee ka suudu an, hirsanaa be, moyinanaa be nafakka, ko fii ko min e mabbe soyidata hande.»

¹⁷ Mbatulaajo on wadi ko Yuusufu yamiri mo kon, o nabi hobbe ben ka galle Yuusufu. ¹⁸ Bay be nabaama ka galle Yuusufu, be huli, hibe wi'a: «Ko sabu dii

kaalisiji di ɓe wadunoo ka bootooji men ɓe addiri en doo, fii no ɓe yanira e men, ɓe doola en, ɓe wada en jiyaabe mabbe, ɓe jaba mbabbi men din.»

¹⁹ Be badii mbatulaajo galle Yuusufu den, ka dambugal, ²⁰ ɓe wi'i mo: «Accanee men hakkee, yo koohoojo amen, hari men ariino doo fii soodugol jaametee.

²¹ Fewndo ko men hootaynoo, bay men waalii e laawol, men udditi bootooji amen din, men tawi kaalisiji mo kala e amen no ka hunduko booto mun, wano men addirnoo di non, tawi non ko kanji tigi, di fawaa, di ɻakkaa, awa men artirii di.

²² Men addorii kaalisi goo kadi fii soodugol jaameteeji, men andaa non ko hombo wattunoo kaalisiji din ka bootooji amen.»

²³ O jaabii ɓe: «Wonee e jam, wota on hulu. Ko Alla mon on, on Alla ben mon, okki on ndii jawdi ndi tawudon ka nder bootooji mon. Min mi hendino kaalisiji mon din.» Ontuma o addani ɓe Sim'uunu. ²⁴ On werni ɓe ka suudu Yuusufu, o okkori ɓe ndiyan, ɓe sembii, o addani mbabbi mabbe din kadi nagama. ²⁵ Onsay ɓe yaltini neldaariiji di ɓe neldunoo Yuusufu din si o artoyii jalorma, ko fii hari ɓe nanii wonde ko don ɓe soyýidata e makko.

²⁶ Bay Yuusufu hewtii ka suudu, ɓe hewtini mo neldaari ndi ɓe neldi mo ndin, e hoore hibe sujani mo ka leydi. ²⁷ O landii si hibe e jam, o wi'i ɓe kadi: «Taw si ben mon, bee mawbe ɓe wowlannodon mi fii mun no e jam, taw si hibe wuuri haa jooni?»

²⁸ Be jaabii mo: «Ben amen, oo jiyaado mon, no e jam, haa jooni hibe wuuri.» Be sujani mo e dow yankinaare.

²⁹ Onsay Yuusufu banti gite, o yi'i Buniyamiinu mijan makko, neene-gooto makko on, o wi'i ɓe: «Hara ko oo doo wi'unodon mi wonde ko toolaajo mon on?» Onsay o wi'i on: «Yo Allaahu yede moyere yo biddo an!» ³⁰ Yuusufu yalti kisan, ko fii hari yurmeende mijan makko heewii e bernde makko, haa o faalaama

wullude. O naati ka kaybonru makko, o fesi.³¹ Ontuma o sulmii, o yalti, o wawtii hoore makko, o wi'i be: «Bannee soyʃaari ndin.»

³² Be wadani mo feere, be wadani ben-gootoobe makko ben feere, be wadani Misirayankoobe jaamidaynoobe e mabbe ben feere, ko fii Misirayankoobe ben gasataano hawtidude e Aabirayankeeojo, bay hari dun no harmani be.³³ Ben-gootoobe Yuusufu ben joddiniraa yeeso makko, wano be heccindiriri non, mo kala e mabbe no ndaara oya e hoore ʃalaw.³⁴ Onsay Yuusufu yetti e ko mun kon, beydani be. Tawi gebal Buniyamiinu ngal no buri duudude gebe beya den laabi jowi. Be jaami, be yaridi e makko haa be mandili.

Fii Jardukun Yuusufu kun

44¹ Onsay Yuusufu yamiri mbatulaajo mun on, o wi'i: «Yettu dii bootooji bee hobbe, loowaa ton jaameteeji yeru mo bee e mabbe ko waawata nabude, wattaa mbuudi mo kala e mabbe ka hunduko booto mun.² Wattaa kadi jardukun an kaalisi kun ka hunduko booto toolaajo on, wondude e kaalisi coggu nendi makko ndin.»
Mbatulaajo on wadi ko Yuusufu yamiri dun kon.

³ Bay weetii bimbi, hobbe ben wattaa e laawol, kambe e mbabbi mabbe din.

⁴ Tawi be yaltii ka saare, kono be muutaaki, fewndo ko Yuusufu nuli mbatulaajo mun on, o wi'i mo: «Immo, jokkitaa bee hobbe. Si a hewtitike be, wi'aa be: <Ko fii hondun yobirandon moyyere nden bone?⁵ On jogaaki jardukun kun koohoojo an on yarirta kun, o wada ndureyaagal? Ko ko boni wadudon doo.» »

⁶ Mbatulaajo on hewtitii be, o yottini ngal nulal e mabbe. ⁷ Be jaabii mo: «Hara ko fii hondun oo koohoojo amen wowlirani nii? Yo wadugol sifa oo bone woddiso men, menen bee jiyaabe mon!⁸ E hin-le, hay men artiranii on kaalisiji mon di men yiitoyi ka nder bootooji amen leydi Kanaana. Awa ko honno men wujjirta kaalisi maa kajne ka suudu oo koohoojo mon?⁹ Kala mo yiirudaa dun e hakkunde

amen, menen bee jiyaabe mon, yo o sahinbine, menen luttube ben men wonta jiyaabe mon, onon oo koohoojo amen.»

¹⁰ Mbatulaajo on jaabii: «Awa en fottii e ko wi'udon kon. Kala yiiraado dun wonay maccudo an, haray onon luttube ben, bone fawaaki on.»

¹¹ Mo kala jippini booto mun on ka leydi heja, udditi. ¹² Mbatulaajo on liji ɓe, o fuddori afo on, o sakkitori toolaajo on. O tawi jardukun kun ka booto Buniyamiinu. ¹³ Onsay be aani haa be seeki dolokkaaji mabbe din. Mo kala rondintini mbabba mun mban, ɓe yiltitii ka saare.

¹⁴ Yahuuda e ben-gootoobe mun ben tawti Yuusufu ka galle mun, tawi o yaltaali. Be yani ka leydi yeeso makko. ¹⁵ Onsay Yuusufu wi'i be: «E ko hondun wadudon doo? On andaa aaden wano an min no waawi wadude ndureyaagal, anda ko wirnii?»

¹⁶ Onsay Yahuuda jaabii mo: «Ko hondun men wowlanta koohoojo amen on, e ko hondun men haalata? Ko honno men sortorta e dun? Allaahu on fejjinii bone jiyaabe mon ben. Jooni non, men wonii maccube mon, menen e oo yiiraado kun jardukun mon.»

¹⁷ Ontuma Yuusufu wi'i be: «Yo wadugol dun wodditon lan. Ko mo jardukun kun yiitaa e juude mun on tun wonata maccudo an. Onon luttube ben on hootay ka ben mon e hoore jam.»

¹⁸ Onsay Yahuuda ɓadii mo, wi'i: «Mi torike on, onon oo koohoojo an, newnanee lan min oo jiyaado mon mi yewtida e mon, hara on tikkanaali lan, min oo jiyaado mon, ko fii hidon wa'i wa Fir'awna. ¹⁹ Hidon andi yo koohoojo amen, on landino men, menen bee jiyaabe mon, maakudon, si meden mari baaba maa ben-gootoobe. ²⁰ Men jaabii on yo koohoojo an, meden mari baaba nayeejo e mijan dajaado e nder nayeewu ben amen. Kotoo makko feyfiniino, ko kun paykun tun neene makkun luttiri. On-le, ben amen no yidi mo. ²¹ On wi'uno men, menen bee

jiyaabe mon, yo men addanoy on kun paykun haa seedoron kun dee gite mon.

²² Men jaabii on, yo koohoojo an, alaa no kun paykun seedira e ben amen. Si be seedii tun, dun wonay sabu mabbe. ²³ Wi'udon men, menen bee jiyaabe mon, si tawii men ardaali e toolaajo amen on, en yiidataa hande kadi.

²⁴ «Bay men hewtitoyii ka ben amen, oo jiyaado mon, men yeetii be dii kongudi mon, yo koohoojo an. ²⁵ Bawto dun, ben amen wi'i men: «Yiltitee soodanoyon en jaametee seeda.» ²⁶ Men jaabii be: «Alaa no men yaara, kono si tawii ko menen e toolaajo amen on, men yahay ko fii men waawoystaa yiidayde e on neddo si tawii wonaa men wondu e toolaajo amen on.» ²⁷ Ben amen, oo jiyaado mon, wi'uno men, «Hidon andi beyngu an jibinananno worbe dido, ²⁸ oya on yaltiino gila neebii, pellet o wadaama ceeli-ceeli, ko fii haa hande mi yiitaali mo. ²⁹ Si tawii non jooni on nabanii lan oodoo kadi, tanaa heboyii mo ton, haray on jippindinay lan e ndee hoore an furdunde ka wonunde maybe ben e nder sokola.» »

³⁰ Onsay Yahuuda wi'i mo: «Jooni non, si men hootii ka ben amen, oo jiyaado mon, men wondaa e kun paykun kun be wadi wonkii mabbe fow e mun, ³¹ be yi'ii men e baawo makko, dun wonay sabu mabbe. Haray menen, bee jiyaabe mon, men wonay sabu jippingol ben amen, oo jiyaado mon, e on sala mun furdundo, ka wonunde maybe ben e nder sokola. ³² Ko fii min, oo jiyaado mon, mi yettanno ben amen ahadi fii kun paykun, mi wi'i be: «Si mi artiranaali on kun paykun mon, haray mido fawii hakkee mon haa poomaa.»

³³ «Jooni non mi torike on, accee lontiniron mi kun paykun, min oo jiyaado mon, mi wonta maccudo mon, kankun kun yiltoda e ben-gootoobe makkun ben. ³⁴ E ko honno mi waawirta hootude ka ben amen e baawo kun paykun, kulol wota mi yi'u ndee tilfunde ben amen?»

Fii no Yuusufu Andintinori Ben-Gootoobe mun ben

45¹Tawi Yuusufu waawataa hande kadi wawtaade hoore mun e tawnde wonnooбе takko makko ben. O sonki, o wi'i: «Yaltinee kala wondo takko an!» Fewndo Yuusufu andintinii ben-gootoobe mun ben, tawi o wondaa e godđo goo.² Yuusufu fesi ko tiidi haa Misirayankoobe ben nani, dun nanii haa ka galle Fir'awna.

³ Onsay Yuusufu wi'i ben-gootoobe mun ben: «Ko min woni Yuusufu! Taw si hara ben an no wuuri haa jooni?» Kono hay gooto e ben-gootoobe makko ben waawaali mo jaabaade, bay hari hibe heewunoo kulol yeeso makko.

⁴ Yuusufu wi'i бе kadi: «Mi torike on, бадее lan.» Onsay бе бадии mo. O wi'i бе: «Ko min woni Yuusufu, on ben-gooto mon, mo yeeyunodon nabaa Misira.⁵ Jooni wota on maapo, wota on monondiran fii ko yeeyunodon mi kon, mi addaa doo. Sabu ko fii dandugol wonkii Allaahu on ardinimmi yeeso mon.⁶ Wadii nii duubi didi gila heege fuddii e ndii leydi. Awa e nder duubi jowi kadi remetaake sakko sojitee.⁷ Ko Allaahu on imminirimmi yeeso mon, ko fii hiwugol on no luttiron ka aduna, wallitoo on no wuuriron e dow kisiyee mawđo.⁸ Jooni non wonaa onon addimmi doo, kono ko Allaahu on addimmi. O wadimmi tugalal Fir'awna, koohoojo e hoore galle makko den e fewjoowo e hoore leydi Misira ndin fow.

⁹ Yiltitee heja ka ben an, wi'on бе: «E hino ko Yuusufu бидо mon on wi'i kon: Allaahu on wadii lan koohoojo e hoore leydi Misira ndin fow. Yo on seeno heja,¹⁰ hodon ka leydi Gaasaana, wonon takko an, onon e биббе mon e taaniraabe mon, wondude e na'i mon e dammi mon e kala ko jeydon.¹¹ Dun mi dankoto on don, ko fii heege ngen waday fahin e nder duubi jowi, fii wota on mule, onon e бе ynguure mon nden e kala ko jeydon.»

¹² «Onon e mijan an Buniyamiinu, on seedorii gite mon den wonde ko min Yuusufu tigi woni on wowlande.¹³ On sifanto ben an fii ngal teddungal ngal mi teddinaa Misira, e kala ko yi'udon. Addoyee ben an doo heja.»

¹⁴ Onsay o hirbii mijan makko Buniyamiinu, o fesi. Buniyamiinu kadi wulli e daande makko, ¹⁵ o lunnii ben-gootoobe makko ɓen fow kadi, himo fesa. Bawto dun, ben-gootoobe makko ɓen yewtidi e makko.

¹⁶ On kibaaru andii ka galle Fir'awna wonde ben-gootoobe Yuusufu ɓen hewtii. Dun weli Fir'awna e mbatulaabe mun ɓen. ¹⁷ Fir'awna wi'i Yuusufu: «Wi'u ben-gootoobe maa ɓen yo ɓe rondin mbabbi mabbe din, ɓe yiltoo leydi Kanaana, ¹⁸ ɓe yettoya ben mon e beynguureeji mon din, ɓe ara haa ka an. Mi yeday ɓe ko buri moyyude e ndii leydi Misira, ɓe nafoo dakamme leydi ndin.

¹⁹ Mi yamirii ma yahugol wi'a ɓe: «E hino ko wadoton kon: Yettee giri-girijje e ndii leydi Misira ka bakoyon bibbe mon ɓen e rewbe mon ɓen, wondude e ben mon, aron. ²⁰ Wota on wullan fii ko accoton ton kon, ko fii piiji burudi moyyude e nder leydi Misira ndin fow wonanay on.»

²¹ Bibbe Isra'iila ɓen wadi ko ɓe wi'aa kon. Yuusufu jonne ɓe giri-girijje e dow yamiroore Fir'awna, o yoobini ɓe kadi. ²² O okkori mo bee e mabbe conci ko bornoo. Buniyamiinu kajun o okki mo tammaaji teemedde tati kaalisi, e dolokkaaji jowi ko o bornoo. ²³ E hino ko o neldi ben makko kon: o rondini mbabbi sappo gori piiji burdi moyyude e leydi Misira ndin, o rondini kadi mbabbi sappo deyi nende e bireedi e neemaaji goo ko ben makko yooboo ka laawol nde no ara. ²⁴ Ontuma o watti ben-gootoobe makko ɓen e laawol, bay ɓe fokkitii, o wi'i ɓe: «Wota on habu dey ka laawol!»

²⁵ Be yalti Misira, ɓe hewtiti ka ben mabbe Yaaquuba leydi Kanaana. ²⁶ Be humpiti ben mabbe wonde Yuusufu no wuuri haa jooni, hay ko kanko woni fewjude e hoore leydi Misira ndin. Kono ngol kongol diwi Yaaquuba, bay o hoolanooki ɓe.

²⁷ Bay ɓe fillitanike ben mabbe kala ko Yuusufu yewtoynoo ɓe ton kon, Yaaquuba yi'ii kadi giri-girijje de Yuusufu addi fii ko naba mo kon, ko onsay

hakkil makko kin jottii,²⁸ o wi'i be: «Dundoo yonii! Yuusufu mo an no wuuri haa
jooni. Mi yahay mi yi'a mo ado mi mayde.»

Fii no Yaaquuba Yaari Misira

46¹ Isra'iila iwdi don e kala ko o jeyi. Bay o hewtii Birsabaa, o wadani Allaahu ben
makko Issaaqa on sadakaaji. ² Onsay Allaahu on daalani Isra'iila jemma e nder
koydol, o wi'i mo: «Yaaquuba! Yaaquuba!»

O nootii, o wi'i: «Naamu! E hino lan!»

³ Allaahu on daalani mo: «Ko min Allaahu on, on Alla ben maa. Wota a hulu
yahugol Misira, ko fii ko ton mi wadoyte lejol mawngol. ⁴ Mi yaaday e maa
Misira, awa kadi ko min tigi artiroyay-maa. Ko jungo Yuusufu ngon tigi omboyta
gite maa den nde timmudaa.»

⁵ Bay Yaaquuba fokkitii iwugol Birsabaa, bïbïbe makko ïen baki mo kanko e
rewbe mabbe ïen e bïbïbe mabbe ïen ka giri-girijje de Fir'awna addani mo ko o
yaara. ⁶ Be yetti kadi gureele mabbe ïen e kala jawle de be moobunoo leydi
Kanaana. Onsay Yaaquuba yaadi e jurriya mun on fow Misira, ⁷ gila e bïbïbe makko
haa e taaniraabe makko worbe e rewbe. O addori jurriya makko on fow Misira.

⁸ E hino doo inde bïbïbe Isra'iila be o arduuno Misira ïen, dñun-le ko Yaaquuba e
bïbïbe mun ïen:

Afo Yaaquuba on ko Ruubaynu.

⁹ Bibbe Ruubaynu ïen ko Hanuuka e Fallu e Hasruunu e Karmi.

¹⁰ Bibbe Sim'uunu ïen ko Yamu'iila e Yaamiinu e Uuhadu e Yaakiina e Suuhara
e Saa'uulu, ondon neene mun ko Kanaaniyankeejo.

¹¹ Bibbe Lewi ïen ko Gersuunu e Qahaatu e Maraari.

¹² Bibbe Yahuuda ïen ko Iira e Uunaana e Siila e Faarisa e Zaaraha, (kono Iiri e
Uunaana kajun maayuno leydi Kanaana). Bibbe Faarisa ïen ko Hasruunu e
Haamuula.

¹³ Bibbe Yassaakara ben ko Toola e Fawwa e Yuuba e Simruunu.

¹⁴ Bibbe Zabuluunu ben ko Saarada e Iiluunu e Yaahaliilu. ¹⁵ Ko bee doo bibbe worbe Layyatu jibinani Yaaquuba Fadaani-Araama wondude e oo jiwo gooto wi'eteedo Diinatu. Hawtitude mabbe kambe bibbe ben e taaniraabe ben fow hawray cappande tato e tato.

¹⁶ Bibbe Gaada ben ko Sifyunu e Hajji e Suuni e Asbuunu e Iiri e Aruudi e Areeli.

¹⁷ Bibbe Asiira ben ko Yimna e Yiswa e Yiswi e Bariiya e Saaraha, on ko bandiraawo mabbe. Bibbe Bariiya ben ko Haabara e Malki'iilu. ¹⁸ Ko bee doo woni bibbe Zilfatu, oo kordo mo Labaanu okkunoo Layyatu mo mun. Bibbe be Zilfatu jibinani Yaaquuba ben e taaniraabe ben wondude e jaatiraabe ben ko be sappoo e njeegoo.

¹⁹ Bibbe be Raahiilu jibinani Yaaquuba ben ko Yuusufu e Buniyamiinu.

²⁰ Asnaatu, biddo Fuuti-Feera, yottinoowo sadaka on Uuna, jibinanno Yuusufu bibbe dido e nder leydi Misira, dun ko Manasse e Efrayiima.

²¹ Bibbe Buniyamiinu ben, ko Bela e Baakar e Asbiilu e Giira e Na'amaana e Iihi e Ruusu e Muffiimu e Huffiimu e Ardu. ²² Ko bee doo woni bibbe be Raahiilu jibinani Yaaquuba ben. Bibbe be Raahiilu jibinani Yaaquuba ben e taaniraabe ben ko be sappoo e nayo.

²³ Biddo Daana on ko Huusiima.

²⁴ Bibbe Naftali ben ko Yaahas'iilu e Guuni e Yisru e Silliima. ²⁵ Ko bee doo woni bibbe Bilhatu ben, oo kordo mo Labaanu okkunoo Raahiilu mo mun. Bibbe be Bilhatu jibinani Yaaquuba ben e taaniraabe ben ko be njeedido.

²⁶ Jurriya Yaaquuba mo o yaadunoo Misira on, hara rewbe bibbe makko ben tawaaka, ko be cappande njeegoo e njeegoo. ²⁷ Ko bibbe dido Yuusufu dajanaa leydi Misira. Adadu beynguure Yaaquuba arnde Misira nden ko be cappande njeedido.

Fii no Yaaquuba Hewtiri Misira

²⁸ Yaaquuba hikkini Yahuuda yeeso fii yiidoygol e Yuusufu, on ardoo ɓe no ɓe hewtira leydi Gaasaana. Ko nii ɓe hewtiri leydi Gaasaana. ²⁹ Ontuma Yuusufu jolki pucci mun din ka giri-giriwal mun, o yahi Gaasaana fii fottoygol ton e Isra'iila ben makko. No ɓe yiidirnoo, Yuusufu hirbii ben mun ka daande, o fesi don ko juuti.

³⁰ Onsay Isra'iila ben makko wi'i Yuusufu: «Jooni non, ɓay mi seedorii dee gite an wonde hida wuuri, accu mi maaya.»

³¹ Yuusufu wi'i ben-gootoobe mun ɓen e beynguure ben mun nden: «Jooni mido yahude mi humpita Fir'awna wondema onon ben-gootoobe an ɓen e beynguure ben an wonnoonde leydi Kanaana nden, on hewtii ka an doo. ³² Mi wi'a mo kadi wonde ko on ngaynaakoobe dammi e ne'ooɓe, on ardii e gureele mon na'i e dammi ɗen, e kala ko jeydon. ³³ Nde Fir'awna noddi on, landii on ko hondun woni golle mon, ³⁴ on jaaboroyay mo nii: «Menen, ɓee jiyaabe mon, ko men ngaynaakoobe gila cukankaaku amen, menen e mawbe amen ɓen.» Ko nii waawirton hodude e ndii leydi Gaasaana, ko fii Misirayankoobe ɓen no harmini ne'ooɓe dammi ɓen.»

47 ¹ Onsay Yuusufu yahi humpiti Fir'awna, wi'i mo: «Ben-gootoobe an ɓen e ben an iwii leydi Kanaana, wondude e gureele mabbe na'i e dammi, e kala ko ɓe jeyi. Fewndo doo hibe leydi Gaasaana.» ² O subi njowo e ben-gootoobe makko ɓen, o hollindiri ɓe e Fir'awna.

³ Onsay Fir'awna wi'i ɓe: «Ko hondun woni golle mon?»

Be jaabii Fir'awna: «Menen, ɓee jiyaabe mon, ko men ngaynaakoobe dammi, menen e mawbe amen ɓen.»

⁴ Be wi'i kadi Fir'awna: «Ko addi men doo ko kodagol, ɓay menen ɓee jiyaabe mon, alaa ka men orna dammi amen din ka amen ton, ko fii heege ngen tiidii ka

amen leydi Kanaana. Awa jooni men torike on, newnanee men, menen bee jiyaabe mon, hodugol leydi Gaasaana.»

⁵ Fir'awna wi'i Yuusufu: «Jooni, ben maa e ben-gootoobe maa ben arii ka maa,

⁶ awa leydi Misira ndin no e sookeeje maa. Honnu ben maa e ben-gootoobe maa ben e nokkuure burnde moyfude nden e leydi Misira ndin. Yo ɓe hodoy Gaasaana. Awa kadi si hida andi firnube hakkunde mabbe, halfin ɓe gureele an den.»

⁷ Yuusufu nelani Yaaquuba ben mun, hollindiri mo e Fir'awna. Onsay Yaaquuba du'anii Fir'awna. ⁸ Fir'awna wi'i Yaaquuba: «Ko on ɓe duubi jelu nii?»

⁹ Yaaquuba jaabii: «Duubi ngurndan an dan fow e nder seteyaagal an ngal ko teemedere e cappande tati. Yeru duubi di mi hebi din e nder ngurndan an dan duudaa, awa kadi ko sattudi, kono non di hewtaaki duubi di mawbe an ben hebunoo din e nder seteyaagal mabbe.» ¹⁰ Onsay Yaaquuba du'anii kadi Fir'awna si o waynitii.

¹¹ Yuusufu honni ben mun e ben-gootoobe mun ben wano Fir'awna yamiriri mo non. O yedi ɓe nokkuure burnde moyfude nden e nder ndii leydi Misira ko wona halal mabbe, nden nokkuure no wi'ee Ra'amiisa. ¹² Yuusufu nabani ben mun e ben-gootoobe mun ben e beynguure ben makko nden fow jaametee, mo kala e mabbe yeru adadu bibbe mun ben.

Fewjoore Yuusufu nden Misira

¹³ Hari jaametee lannii e nder leydi ndin fow, ko fii hari heege ngen tiidii. Tawi leydi Misira ndin e leydi Kanaana ndin no tilfoo tun sabu ngen heege. ¹⁴ Onsay Yuusufu mottindiri kala mbuudi coggu nende de o yeeyunoo e nder leydi Misira e leydi Kanaana, o naadi din mbuudi ka galle Fir'awna. ¹⁵ Bay mbuudi lannirii yimbe leydi Misira ndin e leydi Kanaana ndin, onsay Misirayankoobe ben fow ari

ka Yuusufu, no wi'a: «Okkoree men ko men naama. Taw si men maayay yeeso mon 6ay mbuudi lannirii men?»

¹⁶ Yuusufu wi'i 6e: «Bay mbuudi lannirii on, addee gureele mon den, wattiten e jaametee.» ¹⁷ Be addi gureele mabbe den ka Yuusufu, Yuusufu jonne 6e jaametee coggu pucci mabbe din e gureele dammi mabbe din e gureele na'i mabbe din e mbabbi mabbe din. O wallitori 6e jaametee ko 6e feyfyrira nden hitaande don, coggu daabeeji mabbe din fow.

¹⁸ Bay nden hitaande don feyfyr, 6e arti kadi ka makko fii nden hitaande hikkiinde don, 6e wi'i mo: «Men suudataa on, yo koohoojo amen, wondema mbuudi amen din lannii, gureele amen den kadi no e sookeeje mon. Jooni ko lutti on hendaaki e juude amen, yo koohoojo amen, ko menen e leyde amen den.

¹⁹ Hara men maayay e gite mon, leyde amen den kadi mula? Jooni non soodidee men e leyde amen den coggu jaametee, menen e leyde amen den, men laatoo jiyaabe Fir'awna. Okkoree men awdi ko men danditora hara men maayaali, leyde amen den kadi caabaali.»

²⁰ Onsay Yuusufu soodani Fir'awna leyde Misira den fow. Bay tawi heege ngen no tiidi, Misirayankoojo kala yeeyiti Yuusufu leydi mun ndin. Leydi ndin fow wontani Fir'awna. ²¹ Onsay Yuusufu maccindini jamaa on, gila e keerol hebi e keerol e nder leydi Misira ndin. ²² Ko wonnoo soodaaka woo ko leyde yottinoobe sadaka 6en, ko fii 6en yottinoobe sadaka no marnoo gebal immorde e Fir'awna, ko e ngal gebal 6e wuuruunoo. Ko dun wadi si 6e yeeyaali leyde mabbe den.

²³ Onsay Yuusufu wi'i jamaa on: «Awa hande mi soodidii on e leyde mon den fii Fir'awna. E hino awdi fii mon ko to'on ka leyde. ²⁴ Nde sonitudon woo, on jonnay Fir'awna feccere jowabere nden, luttidon e deya pecce nay ko wadon awdi e ko jaamon, onon e beynguureeji mon din e bibbe mon 6en.»

²⁵ Onsay ɓe jaabii Yuusufu: «A jonnitii men ngurndan amen dan! Sulfinan men, yo koohoojo amen, men laatike jiyaabe Fir'awna.» ²⁶ Yuusufu wadi dün sariya reweteedo e nder leydi Misira ndin fow, haa hande, kala jowabun e ko sojitaal kon artanay Fir'awna. Ko leyde yottinoobe sadaka ɓen tun wonnoo wontanaali Fir'awna.

Duubi Sakkitori Ngurndan Yaaquuba dan

²⁷ Banii-Isra'iila'en hodí ka wi'etee don Gaasaana, dün ko e nder leydi Misira ndin. Be halori don. Be jiidii, ɓe duudi buy.

²⁸ Yaaquuba wuuruno duubi sappoo e jeedidi e nder leydi Misira, ngurndan Yaaquuba dan ko duubi teemedere e cappande nay e jeedidi. ²⁹ Bay ɓadike ka o faatoo, o noddi Yuusufu mo makko, o wi'i mo: «Mi torike ma, sulfinanan, sornaa jungo maa ngon ka ley busal an, woondanaa mi e hoore giggol sella-findewol wondema a surrataa lan e nder ndii leydi Misira. ³⁰ Nde mi timmi, mi tawtoyi maamaabe an ɓen, a yaltinay lan e nder leydi Misira, surroyaa mi ka ɓe belnaa don.»

Onsay Yuusufu jaabii ben mun: «Mi wadiray no yamirirdon mi non.»

³¹ Yaaquuba wi'i kadi: «Woondanan wondema a warray non.» Yuusufu woondi. Ontuma Isra'iila ugginii ka sobbundu danki mun.

Fii no Yaaquuba Du'orani Bibbe Yuusufu ɓen

48 ¹ Bawto dun, Yuusufu wi'aa wonde: «Ben mon no fooyi.» O yetti bibbe makko ɓen dido, dün ko Manasse e Efrayiima, o yaadi e mabbe. ² Be yeetii Yaaquuba: «E hino daa Yuusufu gedal mon on ka arata.» Onsay Isra'iila etii haa immii joodii ka danki mun.

³ O wi'i Yuusufu: «Allaahu, Jom Bawgal on, feejanno lan e ndee nokkuure wi'eteende Luuzu, dün ko e ndii leydi Kanaana, o barkinimmi. ⁴ O daalanimmi: «Mi

duddinay jiidi maa ndin, mi yanje, wontaa moftal jamaaji. Mi okkoyay jurriya maa aroyoowo baawo maa on ndii leydi, ndi wonana 6e halal haa poomaa.»

⁵ «Jooni non, bee bibbe dido 6e jibinanadaa e nder ndii leydi Misira ado mi arde wontanii lan. Efrayiima e Manasse wontanii lan wano Ruubaynu e Sim'uunu woniranimmii non. ⁶ Kono bibbe 6e jibinanoytedaa baawo bee doo ben, ko an wonanta. Ko e inde kotiraabe mabbe ben 6e hendoroya ndondi mabbe ndin.

⁷ Fewndo mi iwi Fadaani-Araama, Raahiilu maayirimmi leydi Kanaana ka laawol, hari men siwaa hewtude Ifraata seeda. Mi wattini mo ka sera laawol Ifraata (dun ko Bayti-Lahiimi).»

⁸ Isra'iila ndaari bibbe Yuusufu ben, wi'i: «E ko hombe nii?»

⁹ Yuusufu jaabii ben mun: «Ko bee bibbe Allaahu on okkimmi doo.»

Isra'iila wi'i: «Bannanan 6e doo, mi du'anoo 6e.»

¹⁰ Hari Isra'iila nawyii haa gite makko den mindii, o accii yi'ude. Yuusufu banni 6e takko makko. Onsay Isra'iila hirbii 6e, lunnii. ¹¹ Isra'iila wi'i Yuusufu: «Mi sikkaano mi yi'ete e nder ngurndan an, e hino non jooni Allaahu on holpii lan hay jurriya maa on.»

¹² Onsay Yuusufu itti 6e ka hoore koyde ben mun, o sujji e leydi. ¹³ Ontuma Yuusufu jogodi 6e didoo non, Efrayiima ka jungo makko jaamo, fii yo on hikkor ko nano Isra'iila, Manasse ka jungo makko nano, fii yo on hikkor ka jaamo Isra'iila. Onsay o banni 6e takko ben makko. ¹⁴ Kono Isra'iila fawi jungo mun jaamo ngon ka hoore Efrayiima, toolaajo on, o fawi jungo makko nano ngon ka hoore Manasse. O luutindiri juude makko den, fii kala ko Manasse woni afo on.

¹⁵ O du'anii Yuusufu, o wi'i: «Yo oo Allaahu, mo bee maamaabe an Ibraahiima e Issaaqa, jokkinoo e mun fewndo ngurndan mabbe dan, dun ko oo Allaahu Ngaynaako an, gila mi dajaa haa hande, ¹⁶ yo oo Malaa'ikaajo sortudo lan e boneeji fow barkin bee faybe, yo 6e nodditire innde an, e inde bee maamaabe an

Ibraahiima e Issaaqa, yo ɓe diudu ka hoore leydi haa ɓe wona jamaa moolanaado.»

¹⁷ Onsay Yuusufu ndaari tawi ko ka hoore Efrayiima ben makko fawi jungo mun jaamo ngon, dun metti mo. O nangi jungo ben makko ngon fii ittugol ngo ka hoore Efrayiima, o fawa ngo ka hoore Manasse. ¹⁸ Yuusufu wi'i: «Hinaa nii, yo baaba en, bay ko oo woni afo on, fawee sookewo mon jaamo ngon ka hoore makko.»

¹⁹ Kono ben makko salii dun, wi'i: «Mido andi yo biddo an, mido andi, kanko kadi o wontay jamaa, o wona mawdo. Kono mijan makko buray mo mawnude, jurriya makko on wonay jamaaji diuududi.» ²⁰ Nden jande o du'anii ɓe, o wi'i: «Ko ebbude e maa, Banii-Isra'iila'en du'orta, ɓe wi'a: Yo Allaahu on wadire wa Efrayiima e Manasse!» Ko nii o hikkiniri Efrayiima yeeso Manasse.

²¹ Onsay Isra'iila wi'i Yuusufu: «E hino jooni hewtii ka mi maaya. Kono Allaahu on wonday e mon, o artiroyay on ka leydi maamaabe mon ɓen. ²² Mi yedii ma gebal e dow ben-gootoobe maa ɓen, dun-le ko ngoo falo leydi ngo mi hendori kaafa an kan e laajnal an ngal e juude bee Amoriyankeebe.»

Fii no Yaaquuba Du'orani Bibbe mun ɓen Sappoo e Dido

49 ¹ Yaaquuba nodditi bibbe mun ɓen, o wi'i ɓe: «Moobondiree, mi yeetoo on ko aroyta on hebude e dee jalaade aroyayde. ² Ko onon yo bibbe Yaaquuba, mottondiree, hedodon, hedee ben mon Isra'iila.

³ «Ko an yo Ruubaynu afo an, doole an e mo mi dikkori ayfere cukankaaku an, ko a burdo e teddungal e doole: ⁴ Hida naadiri wa ndiyan. A hebataa bural hande kadi, bay a yawii ka danki ben maa, a yawii, a tuuninii mbalndi an ndin.

⁵ Sim'uunu e Lewi kan ko neene-gootoobe, kaafaaje mabbe den ko aalaaji masinbinirdi. ⁶ Wota mi tawe e fewjooje mabbe den, wota mi tawde e mottondiral mabbe ngal, ko fii ɓe ittii wonkii e nder jaande mabbe, awa kadi ɓe tayii codduli

ga'i din e nder fijindaaru mabbe ndun.⁷ Yo kuddi wonan tikkere mabbe nden, ko fii hinde tiidi. Yo kuddi wonan monee mabbe on, ko fii himo hunyí. Mi senditay 6e e nder jurriya an on, min Yaaquuba, mi saakita 6e e nder leydi Isra'iila ndin.

⁸ Ko an yo Yahuuda, ben-gootoo6e maa 6en mantete, a faway jungo maa ngon e hoyyudu ay6e maa, awa kadi ben-gootoo6e maa 6en sujjante. ⁹ Ko an yo Yahuuda, ko a ngayuuri hecciri, hida iwri waanugol mbaroodi, yo 6iddo an! Hida helti koppi maa, waalori wa ngayuuri. Wa ngayuuri ndeyri, ko hombo dillinay-maa don? ¹⁰ Labbooru laamu ndun iwataa e juude Yahuuda, awa kadi tuggordu laamu ndun ko ka jurriya makko luttata, haa tuma mo dun wonanta on ari, on mo jamaaji din fow doftoytoo. ¹¹ Ko ka delbol wiiju o humata mbabba makko mban, o huma bikkun mabba on ka salndu maggol. Ko njaram wiiju o wuppirta conci makko din, ko yiyan bibbe wiiju o wuppirta burumusu makko on. ¹² Gite makko den no buri njaram wiiju wojjude, niiye makko den no buri biraadan rawnude.

¹³ Zabuluunu kajun hodoyay ka daande baharu, ka makko wona darorde laade ndiyan, keerol makko ngol ko Siduuna haadata.

¹⁴ Yassaakara no yeddiri wa mbabba, waalaymba hakkunde orde didi baali. ¹⁵ Nde o ndaaroyi, o tawi fowtorde makko nden no moyyí, awa kadi leydi ndin no woodi, o sornoyay walbo makko ngon ka ley dongal, o wonoya maccudo kurketeedo.

¹⁶ Daana kajun jaawoyay jamaa mun on, wano goddo e bolondaaji Isra'iila din.

¹⁷ Daana wa'oyay wa mboddi e hoore laawol, wa kuuraari e hoore datal, soppayndi puccu e coddungol, dun wona sabu yanirgol jom maggu 6aawo.

¹⁸ «Yaa an Joomiraado, mido tanyinor maa kisiyee!

¹⁹ Gaada kajun, radotoobe radoyto mo, kono o radoo 6e, o eppa nangude.

²⁰ Asiira kajun, leydi makko ndin heeway nguureeji newiidi, ndi funtina dakammeiji lando.

²¹ Naftali no wa'i wa jawre accitaande, rimaynde bikkoy fotukoy.

²² Yuusufu no wa'i wa bilitol moyyol, funtungol e binde 6undu, ngol caldi mun feyyitii tataaji. ²³ Fampotoobe laajne holli mo ngayngue, be monanii mo, be fampii mo. ²⁴ Kono hay laajnal makko ngal dillaali, juude makko den ayyani ngal e nder doole, sabu sookewo dolnungs Alla Jom Bawgal Yaaquuba on, e sabu Ngaynaako on, dun ko Fetere Isra'iila nden, ²⁵ e sabu oo Alla ben maa, on wondo Ballo maa, e sabu oo Alla Jom Bawgal barkinirdo ma barkiji kammuuli din ka dow, e barkiji dan ndiyan wondan ka kattudi luggeendi ley, e barkiji endi e ndimdimol. ²⁶ Pellet dii du'aaji di min ben maa Isra'iila mi du'ani-maa no buri du'aaji dee pelle kidde tabitude, no buri moyyuki dee cehe poomayankeeje niibude. Yo din du'aaji fow wonu e hoore Yuusufu, yo dii wonu ka duure oo burdo e hakkunde ben-gootoobe mun.

²⁷ Buniyamiinu ko saafaandu jaadundu. Bimbi o jaamay ko o waapi kon, kiikiide o sendita ko o jattoyi kon.»

²⁸ Ko bee doo sappoo e dido woni bolondaaji Isra'iila din. Ko dundoo wonnoo ko ben mabbe haalannoo be fewndo o du'antoo be, o du'anii mo kala e mabbe du'aa mo ontigi handi e mun on.

Fii Mayde Yaaquuba Nden

²⁹ Onsay o yamiri be, o wi'i: «Jooni mido tawtoyde maamaabe an ben, on surroyay lan takko mabbe e nder ndee fammeere wonnde ka ngesa Ifruuna, oo Hissiyankeejo, ³⁰ dun ko e ndee fammeere wonde ka ngesa wi'eteemba Makfilati takko Mamra e nder leydi Kanaana, mba Ibraahiima soodunoo e juude Ifruuna, oo Hissiyankeejo, don wonti berde makko halal. ³¹ Ko don Ibraahiima e sonna mun Saarata wattinaa, awa kadi ko don Issaaqa e sonna mun Rifqatu wattinaa, ko don kadi mi wattini Layyat. ³² Mban ngesa e nden fammeere wonnde e nder mun ko e juude Hissiyankeebe ben soodanoo.»

^e49.23 Maa: «Fampotoobe laajne liggit mo».

³³ Bay Yaaquuba lannii yamirde bïbïe mun ben dun fow, o watti koyde makko den ka danki, o foofi foofaango makko sakkitoro ngon, o tawtoyi maamaabe makko ben.

50¹ Yuusufu yani e hoore ben mun, fesi e mabbe, lunnii ïe. ² Onsay Yuusufu yamiri mbatulaabe mun jawndoobe ben fewnugol furee ben makko on, naala mo nebban, taara kasannge e mun fii surrugol. Ben jawndoobe wadiri no o wi'iri ïe non. ³ Naalugol furee on nebban, taara mo kasannge fii surrugol, waduno balde cappande nay, wano aada Misirayankoobe ben toddori non. Misirayankoobe ben heynii mo balde cappande jeedidi.

⁴ Bay wonii balde heynagol den feyïii, Yuusufu yewti wondibbe Fir'awna ben, o wi'i ïe: «Si hidon sulfinanimmi, haray mi torike on wi'anee lan Fir'awna: ⁵ <Ben an woondinanno, ïe maaki: <Hewtii ka mi maaya, a surroyay lan e ndee yenaande nde mi jasannoo hoore an e ndii leydi Kanaana.» Jooni mido faalaa yahude surroygol ben an, mi arta.» »

⁶ Fir'awna jaabii: «Yahu, surriroyaa ben maa en no ïe woondinirno-maa non.»

⁷ Onsay Yuusufu yahi fii surroygol ben mun. Mbatulaabe Fir'awna ben fow e mawbe galle makko den wondude e mawbe leydi Misira ndin fow dowti mo. ⁸ Be yaadi e beynguure Yuusufu nden fow e ben-gootoobe makko ben e beynguure ben makko nden. Ko luttunoo leydi Gaasaana woo ko faybe ben e gureele mabbe na'i e dammi den. ⁹ Be yaadi kadi e giri-girijje wondude e waddiibe pucci, dun woni mbatu tiidungu fota.

¹⁰ Bay ïe hewtii e oo bete^f Ataada, dun ko gada Yurdayniwol, ïe fesi don fesaango tiidungo yurmungo fota. Onsay Yuusufu heynii ben mun balde jeedidi. ¹¹ Hodube e ndin leydi ben, dun ko Kanaaniyankeebe ben, yi'i ndee heynannde e

^f50.10 Maa: «gete».

on bete Ataada, ɓe wi'i: «Dun ko heynannde tiidunde fii Misirayankoobe ɓen!» Ko sabu dun ɓe inniri nden nokkuure wonde gada Yurdayniwol *Abiila-Misira.

¹² Bibbe Yaaquuba ɓen jinni don ko ben mabbe yamirnoo ɓe kon: ¹³ ɓe nabi mo leydi Kanaana, ɓe surroyi mo e nder fammeere wonde e ngesa mba Ibraahiima soodunoo e juude Ifruuna, oo Hissyankeejo, ka wi'etee don Makfilati takko Mamra, fii ko wonana mo berde halal. ¹⁴ Bay ɓe surroyii Yaaquuba, Yuusufu e ben-gootoobe mun ɓen wondude e dowtunoobe mo ɓen fow fii surrugol ben makko yillitii Misira.

¹⁵ Bay ben-gootoobe Yuusufu ɓen ndaarii tawii ben mun feyfinii, ɓe mijji, ɓe wi'i: «Taw si Yuusufu hollataa en ngayngu, o yottoo en bone mo wadunoden mo on?» ¹⁶ Onsay ɓe nuli e Yuusufu, ɓe wi'i mo: «Ben maa yamirno men dundoo ado ɓe feyfinde, ɓe maaki: ¹⁷ «Wi'ee Yuusufu: Yandi mi torike ma, yaafano ben-gootoobe maa ɓen ndee bonnere e oo junuubu ko ɓe waduno-maa, ko fii ɓe wadii ma ko boni.» Jooni men torike on yaafanee men bonnere amen nden, menen ɓee maccube Alla ben mon!» Yuusufu fesi, bay o yewtiraama non.

¹⁸ Ben-gootoobe makko ɓen tigi ari ka makko, ɓe yani e ley koyde makko, ɓe wi'i: «E hino men, ko men jiyaabe mon.»

¹⁹ Onsay Yuusufu wi'i ɓe: «Wota on hulu, on sikku mido waawi lontaade Alla? ²⁰ Hari hidon ebbi wadugol lan ko boni, kono Allaahu on hoddiri ko ko moyfi wadata fii laatingol ko fewndii hande kon, dun-le ko dandugol wonkiji jamaa duududo. ²¹ Jooni non, wota on hulu hay fus, mi dankoto on, onon e bibbe mon ɓen.» O yewtiri be no newori, o buttini ɓe fernde.

Fii Mayde Yuusufu nden

²² Yuusufu hodidi e beynguure ben mun nden Misira. O wuuri duubi teemedere e sappo. ²³ Yuusufu yi'uno jaatira Efrayiima mo makko, dun hawri ko celtunopel

makko kanko Yuusufu. Awa kadi fewndo bïbïe Maakiira mo Manasse ïen jibinaa, ko ka hoore koyde Yuusufu ïe jibinaa.

²⁴ Yuusufu wi'i sibïe mun ïen: «Hewtii ka mi maaya. Kono pellet Allaahu on faaboyto on, o yaltinoya on e ndii leydi Misira doo, o naba on e ndii leydi ndi o fodirnoo Ibraahiima e Issaaqa e Yaaquuba woondoore.» ²⁵ Onsay Yuusufu woondini bïbïe Isra'iila ïen, o wi'i: «Pellet Allaahu on faaboyto on, onsay on pottinoyay yi'e an ðen doo.»

²⁶ Bawto dun Yuusufu faatii, dun hawri ko mo duubi teemedere e sappo. O fewnaa, o naalaa nebban, o taaraa kasannge, o tumbaa e goyki e nder ndii leydi Misira.

LA GENÈSE
en Langue Pular (Fouta-Jalon)
République de Guinée
© 2013 Traducteurs Pionniers de la Bible
en collaboration avec
Mission Protestante Réformée